

Ибраҳим Гафуров


Дил ЭРЖИЖЛИГИ

Хикоялар, мансуралар, бадиалар,
адабий мақолалар

Иброҳим Гафурнинг янги китобига тарихий ҳикоялар, ман-суралар, ҳаёт ва адабиёт ҳақидаги бадиалар кирган. Уларда муаллиф ҳозирги замонда ёшу қари ҳамманинг юрагини баробар күйдираётган, ҳамманинг ҳаёлини банд этган бениҳоя дардли гапларни ўртага қўяди. Миллатнинг бугунги аҳволи, ўзбек халқининг тарихий тақдирни устида кеңг ва очиқ бадиий сўз юритади.

Китоб гўяал услубда ёзилган ва кеңг китобхонлар өмасига мўлжалланган.

Махсус муҳаррир: Раҳмон Қўчқоров



F 29

Ғафуров И.

Дил эркинлиги//Махсус муҳаррир: Р. Қўчқоров/. — Т.:Маънавият, 1998.—152 6.

ББК 83. ЗУз

F 4702620204 -24
M 25 (04)-98 5-98

© «Маънавият», 1998

БЕДОР ҚАЛБ

Шарқ шоирларидан бири: «Агар мени билмоқчи бўлсангиз, сўзимга боқинг»,—деган экан. Дарҳақиқат, сўз — кўнгил ойнаси. Одамнинг ботиний олами, ният ва омоли сўзда намоён бўлади. Сўз — буюк қудрат, Аллоҳ ато этган бебаҳо неъмат. Айниқса, қалби халқ ва миллат дарди билан ошино адабнинг сўзи ҳар қандай юракни ҳам ёндиради, маърифат, ҳақиқат жарчиси бўлиб янграб туради.

Ўзига хос ҳароратли сўзи билан эл-юрт орасида эътибор қозонган истеъодди адибларимиздан бири ИброҳимFaфурдир. Иброҳим ака—теран фикрли мунаққид, моҳир таржимон, чабдаст журналист, шоир ва жамоат арбоби. Мана, салкам қирқ йилдирки, адабиёт йўлида, демакки, маърифат ва маънавият йўлида ҳормай-тўлмай меҳнат қилиб келади. Салкам қирқ йилдирки, бу заковатли ва ориф инсон билан танишман, унинг сўзини тинглайман, оғир-вазмин, майнин, аммо журъатли, хасталикка бегона, ўқтам овозини эшишиб келаман. Бундан қувонаман ва қалбимга мадад оламан.

Бу овоз Иброҳим Faфурнинг адабий-танқидий мақолалари, бадиалари, публицистикаси ва ҳатто таржималарида ҳам ҳукмрон. Аллоҳ таоло бу инсонга алоҳида завқ ва идрок ато этган. Бизда ҳеч бир танқидчи шеърий асарни Иброҳим Faфурдек қиёмига етказиб таҳлил қилган эмас. У ҳеч қачон асар муаллифига ақл ўргатиб, ҳукмфармонлик этмаган. Аксинча, у шеърни гўзал санъат асари деб, санъат қонунияти асосида ўрганар экан, муаллиф билан шеърият ҳақида суҳбат қуради ва шу орқали китобхоннинг ҳам дил торларини созлаб, гўзалликдан баҳра олишга ундайди. Шунда асарнинг ютуғи ҳам, камчилиги ҳам намоён бўлиб бораверади. Мунаққид янги истеъодларни кашф этар экан, ўзининг ҳам шавқ-завқи тошиб кетади. Зотан, Иброҳим Faфурнинг ҳар бир мақоласи — яхлит бир бадий асар, шоирона дил изҳори. Айни вақтда, унинг мақолалари бе-

дор ва бозовта руҳнинг, фалсафий мушоҳадалар, тоза фикрларнинг меваси ҳам. Мунаққиднинг бадний олами ва фикрий теранлиги бир-бирига шу қадар омухталашиб кетадики, баъзан уни бадният файласуфи ёхуд фалсафанинг шонри дегингиз келади.

ИброҳимFaфур — жаҳон адабиётининг энг теран маъниоли, сарҳил намуналари мутолаасидан баҳратопган, шу руҳда тарбияланган адаб. У адабиётда инсоннинг дард-изтироблари, баҳтиёр онларни тўқис аске этишини, ҳикмат ва маънига тўлиқ асарлар кўпайишни хоҳлайди. Сохта, саёз, сўз санъатидан йироқ «ижтимоий ғоя ташувчи» асарларининг зарарини айтишга журъат топади.

Эҳтимол шунинг учундир, олтмишинчи ва етмишинчи йилларда адабиётимизга кириб келган шоирлар мунаққид Иброҳим Faфур назарига тушниши, унинг баҳосини олишин орзу қиласиди. Ва бежиз эмаски, мунаққиднинг аксар китоблари, чунопчи, «Гўзалликнинг олмос қирралари» (1963 йил), «Жозиба» (1970 йил), «Енар сўз», «Ям-яшил дарахт» (1976 йил), «Юрак — алана» (1980 йил) ўша даврда қўлига қалам олган ижодкорларнинг асарлари таҳлилига бағишлиланган. Бу китобларнинг номлари ҳам муаллифнинг нияти, адабиётдан кутган мақсадини кўрсатиб туради. Мунаққид Эркин Воҳидов, Абдулла Орнпов, Омон Матжон ижоди ҳақида меҳр билан жўшиб ёзади, уларга хос ички драматизмни, ҳалқ ва тарих тақдири, эрк-озодлик ғояларини таҳдил қиласиди, ҳаёт чорчўбасида эзилган инсонлар, бу чорчўбаларни синдириб, ёриб чиққан жасоратли одамлар тақдирини тадқиқ этади. 80-йилларда шеъриятимизда мұҳим мавзуга айланган «ҳалқ — инсон — тарих» муносабатини ilk бор Иброҳим Faфур тўғри талқин қилиб берди ва уни бадний тафаккур та-мойилига айлантирди.

У Зулфия, Саида Зуннунова, Миркарим Осим ҳақида фикр юритадими, қатағон йиллари жабрланган улуғ шоирларимиз Чўлпон ва Усмон Носир ҳақида ёзадими — ҳар бирига хос сўзни топиб айта олади, ҳали ҳеч қим эътибор қилмаган нозик жиҳатларга диққатимизни қаратади. Асарлар замиридаги жозибани ботиний ҳаяжон билан тафсир ва талқин этади. Иброҳим Faфурга хос зукколик фақат ўзбек адабиёти гўзалликларини кашф этишда эмас, балки жаҳон адабиётининг энг сара намуналарини таржима ва тарғиб этишда ҳам намоён

бўлди. «Таржима ва тарғиб» деб беҳуда таъкидлаётганим йўқ. Таржимонларнинг ҳаммаси ҳам мунаққид эмас, мунаққидлар ичida таржима билан шуғуллангани кам. Иброҳим Faфурда бу икки жиҳат уйғунлашиб кетган. У «Азизим» (Мопассан), «Жиноят ва жазо», «Телба», «Қиморбоз», (Фёдор Достоевский), «Чол ва денгиз», «Алвидо, қурол!» (Хемингуэй), «Қиёмат» (Чингиз Айтматов) романларини ва хорижий адиларнинг яна бир талай асарларини таржима қилди.

«Телба» романининг бош қаҳрамони князь Мишкин қалбida эзгуликининг бекиёс нури бор. Бу нур қабоҳат ва чиркинликларни ёриб, илохий олам шаффоғлигини акс эттириб туради. Иброҳим Faфурнинг қалбida ҳам ана шундай муборак нур балқиб туради ва уни мудом бедорликка ундейди, безовта қилади, ёвузликка, жаҳолатга қарши жангга чорлайди. Шу боис таржимон буюк адиларнинг асарларини ўзбек тилида қайта яратиш билангира кифояланмай, туркум мақолалар ёзиб, китобхонларимизни Данте, Хемингуэй, Гёте, Достоевский ижоди билан танишитирди.

Шу ўринда Иброҳим Faфурнинг ижодий фаолиятига хос яна бир жиҳат ҳақида тўхтамоқчиман. Бу — мунаққиднинг жаҳон адабиёти юксаклигидан туриб фикр юритиши. У айрим ижодкорлар ҳақида мақола ёзиб-гина қолмай, жаҳон адабиётининг тараққиёт йўллари, Шарқу Farб адабий алоқалари, ўзаро таъсир, типология масалалари хусусида ҳам кимматли фикрлар баён этди. Бу борада ҳассос адил сифатида ҳам, зукко олим мақомида ҳам намоён бўлди. Иброҳим Faфур қиёсий таҳлил воситасида, гарчи даҳо адиларнинг ҳар бири бир олам бўлса-да, уларни бирлаштириб турувчи жиҳатлар кўпроқ эканини таъкидлайди. Чунончи, ҳамма давр ва ҳамма ҳалкларнинг буюк адилари аввало иродали гуманист бўлганлар, улар илм-маърифатни — жаҳолатга, ростлик ва ҳақгўйликни — ёлронга, нурни — зулматга, меҳр-шафқатни — зўрликка қарши қўйганлар, инсонийликни улуглаганлар. Данте: «Билим — қалбимизнинг энг олий камолотидир ва энг юксак фароғат ҳам билимдандир», — деган. Иброҳим Faфур ушбу иқтибосни шархлаб бундай деган эди: «Данте гуманист сифатида инсоннинг маънавий камолотга эришувини асарларининг марказига қўяди — маънавий камолотга билим ҳамда жисмоний камолот билан эришмоқ мумкин, дейди». Худди шу ғояни Рӯдакий, Абу Аъло, Али-

шер Навоий, Гёте ижодида ҳам кўрамиз. Ҳар бир шоир буюқ бир маърифатпарвар, инсонларни зулм ва зулматдан огоҳ этувчи йўлбошчидир.

Иброҳим Faфур мана шу силсилада Алишер Навоий ижодини ҳам анча ўрганди. Навоийшуносликда кўп тадқиқотлар ёзилган, кўп фикрлар айтилган. Аммо Иброҳим Faфур бу борада ҳам ўз гапини айта олди. Кўп йиллар мобайнида Алишер Навоий ижодининг фалсафий асоси бўлган тасаввуф инкор қилиб келинган. «Ҳамса» достонлари синфиийлик нуқтаси назаридан таҳлил этилиб, ижтимоий ғоя сюжет-образ чизиги таҳлилидан нари ўтилмаган бир пайтда, Иброҳим Faфур, тасаввуф таълимотини маҳсус ўрганмаган бўлса-да, аммо савқи табиий амри билан Алишер Навоий ижодини шўро навоийшунослари йўлидан бориб тушуниб этиш мумкин эмаслигини исботлади. Олимшиг «Ўттиз йил изҳори» китобига кирган «Ишқ шиддатининг поғоналари», «Тафаккур ва ҳиссиятнинг олий нуқталари», «Дунё кезувчиларнинг доноликлари» каби мақолаларни шундан далолат. Шу таҳлит Иброҳим Faфур Алишер Навоий ижодининг мислсиз аҳамияти, қудратини хийла теран таҳлил этди ва сўфиёна талқинга ҳам яқишишиб борди.

Мунаққид илмий-танқидий асарларида фаол, курашchan инсон дунёсини намоён этишга интилиб келди, ўз-ўзини англаш ғоясини дадил тарғиб этди. «Инсон аввал ўзини, ўзлигини тугал англаб-тушуниб, билиб олиши керак. Ўзининг кимлиги, нималарга қодир эканини яхши тасаввур қила оладиган одамгина бошқалар қалбини, ички дунёсини тушунишп, ифодалаб бериши мумкин».—деб ёзган эди у киши мақолаларидан бирида. Назаримда, бу гап фақат таҳлил қилинган асарлар қаҳрамонларига эмас, Иброҳим Faфурнинг ўзига ҳам тааллуқлидай. Муаллиф бу сўзлар воситасида ўз эътиқоди, сажиясини ҳам баён этгандек. Зеро, Иброҳим Faфур ижодида ҳам, ҳаётий фаолиятида ҳам ўзлигини англаган ориф инсон сифатида миллат, элу юртини ҳам бедор этиб, ўзлигини билишга даъват қилиб келмоқда. Аслини олганда, адабнинг ижтимоий фаолиятини унинг ижодидан айри тасаввур қилиб бўлмайди. Чунки ижодининг ўзи ёзувчи учун зарур ижтимоий фаолиятдир. Фаол фикр, фаол сўз — буюқ куч.

Иброҳим Faфур адабиётга, сўзга ихлос қўйгани боис қалбида чин шоир уйғониб, ажойиб мансуралар ёза бошлади. Бу жанрни у ижод қилди. Бу жанр тифиз

Фикрларнинг қайноқ ҳиссиятлар билан уйғунлигини тақозо этади. Фожиалар, фараҳлар, тақдирларнинг ихам манзаралари — таъсирчан шеърий қиссачалар. Улар ҳақида маҳсус тадқиқот яратиш мумкин. Аммо шуниси аниқки, бу мансуралар шоирлик даъвосида ёзилган эмас. Улар — чинакам етук бадий асалар. «Илтижө китобидаги (mansurralar 1991 йилда шу ном билан китоб бўлиб чиққан) 42-мансурани эслга олайлик. У «Сония» деб номланади. Воқеа даҳшатли: Қизилтепада шом қоронгусида пахта теримидан қайтаётган еттинчи синф ўқувчилари — еттига қизни йўл устида «Камаз» уриб мажақлаб кетади. Бирортаси ҳам тирик қолмайди.

Етти қиз ялла айтиб улгурмай юртида,
Алла айтиб улгурмай юртида,
Боғлардан узиб чиқмай бир қизил олма,
Қирлардан термайин лола...
Отасининг сарвари,
Онасининг гавҳари,
Бир зумда, бир зумда, бир зумда,
Фойиб бўлди Қизилтепа йўлида.

Бу сатрларни ўқиб қалбингиз титраб кетади, инсонни бир ўйинчоққа айлантирган, пахта қурбони эттандарга нафратингиз ошади.

Тарихий мавзуларда ёзилган мансураларда ҳам бугунги ҳаётимизнинг мазмуни акс этган.

ИброҳимFaфуров нигоҳи ҳамиша истиқболга қартилган одам. У бугунги маънавий-мағкуравий жараённи таҳиъл этган мақола ва сұхбатларида ҳам истиқлол учун жон фидо қилган атоқли адилларимиз Фитрат, Чўлпон, У. Носир, Беҳбудийлар ҳақида ёзган мақолаларида ҳам буни исботлаб келмоқда. И. Faфуров жадид адабиёти, жадид матбуотини бугунги мустақиллик мағкураси нафаси билан тадқиқ этади, уларнинг улуғ иниятлари, орзу-армонларини ҳам, фожиа ва дардларини ҳам очиб беради. Миллий руҳ, миллат тақдирин учун қайғурган ва шу йўлда фаолият кўрсатган мард мутафаккирларимиз, улуғ адилларимиз хизматини баҳолаб, ҳозирги авлодга ибрат ва сабоқ бўладиган жиҳатларини очиб беради. И. Faфуровга хос хусусиятлардан бири — бу ҳеч ким айтольмаган гапни айтиш, янги фикр билан майдонга чиқиши ва буни ўқувчи қалбига етказа олишидир. Унинг қайси бир мақоласини ўқиманг, албатта бир олам таассурот оласиз, руҳингиз кўтарилади, фикрингизга фикр қўшилади.

Айтмоқчиманки, Иброҳим Faфур бугунги кунда миллий маънвиятимизнинг ёниқ сўзли вакилларидан бирiga айланган. «Миллий тикланиш» партияси раиси ва шу номли газетанинг бош муҳаррири сифатида дадил фаолият кўрсататётган экан, бу — халқининг дарди билан ҳамиша ёниб яшаб келаётгани, умрини шу эзгу мақсадга бағишлагани натижасидир.

Иброҳим Faфур ўзини истиқлолнинг фидойи аскари деб билади. Бугун олтмиш ёшга кириб, мўйсафид бўлиб қолганига қарамай, ўзини йигитлардай бардам сезмоқда ва ҳар қачонгидан ҳам самаралироқ меҳнат қилмоқда.

Биз сўзи, асарлари билан қалбларга маърифат нурини сочаётган Иброҳим Faфурга куч-қувват, бардамлик, мустаҳкам саломатлик тилаймиз.

Умрингиз узоқ бўлсин, Иброҳим aka!

Нажмиддин Комил

ОЗОД НАФАС

**Ҳикоялар
Мансуралар**

«Күм фаанзир»¹

«Муддассир» сураси, 2-оят.

«Мен бу дунёда бир дараҳт соясида от миниб кетаётган кишига ўхшайман. Тезда ўтиб кетаман, соя эса қолади».

Муҳаммад алайҳиссалом.

¹ Тур ва хабар бер

ГАЛА

Чўрилар ва ёш-ёш назира қизларнинг ғам-ташвишлари Хожам подшоҳимни қаритиб қўймоқда эди.

Тошканд юмушидан қайтган Машрабни Хожам подшоҳим ҳазин табассум билан қарши олдилар. Ва дарҳол бир неча жонлиқни бағишлаб хайр-худойи қилдилар.

Барча сўфилар жам бўлиб ва Машраб ўртада туриб катта зикр тушдилар. Сўнг подшоҳимнинг талаби билан Машраб қўлига танбур олиб жуда узоқ хониш қилди. Унинг ўқтам овози жами хонақоҳни, бутун ичкари-ю ташқарини ўз ҳукмига олди.

Подшоҳим Машраб қулларининг овозини ҳам, унини ашъорини ҳам ғоятда маъқул кўрар, лекин буни на қулнинг ўзига ва на атрофдаги ғайир сўфиларга, на ичкари чаманга билдирап эдилар. Лекин ўтган воқеалардан сўнг подшоҳим Машрабни бир зум қанотлари остида тутмоқчи эмас эдилар. Фақат кўпгина муридларнинг ва ичкиларнинг сўров-илтимослари райини қилиб, Машрабни ҳамон даргоҳдан бадарға қилмас эдилар. Лекин Машрабнинг бу ерда муқим юриши хавфли. Жойиз эрмас...

Подшоҳим Машрабнинг келишган, куч ва шавкат ёғилиб турган қадди-басти, ҳайбатдор яғрини, бўрки тагидан жингала бўлиб тошиб чиқкан қора ласдек қуюқ ялтираган соchlарига қараб, янада мунгайиброқ ўтирдилар.

Машрабнинг ўзини унугиб, кўзларини юмиб олганча куй чертиб айтиётгани газалларини юракларида майдек ёқиб эшитаркан, Хожам подшоҳимишинг қарори қатъий тусга кирди. «Девонани ортиқ бу ерда сақлаб бўлмагай. Эди унинг ғавғоси ва талабгори бисёр кўп бўлур. Эр етилди... Гарчи гарданига муҳrimизни босганимиз, лекин... барнибир... жўнатмоқ керак. Юмушлар кўп. Қилмаса бўлмас. Юрсин элларда. Мусулмончиликка даъват этсин. Барча ўзга юртлардаги муридларимиздан боҳабар бўлсин... Боз устига онасини ҳам кўриб келсин. Анча йиллар бўлди, ҳали кўрмаган, она

ризосини олмаган... Филҳол, тушимда ҳам аён бўлиб-дир...»

— Бўтам, эрта саҳар йўлга отланинг, Фарғона борурсиз... Айрим юмушларимиз бор... Наманганга ўтгайсиз... Нечукдир, тушларимда волидангиз сизни чорлайдур. Сизга неки лозим бўлса, сўфилар ҳозирлагайлар.

Машраб таъзим қилди ва қўлини қошларига теккизди.

Тоғ тизмалари бу ерда тугайди. Тўғрироғи, шарқи жанубга қараб тизмаларининг йўли бурилади. Ваҳший дара ичдан чиқиб келган киши ёввойи тоғлар тугаб, сарбаланд адирлар бошланганини сезмай қолади. Дара тугаб, ёлғизоёқ йўл бирдан юксак адир устига кўтарилади.

Бир-бирининг устига мингашиб кетган, ғойибий қудратнинг сирли ўйинлари ва ундан ҳам сирлироқ ижоди туфайли дунёга келган бу сарғиш, оқ, бўз тепаликлар шунчалар ҳувиллаб ётадики, одам ўзини бунда чумолидан ҳам кичкина ва ғариб сезади, вужудига англашилмас ваҳим оралайди.

Тоғларда юрганда, доим бирон товуши — ё сувнинг шалдираши, ё шаршаранинг гувиллаши, ё шабаданинг қояларга, арчаларга бош уриб шивирлаши албатта сизга ҳамроҳ бўлади. Товуш эшитилиб турганда, одам ўзини ёлғиз сезади.

Аммо манави сарғиш-кўқ дўнгликлар тепасига чиқиб бироз йўл босгандан кейин, негадир одам ўзини беҳад ёлғиз сезади.

Машраб шундай сарбаланд, ҳувиллаган кимсасиз тепаларни жуда севади.

Худо яратгаидан бери ҳеч ўзгармаган бу тепалар! Одамлар издиҳомлари кетган, келган, шовқинлаган, тинган, түғилган, йитган. Машраб Қашқарда ҳам кўпроқ вақтнин шундай кимсасиз сирли тепаларда ўтказар, ё йилқи боқар, ё ўтин терар, ё йўл босарди. Бундай ўзи ваҳимали, лекин бағри юмшоқ тепаликларда юриш қанчалар завқли. Үнғай. Оёқлар тепаларининг қумоқ тупрогида билшар-билинмас ботиб ажаб ҳузур олади. Ҳаво бу ерларда шунчалар енгил! Тоза, шакаррез. Үпканг дунё яралгандан бери ўзгариб бузилмаган ва ӯшандай мусаффолигигча турган ҳавога тўлиб кетади! Вужудинг дов ва ҳайрат тўлқинига отилади.

Бу тепалар устини доим бир майнн ел кезиб юради. У неча йилги сарнқ ўтларни оралаб, кўклам нафасини

ҳаммадан бурун сезиб иссиқ тепа бағридан сабза уриб келаётган майсаларнинг сочларини тараб янада муаттарроқ, янада майишироқ тортади. Бу тепалар ернинг онаси бўлса керак.

Қуёш ғарбга оғиб боради. Машраб одамлар турадиган манзилгоҳларгача ҳали камида ярим кун йўл босиш кераклигини билади. Лекин қуёш баланд тепаларга ёнбошладими, тезда кеч тушади. Ҳалидан адирларнинг нимтатири майсазорлари қизғимтири-қорамтири тусга кирди. Яна бироз йўл қатъ айламак мумкин. Бу ерларда қадимлардан қолган бир вайронна шаҳар бўлгучи. Харобага кун ботгунча етиб олади.

Бу тепаликларда тунлар ҳам йўл босмак роҳат. Ойчиқмаган кечаларда ҳам бу тепалар юлдузларнинг шуъла макони бўлади. Бунда юлдузлар тепада олмадай осилиб туради. Қўл узатсанг, гар ойга бўлмаса, Зуҳрага тегади. Боз устига азамат Пирмаст ҳам юк билан ҳолдан тойди.

Боз устига ярим кечада овулга кириб борсанг, овулнинг ваҳший итлари ўлгунча талайди. Эшакдай-эшакдай итларга ем бўлгунча кўхна ўзбекийлардан қолган ўша харобада тунаган юз бор афзал.

Жуда ҳам эски замонлардан қолган бу вайронада Машрабнинг энди тунавиши эмас. Илгарилар ҳам бу кимсасиз йўллардан ётганда ётиб қолган.

Бу шаҳардан пича олисда кунботарда ёввойи тўйайлар чўзилиб кетган. У ерларга кимса оёқ қўйган эмас.

Бу ўлкада ҳар қадамда бир хароба. Лекин ҳар қадамда бир жаннат ҳам бор. Харобалар ваҳший урушлардан ёдгор.

Машраб ҳудудсиз тепаликлар бошланган ерда нечукдир қурилган ва нечукдир вайрон бўлган бу мўъжаз шаҳарчани негадир ўзига яқин кўради. Ёлғизлик истаган ҳар ким харобани қўмсайди.

Ҳар жой-ҳар жойда одамга ҳар турли-ҳар турли ўй келади. Айни шу жойни кўрганда айни бир ўй келади хаёлга. Машраб бу ҳолни кўп кузатган. Ҳар бир жойнинг ўзига ярашур ўйи бор. Машраб йўлларда хароба манзилгоҳларга дуч келганди, негадир доим эл ва элбошилар ҳақида ўйлайди. Ҳудо одам боласига ер юзини жаннатмисол қилиб яратди. Лекин бу мислсиз жаннатда харобалар қайдан пайдо бўлди? Харобаларда одамзоднинг очкўзлиги, ваҳшийлиги, қонхўрлиги—шафқатсизлиги мужассам. Харобалар элбошиларнинг уқувсизли-

ги боис пайдо бўлади,— деб ишонади Машраб.— Уқувсиз элбошилар ўз элларини ҳам уқувсиз элга айлантирадилар. Бизнинг элбошилар эса фақат элни талаш, йўқса, бошқа элларни талашга ўргатиш учун элбоши бўладилар. Элни тўхтовсиз қирғинларга етаклайдилар. Элнинг асили, сара фарзандларини самарасиз жанггоҳларда бой берадилар. Марду майдонлар урушларда қирилиб кетаверади. Ҳайтда уларнинг ўриниларини номардлар эгаллаб олади. Мард кетиб номард кўпайганида, эл маккор бўлади. Маккорлар Тангримининг илоҳий марҳаматларини ҳам ўз манфаатлари учун мослаб тушунирадилар. Эл ичра номардларнинг кўпайниши хавфли тус олади. Элбошилар неча ўнлаб хотин оладилар. Наслни бузадилар. Неча ўнлаб хотиндан бўлган болафлар ўта майдалашиб, заифлашиб, бачканалашиб кетадилар. Шоҳларнинг ушбу майдалашган хонадонларига қараб эл ҳам майдалашади. У яшаш учун жуда жўн таомиллар яратади. Нурсиз турмушни энг нурли турмуш деб билади. Ортигини тасаввурга ҳам келтирмайди.

Ахир, эй элдошларим, Худо дунёни маърифатхона қилиб сизга бермадими? Ҳайвон каби еб-ичманлар, менинг маърифатхонамни жаннат қилиб ўтиринглар, демадими! Ер юзидағи, коинотдаги жами-жами нарсаларни одам боласи учун маърифат қилиб яратмадими? Бу муборак сув, бу муборак ҳаво, бу муборак тупроқ ва бу муборак ўт — энг олий илм, энг олий маърифат эмасми?

— Раббано, маърифатингдан доим огоҳ эт!—деб бирдан қичқириб юборди. Машраб ўз ўйларидан қаттиқ мутаассир бўлган ҳолда.

У энди хароба шаҳар остонасида турарди.

Машраб бу ҳайқиригини қуёши ботган, лекин унинг яллиғлари бутун ғарб уфқини қоплаган осмонга қараб бир неча бор такрорлади.

Машрабнинг ўткир, теран овози хароба шаҳарнинг гариб қўнқайган деворлари, йўқолиб, тупроқ билан тўлиб бораётган кўчалари аро тириклика чақиргандай янгради. Машрабнинг овози харобалар оралаб сўнг ўзига тўлқин-тўлқин бўлиб қайтди.

Машраб шаҳар пойига тиз чўкди. Чўнг муножотга берилди. Сўнг баланд ун билан «Вал-лайл»ни тиловат қилди. Муборак калима тиловати савобини харобадан ўтганларга бағишилади.

Баланд бир девор қолдиғи устига чиқиб атроф-тева-

ракка разм солди. У ўзини гүё дунё харобаси ўртасида тургандай ҳис қилди.

Хароб ичра турур бир хароб,
Танимас ул харобни бул хароб...

«Лекин, қаранг, кўклам бўз отини чоптириб кела-
дур. От туёғи теккан ерлардан бойчечаклар чиқадур...»
— Машраб шарқдан эсган шом елиниң саринлигини
бутун вужудида туйди. Эти жимиirlашиди. Аста настга
тушди.

Хароба шаҳарнинг бир кунжагида Пирмаст ёққан
ўтнинг алансаси бузук деворларга сирли сарғиш ёғду
ташлади. Ерда андак чуқурча ясаб шу чуқур устида
гулхан ёққан Пирмастнинг ҳаракатлари деворларга
сирли кўланкалар ёяр эди. Пирмаст гулхан ёнида тош-
лардан кичик ўчоқ қурди. Декча қозон осди. Козонга
бир бўлак лаҳм гўшт ташлади.

Пирмастнинг асиш ота-онаси Бухородан бўлиб, ҳаво-
си енгилроқ бўлгани учун Наманганга кўчиб келган,
лекин дардлари аримай сил марази билан эрта олам-
дан ўтган. Пирмаст кимсасиз етим қолган эди. У ўн
яшар ҷоғидан Машрабнинг кетидан қолмайди. Мана,
йигит ёшига етди. Машрабни ўзига пир деб билади.
Унга сидқидилдан сифинади. Машрабнинг барча киши-
лик юмушларини ўз ихтиёри билан уҳдасига олган.
Машрабга соядек эргашади ва барча ишларни ҳудди
соядек ғашга тегмай ва билинтирмай адо этади. Маш-
раб унга хат-савод ўргатган. Ҳудди устози каби жуда чи-
ройли хат билан битади. Шеърлар машқ этади. Лекин
кўпроқ Машраб хониш қилган ҷоғларда ёқимли, бироз
хириллаган овози билан унга жўр бўлади. Пирмаст-
нинг хотираси шу қадар кучлики, пир оғзидан нима
чиқса, шу заҳоти хотирасида муҳрланиб қолади. Маш-
раб қаерда нима деган бўлса, қандай байту ғазал тў-
қиган ва айтган бўлса, ҳаммасини бир сўзида хато қил-
май айтиб беради. Пирмаст устози ғазалларини қофоз
дафтарларга, юпқа оғоч лавҳаларга кўчириб ёнида сақ-
лаб юради.

Гулхан алансасига аллақайлардан капалаклар ва
кўклам қўнғизлари учиб келишди. Машраб гала-гала
бўлиб учиб келиб ўзини алангага ураётган капалак-
ларга қараб:

— Мана, ҳақиқий ошиқлар,— деб қўйди.

— Улар фақат ўт ва гулга ошиқ бўладилар,— де-

ди Пирмаст декчада қайнаётган гүштни қўлидаги калта чўп билан ағдариб.

— Капалаклар гулни ҳам ўт деб биладилар, — деди Машраб. — Капалак Сулаймонга арз қилганини эшиг-ганимисан, Пир?

— Айтиб беринг-чи, ҳазратим...

— Қадим сўфийлар, Худо раҳмат қилғай уларни, ҳикоя қилинб кетганлар. Сулаймоннинг кўшкида бир капалак маъшуқасини қучоқламоқчи бўлибди. Лекин маъшуқаси қаршилик қилибди. «Менга йўқ дейишга қандай ҳаддинг сиғди? Мен агар хоҳласам, Сулаймоннинг бутун саройини остин-устун қилиб ташлайман!» — деб маъшуқасига дўқ урибди. Сулаймон буни эшитиб қолиб, уни чақириб сўрабди: «Нега ундай дединг?» Капалак жавоб берибди: «Ё набиуolloҳ! Ошиқнинг сўзлари учун айблаб бўладими?» Шунда Сулаймон ҳазратлари: «Сен ҳақсан», — деган эканлар. Ошиқ элининг дағдағаси шунчалар зўр, эй Пир. Қараб тур-чи, балки бу капалаклар ҳам ер тепиниб сенга арзга сўз айтларлар...

Пирмаст товуш чиқармай кулди. У атрофдан йигиб келган чўп-хашакларни кафтида тутамлаб синдириб эҳтиётлик билан гулханга қалаб ўтиради. Машраб чўп-хашакларнинг ўтга тушиб буралиб-буралиб ёнишини кузатаркан, омончилик доим беомонлик ҳисобига яшашини ўйларди. Дараҳтнинг умри тугаса ўтин бўлади. Лекин дараҳт умри шу билангина тугамайди. Дараҳт ўтин бўлгач, ўт бўлишини кутади. Узбеклар «ўтин» деб хўп топиб айтганлар. «Ўтин» — ўт-оловга айланувчи дегани. Лекин ўтнинг ўт қайдан бино бўлди? Қароматингдан ўргилайин-о... дараҳт неча йил ўсиб шу ўтни ўз танасида йигиб борган. Оловга айланмоқ учун ҳозирлик кўрган... Ҳар қайда тириклик бор, у доим уч алангага айланади. Аввалгиси кўк аланга. Бу сенинг шавкат ва қудратга етишган чоғларинг. Қейингиси сариқ аланга. Бу сенинг мункайиб шавкат ва қудратдан айрилган лайтинг. Учинчиси бўз аланга. Бу шамол ҳокингни кўкка ва ерга совуришидир. Бу қисмат. Қисматинг юлдузларнинг саодатли шуъларига йўғрилган бўлса, уч аланга ҳам сенга мұяссар бўлгай. Қисматинг талх эса, аланганг биттадир. Но-ком ўтажаксан. Одам ўлдирганлар ҳар қачон Худонинг қаҳридадир. Одам ўлдирганларнинг насллари ҳам ўз алангаларини йўқотганлар. Улар доим аччиқ дуд ичинда бузғаниб тириклик қиладилар. Уларнинг манг-

лайларига күрінмас тавқи лаънат Мұҳри босилғандыр.

Бирдан Машрабнинг хаёлига даҳшатли бир фикр келди. Йўқ, деб у ўринидан туриб кетди, менинг абааждодларим, ҳеч қачон одам ўлдирмаганлар! Агар бирон кимса уругимдан одам ўлдирган бўлса, мана, мен ҳам аччиқ тутунга айланурман! Ҳаҳ-ҳа! Аччиқ тутун! Ҳаҳ-ҳа! Қани, ё Аллоҳу Акбар!

Машраб шундай нидо қилди. Шаҳд билан кигиз чопонини ечиб иргитди. Қўй терисидан жуни ичкарига қилиб тикилган иштонини тиззасидан юқори кўтарди ва ўнг оёғини гуриллаб ёнаётган оловнинг ўртасига қўйди.

Ҳазратнинг кутилмаган қилиқларига одатланиб қолган Пирмаст бундан анг-танг бўлди. У ҳам ўринидан туриб кетди. Гулхан ўртасида Машрабнинг оёқлари оппоқ оқариб кўринди. Пирмаст ҳали ҳазратнинг олов устида юрганилигини кўрмаган-эди.

— Ҳазратим, нима қиляпсиз ўзи? Қўйинг!

У Машрабнинг юзига қаради. У сокин, осуда эди. Фақат баланд оқ манглайидан дўлдай-дўлдай тер қуюлиб оқарди.

Машраб почаси куя бошлагачгина оёғини оловдан тортиди.

Пирмаст чўккалаб ўтириб, ҳиқиллаб пирнинг ўтдан чиққан оёғини силаб, тўнининг этаги билан аста арта бошлади. Оёқ ҳеч ўт ичидан чиққанга ўхшамасди. У на қизарган, на куйган, на пуфакланган эди. Фақат ёрилиб кетган ерларига оқ кул ўрнашиб қолган.

Пирмастнинг кафтлари ҳазратнинг оёғи ичиди аллақандай ғайри-табиий ҳарорат яшириниб ётганлигини сезди.

У ёқасига туфлаб қўйди.

Пир зикр-самога берилди.

Олов уни маст қилиб қўйганга ўхшарди.

Пирмаст орқароқقا ўтди ва у ҳам зикр-само туша бошлади. У баайни устознинг ҳаракатлари ва калималарини ҳеч ўзгартирмай такрорлар эди.

Зикрдан сўнг Машраб гулхан четида бошини икки тиззаси орасига солинтириб узоқ сукутга кетди.

Бу орада Пирмаст Машрабга ва ўзига ёнма-ён икки мўъжаз чодирча қурди. Сўнг икков қайноқ шўрвани заранг товоқقا тўлдириб иссиқ-иссиқ ичдилар. Пирмаст гулхандан сал нарида пинакка кетган Барфоқقا бир бўлак лаҳм ташлади.

Машраб иссиқ шўрвадан сўнг бадани қизиб анчагача ҳароба шаҳар ва унинг атрофларини кезиб юрди.

Гарчи тун ойсиз эди, лекин юксакларда бағоят йирик юлдузлар порлар, уларнинг шуълалари аксиданми ёки баланд тепаликларда ўзи шундай бўладими, қоронгулик унчалар билинмас, ҳамма нарса кул ранг қорамтири тусга кирган, кўзга равшаң илғанарлик эди.

«Мен ўтда куймайман, сувда чўкмайман,— деб ўзи билан ўзи сўзлашарди Машраб.— Менинг боболарим одамкушлик қилмаганлар. Мен Худонинг девонасиман. Увайс пиrim азиз Мансури Халлождек балки... балки, о! — бу не баҳт бўлурди! — дорда ҳалок бўлурман. Балки... балки Ҳожам подшоҳим ҳақдирлар. Нечунки изтироб ила бу гапни икки бор такрорлаб айттилар. Бир гал айттиларким... аё сўфилар, билингизларким, Машрабдин Мансурнинг иси келадур. Яна бир гал ўз қулогимга дедиларким, эй, бўтам Машраб, сени Балхда Мансур каби дорга тортурлар. Балки... балки пиrimниг бу башоратлари бежиз эмасдир. Ҳайй-ҳейй, кўнглим не ўсмирик чөвларидан ул муборак зот — Мансур ишиқида ёнади. Кўнглим Мансур қисматини орзу қилади. Ҳавасларимни балки... балки пиrim Ҳожам подшоҳим каромат назари била уқиб олгандирлар. Мен ўтда ёнмагайман,— деб яна қайтарди Машраб. Унга тилига манзур сўзларни савқи табиий билан такрорлаш теран одат тусига кирган эди.— Сулук дерлар. Менинг сулуким — ўз йўлим борми? Ё факат эргашувчилярдан бўламаними? Барча дардманлар йўли—менинг йўлим. Барча эзилганларнинг йўллари — менинг йўлларим. Ўтда ёққайлар мени. Дорга тортгайлар мени, Ҳалойиқлар севиб-севиб маломат қилгайлар. Севиб-севиб тошбўронга соглайлар...

Машрабнинг тарам-тарам ёрилиб кетган оёқларига харобанинг намхуш ва салқин тупроғи малҳамдай ёқар, товонлари қандайдир этини жунжиктириб жимиirlарди. Утнинг мастилиги ҳамон тарқамаган эди. Тили ўз-ӯзидан яна зикрга машғул бўлди. У илоҳий исмларни ажаб қироат қилганча бориб ўз чодирига чўзилди. Устига юпқа намат кўрпани тортиди. Тили зикрдан тўхтамай шу асно кўзи уйқуга кетди. Машраб ёстиққа бош қўйган ҳамон ухларди. У руҳини ўз измига бўйсундирганди.

Пирмасст гўдакдай осуда уйқуга чўмган пириниг нафас олишига бир зум қулоқ солиб турди, сўнг хотиржам ўз чодирига чўзилди.

Кўзи уйқуга илинаркан, уустозининг узунчоқ оқоёқларини чодирдан ташқари чиқарпб ётгани ва бу қишини ёзин унга одат бўлиб кетгани ҳақида ўйлади. Сўнг недандир хавфсираб ўрнидан яна турди. Келиб устоз оёғи сари энкайди. Устозиниг оёқлари охири кўрнімайдиган тош-шагал йўлларда иссиқдан, совуқдан тарс-тарс ёрилиб кетар, лекин ажабки, ҳеч қачон кир бўлмасди. Унинг оёқ бармоқлари ҳам худди қўлларни каби узун-узун ва оппоқ эди. Тирноқлари ойнадек йилтиради. Машраб шоҳнинг оёқларига ҳеч губор юқмасди. Пирмаст пир оёқларини силамоқчи бўлиб қўлини чўэди ва шу заҳоти тортиб олди...

Пирмаст гулханинг яллиғланиб турган чўгларини ўртага эҳтиёт билан сурди-да, устига япасқироқ бир тошни бостиради. Барфоқ унинг оёғига келиб суркалди. Пирмаст Барфоқнинг бошини силади. Сўнг ухлагани ётди.

Барфоқ атрофга сергак қулоқ солди. «Бу ерлардан шернинг иси келади. Шернинг йўли тушган бу харобадан...» — ўйлади Барфоқ. У олис тўқайлардан адир шамоли келтирган хабарларни ўзинча шундай талқин қилди. Яна тинглади. Чодирлар атрофини узоқ кетмай айланиб юрди.

Тун ярим кечадан хийлагина оғганда Барфоқ тўсатдан қаттиқ вовуллади. Сўнг узоқ чўзилмай галати ҳурди, гулдиради, ғингшиди ва ингиллаганча ёмон қўрқиб ўзини Пирмастнинг чодирни тагига урди. Ер тимдалаб чодирга биқиб кирди.

Кунботардаги овлоқ тўқайдан ҳайбатли ва жуда узун шер чиқиб келди. Хароба шаҳар унинг мулклари қаторига кирап, бу ерда у гулча, кийикларни тутиб келиб ер, сўнг шаҳардан пастда улкан қоя тагидан буралиб чиқадиган булоқ сувидан ичарди.

Шер шарпасиз келиб чодирлар ва унинг атрофларини искади.

Машрабнинг чодирдан ташқарига чиқиб ётган оппоқ оёғига дуч келди. Оёқни бир қарич наридан туриб искади. Сўнг бошини чодир томонга кўтариб силкиниб қўйди.

Шер сўнг оҳиста бу оёқларни ялай бошлади. Бир оёқни ялаб бўлгач, иккинчи оёқни обдан ялади. Унинг катта гўштдор тилидан сўлак оқмас эди.

Машраб эса онасини туш кўриб ётарди. Онаси қўй думбасини эритиб, унинг ёрилиб кетган оёқларига суркар, мой иссиқ ёқарди. Онаси оёқларини мой суртиб

сийпаларкан, Машрабнинг қитиғи келар, кулар, бутун баданига аллақандай фароғат жимирлаб ёйиларди. Сўнг у оёғини қитиққа чидолмай тортиб олди.

Шер яланғоч бёқлар чодир ичра ғойиб бўлгач, андаккина исказиб турди-да, сўнг ҳайбатли бошини баланд кўтариб кунботар сари ғойиб бўлди.

Шернинг келгани, кетганини ёлгиз Барфоқ билди. У эртасига анчагача маъюс бўлиб думини солинтириб юрди. Барфоқ шернинг юрган-турган жойларини искағ ва ўзидан ўзи ингичка товуш чиқариб ингранар эди. Машраб ҳам, Пирмаст ҳам бу ақлли, вафодор итнинг ғалати қилиқларини эрталаб ажабланиб кузатдилар. Пирмаст итнинг ўсиқ ҳурпайган жунларини силаб, эркалаб тинчитди. Бу итни уларга кучуклигида бир мардмайдон уйғур тарончи берган. Машраб ва Пирмаст бир кеча унинг улуғ боғида Ерканд бўсағасида тунаған эдилар.

Тонг азонда Пирмаст кунгай тепалардан икки даста тароватли бойчечакларни териб келди. Сўнг сув қайнатиб чават нон билан ионушта қилдилар. Сувга туршак юмшатиб едилар. Машраб бобо кўлвори тагини кавлаб иккита сап-сариқ товланган олма чиқарди. Бирини Пирмастга берди. Бирини каренллатиб ўзи еди.

Пирмаст чодирларни йиғиштириди. Ҳаммасини ихчам қилиб боғлаб елкасига олди.

Ҳали кун чиқмаган эди. Пирмаст иккала даста бойчечакларни Машрабнинг белбоғига икки белидан қистириди.

Барфоқ йўл гаштини сезиб югургилаб олдинга тушкиди. У яна думини хода қилганча олдинда лўкиллаб борди.

Машраб ўзини қушдан ҳам енгил сезар, оёқлари худди учиб кетадигандай эди. У бўйнидан ҳам узун йўғон таёгини юмшоқ тепалар тупроғига ботириб борар, назарнда ўзини туни бўйи гаройиб бир нарсага дуч келган ва у гаройиб нарса билан мулоқот қилгандай туярди.

Машрабнинг жисми шу тобда худди оқ мумдай юшаган эди. Лекин бу шундай юмшоқлик эдикни, уни эгиб бўлмас, букиб бўлмас, синдириб бўлмас, таслим этиб бўлмасди.

Унинг жисми ёлгиз маърифат эгасининг ишқи ва ҳукмигагина таслим ва тебе эди. Шу билан бирга, бу жафодийда фақат эзилганларнинг қошидагина эгилар, уларнинг дардларини муқаддас санаради.

Ташқаридан қараган одамга Машраб анча ҳайбатли бўлиб кўринарди. Лекин унинг жуссаси пардай енгил эди. У ҳафталаб, ўн кунлаб емай-ичмай ва бундан сира ҳам қийналмай бемалол юра олар, куч-қувватини ҳам йўқотмасди.

Рост унинг жазаваси тез эди. Хожам ҳам киши билмас шу жазавадан ҳайнқарди.

Кунботар чоги, кун тиккага келган чоги уни тўхтосиз титроқ тутар, жиёми худди камончанинг торидай қалтирас ва шунда унинг буюк изтироб онлари бошланарди.

Фақат Худога аён: шунда унинг юраги мусиқага, англаб бўлмас оҳангларга тўлиб кетарди. Бу мусиқани ҳеч қаерга сиғдириб бўлмас, унинг лаззати ва азобига чидаб ҳам бўлмасди. Машраб шунда телба бўлиши даржасига етар ва шунда ўзи билмаган ҳолда зикр туша бошлар, зикр унинг ҳолини ўзгартирас, зикр уни қутқарар эди. Зикру само ҷоғидаги ҳайбатли унлар унинг ҳаракатларига ажиб уйғунлик ва гўзаллик бағишилар, титроқлар, жазавалар бари, мусиқалар бари муҳаббатга, муҳаббат эса дардга айланарди.

Бу муҳаббат ҳирсадан пок эди.

Бу муҳаббат тамомила шавқ эди.

Машраб сўзларни доим ғалати бир оҳангга солиб айтар, байтлар туғилса, фақат мусиқа ичра туғиларди.

Олдин мусиқа туғилар, сўнг сўзлар уларга эргашарди.

Машраб ҳеч қафон ташибур ва найни ёнидан қўймасди. Ўзи уларга маҳсус ғилофлар ясаган. Бу ғилофлар уларни йўлларнинг турли ногаҳон хатарларидан аспарди.

Машрабнинг тия қурсогидан ишланган эски ва жуда катта кўлбари бўларди. Кўлбарда унинг ҳаёти учун керак барча нарсалар жо эди. Кўлбарда чарм муқовали Қуръони каримдан тортиб Ҳожа Ҳофиз ва Чордевонгача бор эди. Довот-қаламлар, ўткир ингичка поки, оғоч лавҳлар, қалин дафтарлар ҳам кўлбарда сақланарди.

Улар кун тиккага келгунча бир зайлда тўхтамай йўл босдилар. Улуғ адирлар ҳамон тугамас, лекин энди тепалар бир миқдор пасая борар, тепалар узра текис яйловлар учради. Кейин чап томонларида тепалар оралаб қуюқ қамишзорлар ва бутазорлар билан ўралган кўллар кўринди. Улар кенгайиб-кенгайиб кат-

та қамиш босған күлгө айланади. Шу күл ёқасида тепа-
лик бағрида атрофи пастроқ девор билан ұралған қадим
овул бор.

Хали овулгача бироз юришлари керак. Күлларга
аллақачон үрдаклар учиб келған, улар гала-гала бўлиб
кўк осмонда шувиллаб худди одамнинг боши тепасидан
учардилар.

Бир пайт кўл ёқасидаги қамишзордан бир қанча
қора-қура, иштончанг паст-баланд болалар югуриб чи-
қнишди. Улардан бирни қўлидаги тутиб олган ола үр-
дакни силкитар, бошқалари үрдакни қизиқиб томоша
қилишар, қўллари билан ушлашмоқчи бўлишарди.

Шунда болалардан бирни тепадаги ёлғизоёқ йўлдан
үтиб бораётган ғалати кийинчан икки одамни қўли
билан кўрсатди. Болалар бу юртларда дарвешлар, қа-
ландарлар, масхараబозлар, фолбинларга ўч бўлади-
лар. Уларнинг гаройиб кийим-бошлари, хатти-ҳара-
катлари, қўшиқ-томушаларини маза қилиб кўрадилар.
Ҳозир ҳам болалар үрдакни эсларидан чиқариб йўлов-
чиларга ағрайиб қолдилар. Үрдак кўтарган бола ше-
рикларига алланима деди.

— Ядачи! Ядачи! — деб қичқиришди болалар. Ай-
римлари тепага чопмоқчи бўлишди. Үрдак кўтарган
бога уларни кўл бўйлаб овул томон бошлади.

— Ядачи! Ядачи! — болаларнинг қичқириқлари ҳа-
вони тутди.

Машраб то овулга етиб боргунча бутун овулнинг
эркагу аёли тўпланиб йўл бўйига чиқкан, ҳаммалари
бир-бирларига Машрабни кўрсатиб: «Ядачи! Ядачи!»—
дер эдилар.

Машраб оломонга салом бериб ҳам улгурмади.

Гала бирдан унга ташланди.

Машрабни ерга қулатдилар. Ким тепди. Ким мушт
туширди. Ким таёқ билан урди.

— Номардлар! Номардлар! Нима қиляпсанлар! Қоч-
ларнинг, э онасини эмганлар! — деб қичқиради Маш-
раб ерда ётганча боши ва тамбуруни зарбалардан
авайлаб.

Бу срларда қулайини топсалар, қасосларини бир
зумда амалга оширадилар. Ҳеч нарсани суриштириб
ўтирмайдилар. Галага ҳеч нарсани тушунтириб бўл-
майди. Гала то эсини йигунча селдай ҳаммаёқини вай-
рон қилиб ташлайди.

Машраб қаршилик кўрсатмади. Унинг қўл-оғини
боғлаб қаршидаги яроқ оқ тепага олиб чиқдилар. Чা-

маси бу уларнинг кўпкари ўтказадиган майдонлари эди. Машрабни бир чеккага қолдириб, ҳаммалари пастдаги қамишзорга югурдилар. Бироздан сўнг улар қуҷоқ-қуҷоқ қамиш кўтариб келиб майдон ўртасига хирмон килиб уя бошладилар.

«Булар ядачи деб мени ёкишмоқчи шекилли», маъюс тортиб ўйлади Машраб. У кўзи билан Пирмастни ахтарди. Пирмастни хўв нарида уч-тўрт йигит-яланг елкасидан босиб турар эдилар. Пирмаст чўкка тушганча ерда ёнбошлаб ётган устозига мўлтайнб қарап, дамбадам юлқинар, йигитлар қўлидан чиқмоқчи бўлар, лекин улар кўпчилик бўлишиб уни ерга босишаарди.

— Ҳазратимга тегманлар! У ядачи эмас! Ядачи эмас! Авлиё! Авлиё! Дарвеш! Қаландар! Тегманлар мажҳуллар! — деб айюҳаниос соларди Пирмаст. Унинг тархи кичикроқ қорамағиз чеҳраси шиниб кетганга ўхшарди. У ҳам Машрабни ёқмоқчи бўлишаётганини тушунган эди.

«Буларга алвости нима, ядачи фолбин нима, барийир. Ядачилардан тоза безган ўхшайди бечоралар. Бошлирига кулфат тушмаса, бундай қутурмасди бу шўрликлар. Ҳойнаҳой ядачи келса, ўлдирамиз! — деб аҳд килган булар! — деб ўйлади Машраб ётган жойида. — Алвостини ёкиб юборсалар, ҳовурлари босилади. Аламларидан тушадилар. Бироқ алвостининг ўрнига мени ёкиб юборсалар, тоза кулги бўламан-да жаҳонта. Ҳолбуки, ёнмоқка менинг фурсатим етмаган ҳали. Алҳазар! Алҳазар!»

Оломон эса ўз ишига берилган. Жазога шавк билан шовқин-сурон солиб тайёргарлик кўради. Юзида бурни йўқ, бетининг ўртаси ичига чўккан, сочи ўсган, оқ тумоқ кийган бир одам галага бошчилик қиласиди.

Кўз очиб юмгунча қамишдан улкан хирмон ясадилар. Қамиш ўртасига йўғон хода қоқдилар. Сўнг кийчув қилиб Машрабни қамиш хирмон сари судраб бордилар.

Икки киши Машрабнинг икки оёғидан кўтарди. Иккиси қўлтиғидан олди. Яна иккитаси қамиш устига чиқди. Оломон қамиш хирмонни ўраб олди. Дамбадам:

— Қий-йува! — деб қичқиришга тушди.

Тўртовлон шу қийқириқлар остида Машрабни силкитиб аллала қилиб тепага отдишлар. Тепадагилар тутқунни тутиб қамиш устига бостишлар. Сўнг ўрнидан

турғизиб белидан ёғоч ходага боғладилар. Ишларини битиргач, ўзларини тап-тап ерга ташладилар.

— Номардлар! Аҳ, номардлар! — қичқирди Машраб. Пирмасст пастда алланарсалар деб дод-вой солар, лекин унинг овози оломоннинг шовқинида кўмилиб кетарди.

Ниҳоят, овулдан қўрада чўғ келтирдилар ва қамишиниг тўрт томонидан тўрт киши пуфлаб ўт олдира бошлидилар.

Гала тўхтамай қий-қийларди.

Машрабнинг қулоғи битди.

Қўл-оёғини шошилинчда боғлаб улгурмаган эдилар. У аста қаддини ростлади. Ходага ҳам белидан бўштоброқ бойлаганларини сезди. Танбури ва кўлбари ҳамон бўйнида, бутун эди. У қўйинини пайпаслади. Қўшнай ҳам жойида эди.

Қамиш хирмоннинг тўрт ёғидан пуф-пуфлаган овозлар эшитилади. Аста кўкимтири оқ тутун чиқди. Қий-қий овози авжга минди.

Лекин қамиш ҳеч аланга олмас, оломон тоқатсизланади бошлидилар. Ут пуфлаётганларга ёрдамга шошилдилар. Аллакимлар овулдан қўрада яна ўт келтирдилар. Кўплашиб пуфладилар. Ниҳоят, чўғ атрофида заифги на аланга кўриди. Аланга қамишининг уч-тўрт баргини ялаб ёнгандай бўлди-ю, яна ўчди. Кўкимтири тутун қуюқлашди. Пуфловчиларнинг кўз-димоқлари ачишиб сўкинганлари эшитилди.

Пирмасст яллиғланган кўзларини устоздан узмас, қараган сайн қаландарлар шоҳига ҳайрати ортарди.

Машрабнинг манглайи, бўйни, юзидан тер дўл каби ёгарди. Пирмасстнинг кўзинга Машрабнинг атрофида ёмғир ёғаётгандек бўлиб туюлди. Тутунлар булутларга ўхшарди. Жануб осмонида қиялаб кўклам қуёши гулдай очилган эди. Машраб гул куёшга юзини тик тутар, тер шаршара бўлиб қуйиларди. Пирмасстнинг ақли бовар қилмасди: оз сб оз ичадиган бу ҳайбатдор зотда шунча тер қайдан келаяпти? Машрабнинг лабларидан маъюс табассум аримасди. У Пирмасста худди зикр тушаётгандек бўлиб кўринди.

Қий-қийлашган оломон ҳамон жунбушда. Лекин қамиш баҳор намини тортганиданми ё бошқа бир нима, сира ўт олмасди. Мовий тутун қуюқлашар, лекин алангадан дарак йўқ эди.

Овулнинг барча катта-кичик эрлари ўтга уннаб кўрдилар. Қамиш хирмон ёпмади. Бояги юзида бурни

йўқ одам сал бўлмаса қамиш тагига кириб кстай дерди. Қий-қий садоси сусайди.

Шунда Машраб ҳамон манглайидан дўл ёғганча қўшнайин ғилофидан чиқарди. «Оллоҳумма! Ҳув-ҳув оллоҳув! Оллоҳумма! Ҳув-ҳув оллоҳув!»—деганга ўхшаш жула ўткир бир садо чиқди Қўшнайдан.

Машраб найни обдан чаларди. Най чалиб авжга кўтарилигандан атрофда ким бўлса, барни ўрнидан туриб кетар ё ўйинга тушар ва ё ерга ётиб думаларди.

Гала най овози қайдани келаётганини дафъатан англамади. Ўт ёкучиларнинг ўпкалари шишиб, кўзлари кўк тутунга тўлиб, ўзларини ночор четга олдилар.

Адир шамоли тутунни хайдаб, оломон найни тутқун чалаётганини кўрдилар. Шовқин-сурон бирдан босилди. Жимлик чўкли. Адирлар ҳавосини пайниинг илохий саси зир титратарди. Тутун тарқади. Гала лол қотди. У ер-бу ерда кўнгли бўш аёлларнинг пиқирлагани эшилди. Кимлардир ҳўнграб йиглади.

Еш навпаста қизлар най овозига чидолмай нари қочдилар. Эркаклар ҳам ерга чўқкалаб ўтириб қолдилар. Негадир галада ҳамма бир-бирларини қучишган, аллақандай ғайри-фавқулодда тебранишар эдилар.

Кора кимхоб камзул кийган пастгина бўйли бир аёл гала ичидан чиқди-да, оқ рўмолини ҳавода ёйиб, қамиш хирмонга якилашди.

— Ҳов, бечора Қўмойим-ов! Тус! Тус!—деди. Шунда иккι дов йигит оломон ичидан чиқиб қамиш хирмонни у томондан бу томонга отдишар.

Ягоқ тепани йиги овози тутди.

Машрабни қўлтиғидан кўтариб олдилар.

Кандайдир курси пайдо бўлди.

Кайдандир чўғдай гиламларни кўтариб келиб Машраб оёғи остига ташладилар. Машрабни курсига суюб ўтқаздилар.

Кейин Машрабнинг оёғи остида ўн уч улоқ ва бир түя сўйдилар.

Еш-қари Машрабни қуршаб, унга юкунгандай бўларди.

— Хато қилдик! Кечир! — дердилар.

— Хато қилдик!

— Хато қилдик!

Улар Машрабнинг фақиру қаландару гадо эканлигини энди англаган, ўз хатоларини тузатиш учун ҳозир ҳар қандай ишга тайёр эдилар.

Машраб галанинг талваса ва пушаймонда қоврилаёт-

ганлигини кўриб ачинди. «Бу элнинг манглайидан энди ҳеч қачон пушаймон тағаси кетмагай. Замонлар ўтиб ҳам, баҳтиёр яшаган кезларда-да улар барибир пушаймонда бўлғусидирлар. Яхшиликларига мудом пушаймон омухта бўлур...»

Машраб то кун ғарб уфқига оғгунча танбур чертиб қўшиқ айтди. Қўшиқ айтаркан, кўз ўнгидан онасининг интизор гўзал сиймоси нари кетмади. «Балки мени онаизорим қутқаргандир бу дўзах азобидан. Онажоним, азиз чехрангизни қачон кўргайман ахир? Мунча узоқ сизни зиёрат йўли?»—фарёд кўтарди Машраб.

Гала ҳар қанча уринмасин, тақдирда ёзилгани бўлади.

Қолаверса, Шер ҳар кимнинг ҳам пойини ялаган эмас.

ОНА ДАРГОҲИДА (АЛИФ)

Улар аср вақти Наманганга кириб келдилар. Бобораҳим етти ҳамроҳини бозор бетидаги такягоҳда қолдирив, ўзи эшикка қараб кетди. Барфоқ унга эргашди. Наврўз киришига ҳали бирон ҳафта бор. Наманган қорга буркангандай бошдан охир оппоқ ўрик гулига бурканиб ётарди. Ҳаво одамии маст қиласиган атиришига тўла эди.

Бобораҳим ҳуши оғганча тор кўчалардан ўтиб борар, қири адирлар, чўлу биёбонлар, тог-тошлардан ошиб келган одамга сомон сувоқ билан текис ва ораста пардозлиған уйлар, томлар, деворлар юрагига не замонлардан бери унут бўлган ором ҳиссини олиб киргандай эди. Лекин ором қайди Бобораҳимга? Жонда ором йўқ. Оромижон йўқ. Оламининг ўзи ором инвалигини билмайди. Оламининг бори дард. Турган-битгани дард. Бобораҳим ҳам бор вужуди билан шу дардга қоришиб ётади. Уч ўшдан бери Бобораҳим оламининг ҳеч туганмас дарди борлигини ҳис қиласиди. Бул дард унинг назидида шунчалар поёнсизки, одам боласи ҳеч қачон унинг тагига ҳам, охирига ҳам етолган эмас.

Уч яшар ҷоғида отаси оппоқ қор олами босган бир кез бир варақ сарғиш хитой қофозга: «Ўглим, мунда боқинг, мана бу алиф бўлади»,—деб тикка узун бир чизик тортиди. Сўнг ёнига яна бир кичикроқ чизди. Яна: «Бу Алиф! Алиф! Ўглим!»—деди. Бобораҳим отаси чизиган тик чиройли чизиқчага қараб анграйиб қолди.

«Ота, алиф ҳамма нарсами?»—деб сўради отасидан Бобораҳим. У отаси чизган алифга термулган сайин ҳамма нарса алиф бўлиб кўрина бошлади кўзига. Ҳамма нарса, отаси, ўзи, сандалнинг нариги четида кашта тикиб ўтирган онаси, ўн икки тўсинли улкан уй, ҳовли, дараҳтлар — ҳамма-ҳаммаси алифнинг ичига кириб кетаётгандай туюлди. Алиф мисоли бир қора эшик эди. Ҳамма нарсалар унинг ичига кириб кетар, лекин ҳеч нарса унинг ичидан қайтиб чиқмас эди. Отаси унинг саволини тушуумади. Болаларнинг одатдаги энтак-тентак эрка саволига йўйди. Лекин Бобораҳим отаси жавоб бермаганинги кўриб, яна сўради: «Ота алиф ҳамма нарсами?» Шунда анграйиш навбати отасига келди. Отаси анграйди. Үғлининг саволи бежиз эмаслиги ва шу билан бирга бу саволга жавоб беришдан ожиз эканлигини сезди. «Үғлим, зерикдингизми?»—деб айтди у жим ўтиравериш ноқулай бўлиб қолгани учун Бобораҳим шунда: «Зерикдим, Зерикдим!»—деди-да, дик этиб сандалдан оёғини тортиб ўрнидан турди ва шу ҳолича ялангқат оқ кўйлакда оёқяланг, иштончанг ҳовлига югуриб чиқди.

Улкан дараҳтзор ҳовли теп-текис момиқ қор билан қопланган эди. Фақат уй ёқалаган текис гишт ётқизилган йўлкаларгина ораста қилиб куралган эди. Бобораҳим ҳали биронта ҳам из тушмаган қор устида ҳовлини чарх айланиб югурга кетди. «Мен зерикдим, зерикдим...»—деб ҳиргойи қилганча ҳовлини чарх айланиб чиқди.

Онаси сандалдан шаҳд туриб Бобораҳимнинг ортидан: «Ҳой, ҳой, тирмизак!»—деб югурди. Раҳимжон онасига тутқиҷ бермай қочди. Янги ёққан қор оёқларини жазиллатар, жазиллатган сари унга хуш ёқар ва янада тезроқ чарх уриб чопарди. Раҳимжоннинг оёғи қорга ботгани жойла бирдан ҳовур кўтарилади. Онаси: «Шўрим»—деганча ниҳоят уни қувиб етди ва ердан даст кўтариб бағрига босганча тез-тез юриб уй ичига олиб кириб кетди.

Отаси чизган қора алиф Бобораҳимни шунчалик ҳаяжонга солдики, ўзи билдими, билмадими, сўнг бу ҳаяжон уни ҳеч қачон тарқ этмади. Ҳаяжон зўрайиса ва муттасил тус олса, одам жуда маюс бўлиб қолади. Бобораҳимнинг ҳаяжонлари теран маъюсликка дўнди. Овадан ўн йил ўтиб бир куни Лантар мозори ичидаги ўйнаб юриб, ҳаёлинга аллақандай бир фикр келди: Ҳамма нарса алифга айланади, алиф ҳам ҳамма нар-

сага айланади. Бу фикр димоғини чоғ қилди ва ўшанда биринчи бора: «Алифни дилга жо қилмоқни...» деб бошланадиган байт-ғазалини қабрлар орасыда юриб бир зум ичиде тұқиди. Сүнг ғазални югуриб-ўйнаб бир неча бор ёд үқиди, хиргойи қилиб айтди. Үз овозидан үзи маст бұлди...

Ха-а, хүй! Дард ростдан поёңсиз. Дард оламни қордай қоплаган. Қаерга сөк құйсам, ўша ердан оппоқ пар күтарилади, ҳолим бўлиб нола қилади.

Бобораҳим тор күча тугаб кичикроқ майдончага чиқди. Майдончани кесиб ўтса, кунботарга қараб кетган узун уч киши базур сиғадиган йўлакининг охирнда Валибобонинг қадим кўк дарвозаси...

Раҳимжон майдонча ўртасига еттанди, бирдан ўнг томондаги боғдан сурон ва қийқириқ эшитилди. Раҳимжон хаёли олинниб ўша томонга ўғирилиб қаради. Олдинла думларини юқори күтариб бораётган Барфоқ ҳам тұхтаб эгасига: «Нима гап?»—дегандай қаради. Ҳаш-паш дегунча беш-үн чоғли болалар боғ деворидан ошиб бир-бирларини қувалаб Бобораҳим томонга чопдилар. Қўлларида ўзлари ясад олган камончалар. Қизил этикча кийган чиройли юзли бирори ҳаммадан бурун Раҳимжон олдидан тўсиб чиқди:

— Тўхта! Отаман! Ана, сен ўлдинг! — деб камончасидан Раҳимжон томонга ўқ узди. «Ўқ» Раҳимжоннинг кулоҳи тепасидан ўтиб кетди.

— Оҳ, болажон! — деди Раҳимжон уни суюб қулоҳлашга уринаркан, — мени отиб не қилғайсен? Мени аллақачон отиб ташлаганлар. Мени аллақачон асир олганлар. Мени аллақачон ўлдириб бўлганлар, оҳ, болажон-эй!

Ўйндаи икки юзи лоладай қизариб кетган бола ўзини унинг кучоғидан олиб қочди. Юлқиниб нари кетдй.

— Юрларинг! Ёгий қочди! Қувамиз! — деб қичқириб, бошқа болаларни эргаштириб, қий-қийлаганча майдоннинг нарги ёғига дикрашиб, сакрашиб, қувлашиб чоп-чопа кетдилар.

«Мен отамнинг уйндаи чиқиб кетганды, бу йигитчаларнинг ҳеч бири дунёга келмаган эди... Онамни кўрмаганимга бир йигитча умри ўтибдир. Воҳ-воҳаа...»

Бобораҳим узун йўлак оғзига стиб келгунча Барфоқ деворларнинг бурчакларини истаб қаерга юришини билмай турди. Бобораҳим стиб келиб йўлакка кадам қўйгач, ит «э, ҳали шу ёққа юрамизми», дегандай-ду-

мини кож қилганча йўлак ичкарисига томон лўкиллаб кетди. Бобораҳим Вали бобонинг ғоятда осуда кўк дарвозасига яқинлашаркан, бутун вужудини аллақандай сенгидан бўлмас маҳзунлик чулғаб олди. Киндик қони тўкилган азиҳ ҳовлиниң унут бўлаёзган ислари назарида кўксига ёнирилди.

Кўк дарвозанинг бир тавақаси озгина қия очиқ, ичкари жим-жит, одам шарпаси эшитилмасди. Ҳовли этагидаги ўрниклар қийғоч гуллаб кўпирни ётарди. Ариқ бўйидаги азим ноклар ҳали гулламаган, лекин тифиз гунчалаган эди. Аллақайда ўрик гуллари орасида бир мусича чунон ҳуҳулар, улкаш ҳовлиниң кимсасизлиги ва сукунатида унинг товуши жуда ҳам янграб чиқарди.

Бобораҳим ичкарига оҳиста қадам қўйди. Ва дарҳол кунчиқарга қаратиб солинган баланд улуғ айвон ва айвон оша кириладиган катта уйнинг ичкарисига қарди. Уйнинг айвонга чиқадиган кенг эшиги очиқ, ичкаридан аёл кишининг мунграпаниб ўқиган бир зайлдаги тиловат саси келар ва бу ҳазин сас мусичанинг ўша шавқ билан ҳуув-ҳуувлашига тамомила қоришиб кетаётир эди. Бобораҳим мусичанинг сайраши аёл кишининг тиловатига ажиб бир тарзда эши ва ўхшаш эканлигини дилидан ўтказди.

Барфоқ бориб айвон остонаси тагига ётди. Қуёш тез ботиб борар ва кимсасиз, сукутга чўмган ҳовлига ифодалаб бўлмайдиган мунглир бир тус берарди.

— Эгамо! Эгамо! — деб юборди Бобораҳим. — Эгамо, ўзинг раҳм қил...

Бобораҳим кейинги ойлар ичида онасини устма-уст тушида кўрар, тушларида она доим бир тусда оқ тўшакда ётар ва орнқлаб кетган қўлларини чўзиб Бобораҳимни чақираварди.

Бобораҳим ҳар сафар шу тушни кўрганда ҳўшграф йиғлаб уйғонарди. Узоқ ҳолсизланиб кўрган тушини ўйлаб ўтирад, сўнг ташқарига чиқиб узоқ зикру само тушарди. То вужудини ҳис қилмай қўйгунча тинмас, зикр айтар ва само тушарди. Уч-тўрт бор шу бир туши кўравергач, унинг дилида хавотир уйғонди. У ўзини ҳар қандай қийинчиликларга ўргатган, танини тан деб билмай қўйган, инчунин, калладай тошни баланд кўтариб яланғоч оёғи устига ташласа, оёғида заррачайин оғриқ сезмас, оёқ оёқ-кү, бошига тош билан урсалар ҳам, боши оғриганини билмас эди. У ҳафталааб ҳеч кучини йўқотмай оч юра олар, овқатни хаёлига кел-

тирмас, оёгини чўпонлар ёқсан гулханинг ичига бемалол тиқиб турар, оёғи куймасди. Бобораҳимнинг чўзинчоққа мойил, яноқлари бўртиб чиқсан хушбичим юзида йирик кўзлари ёниб турар, у ҳеч қачон, ҳеч кимга тик қарамасди. Айниқса, қорачиғлари тим қора ва катта-катта бўртиб турар, чамаси, агар бу қорачиғлар истаган бир кимсага мабодо тик қарайдиган бўлса, ҳеч шубҳасиз ўша одаминг юраги бехос орқасига тортиб кетарди. Лекин Бобораҳим шуни билганиданми ё бошқа бир сабабданми, ҳеч ким, ҳеч кимсага тик қарамасди. Кўзлари ҳар қандай нарсани тез илгар, тез идрок қиласарди. У даштда йилқи ҳайдаган маҳалларда кундузи осмонга боқиб юлдузларни кўрар, ўзи бундан ажабланар, лекин буни ҳеч кимсага айтмасди.

Кейин онасини кўрмаса, ҳеч иложи қолмагалигини сезди. Пир даргоҳидан изи олиб, етти ҳамроҳ билан йўлга тушди. Қаландарлик ойнини адо эта-эта кичик бир карвонга қўшилиб неча ҳафта деганда оқ юзли сабоҳати жон Наманганга кириб келдилар.

Мана, она остонасида турибди гирён бўлиб. Уй ичкарисига кирмоққа юраги бетламайди. Ҳеч қачон қўрқув нималигини билмаган одам бирдан мана, қўрқди: «Онам йўқмукин?...»—пароканда ўй ўтди унинг хаёлидан.

Бобораҳим айвонга кўтарилди. Айвондан кенггина даҳлизга ўтди. Даҳлизга чиройли қилиб япалоқ ғишт ётқизилганидан салқин ва намхуш эди. Бобораҳим даҳлизнинг икки тавақали қия очиқ эшигидан ичкари катта уйда ўтирганларни кўрди. Ҳали йигиштирилмаган сандал четида бошларига оппоқ рўмол ташлаган, эгинларида малла мурсак, икки аммаси санамдай бўлиб ўтиришар, сандалнинг ўнг томонига солинган тўшакда катта кўрпа ичида кичкина бўлиб онаси ётарди. Тўшакнинг бош томонида юз-кўзлари қизғиш сариқ рўмол билан чирмаб ўраган синглиси баланд қоматини она тарафга эгиб чўнқайиб ўтиради. Унинг йирик-йирик қора кўзларию бурнигина очиқ эди. Онасининг ёстиққа омонатгина ўрнашган бошини синглиси оҳиста силар, она билинар-билинмас нафас оларди.

Унинг уйга кирганини дастлаб аммалари лайқашди. Улар аввал ҳанг-манг бўлиб қараб турдилар. Кичик аммаси сингилни аста туртди. Сингил бошини кўтариб кириб келувчига қаради. Бобораҳим бошидан кулоҳини олди ва ичкари ҳовлига очиладиган катта деразанинг четига ўтиради. Лосдек тим қора ялтираб

турған соchlари намат түнининг елкасига тўкилди. Шунда синглиси дик этиб ўрнидан турди. Унинг самбитдай тик қомати гоятда келишган ва Бобораҳимдан хиёл тикроқ эди.

— Вой, бўйларингиздан ўргулай, Раҳимжон, сизмисиз? — деб ҳўпграб оғасига пешвоз отилди. Ва уни маҳкам бағрига босди. Ака-сингил ўи йиллик айрилиқдан сўнг дийдор кўришиб, бир-бирларига тўймас, бир-бирларининг қадрдои исларини ютоқиб ютардилар. Сингил уни ҳеч бағридан бўшатгиси келмас, лекин аммалари қучоқ очиб кўришмоқ шавбатида турганларини кўриб, Ижобат уни истар-истамас қучоғидан бўшатди. Аммалари ҳам Бобораҳим билан уни бағирларига боса-боса кўришдилар. Кўз ёши қилишдилар. Сўнг Бобораҳим онасининг бош томонинг ўтиб тизчўкди.

— Бибим, бибижоним... — деб шивирлади.

Онаси юпқа тортиб кетган қобоқларини базўр кўтарди. Кўзларини ярим очди. Қуруқшаб шафтолининг пўстидай бўлиб қолган лабларига билшар-билинмас табассум қалқди.

— Раҳимжон... — деди. Лекин униг товуши эши-тилмади. Она адрес кўрпа тагидан ўнг қўлини аста тортиб чиқарди. Ва Бобораҳимга томон зўрғагина узатди. Бобораҳим ориқлаб кетган нафис қўлни бағрига босди. Юз-кўзларига авайлаб суртди. Онасининг кўксига бошини эгиб тек қотди. Она юраги чумчук юрагидай талпиниб ура бошлаганини сезиб бошини кўтарди. Улкан оқ кафти билан она юзини елпиди. Онаси яна кўзларини юмиб олди. Лекин бояги табассум асорати ўчгани йўқ. Унинг табассумида: «Сени кўрар кун бор экан-ку. Сени кўрдим-ку», — деган фақат сезгувчи диллардагина бўладиган ажиб бир маъно бор эди.

Бобораҳим онасининг бир пайтлар бағоят кўхлик, ҳозир заъфарон тулага кирган, териси ҳаддан ортиқ юпқа тортган чеҳрасига тўймай термулар, гўзал сиймони сариқ қаҳрабога эвирган куч олдида одам боласининг нақадар ожизлигини қаттиқ ҳис қилди. Онасини асли ҳолига қайтарур қудрат бормикин ёруғ оламда? «Қизил гулдай сўлдилар...» — деган аллақандай нотавон сўзларни пицирлаб айтди. Синглиси чинни товоқда илиқ сувга солиб қўйилган сўлғин узумдан бир дона олди-да, онасининг лабларига теккизди, узум донасини аста эзиб она лабларига шарбатини томизди. Лекин бир томчи шарбат оғизга тушмай она лабларининг че-

тига оқиб түшди. Онанинг пафас олиши яна ҳам се-
кинлашган, юрак ўқтин-ўқтин тұхтаб-тұхтаб ура бош-
лаган зди.

Бобораҳим ортиқ тоқат қилолмади. Күкрагидан
отиilib келәётган фарёдни босиб ўриңдан турди ва бо-
шини қаттиқ сарап-сарап қылғаша уйдан ташқарига
чиқди. Күкраги жазавага тұлыб кетди.

— Раҳимжо... мен ҳозир... айвондаги таша ис-
сиқ... — деган сингисининг юмшоқ товушини орқаси-
дан әшитди. Лекин у китоблар билан токчалари лиқ
тұлған өз қадрдан ҳужрасынға ҳам кирмади. Айвондаги
катта сандал ўрнатылған озода ташага ҳам ўтиrmади.
Бир зум уй ичида туришга тоқати қолмади. Ташқарига
чиқмаса, юраги ҳозир қинидан чиқиб кетишини сезди.
Ховлига түшди. Барғоқ уни күриб бошини күтарди ва
пенчукдир ғингшіп ингиллаб қўйди.

Бобораҳим айвон рўпарасида ариқ бўйнда ўсган
улкан нок тагига борди. Нокнинг керилган икки бар-
моқдай бўлиб ўсган айри шохлари кўкка қараб ўрлаб
кетгац, юксакдаги повдаларида гуж гунчалар имта-
тири бўлиб баҳор шабадасида силкишарди. Нокнинг юк-
сакда чалкашган икки йирик шохи шабадада чолғу
чалиб фийқилларди. Говгум қоронғуси түшди. Бобора-
ҳим нок тагига бориб тик турди. Кафти билан дараҳт-
нинг болаликдан ошно танини силади, жўрасининг ел-
касига қоққандай шапатилаб қўйди. Сўнг қаддини
янада адл ростлаб тўғри айвонга ва айвон оша уй ичи-
га қаради.

Кичик аммаси катта шиша чироқни ёқаётганини
кузатди. Аммаси чироқ шишасини қўли билан сийпаб
сўнг аста пиликни кўтарди. Бобораҳимнинг кўкраги
тўлиқиб кетди. Елкалари билинар-билинмас қўмирла-
ди. Оёқларини ердан дам-бадам бир маромда кўтариб-
тушириб худди ҳаккалагандай ҳаракат қила бошлади.

— Эгамо, эгамо, знамни тарк этма... — деган нидо
чиқди унинг кўксидан. Сўнг: «Ҳоҳ-ҳуув! Ҳо-ҳу-вва!» —
деб тинимсиз такрорлашга түшди. У кўзларини она
даргоҳида ёнаётган чироқнинг сарғиш алангасидан
узмас, ҳаракатлари тобора шиддатли тусга кирав, бо-
ши тик юқорига кўтарилар-тушарди.

Барғоқ ҳамон айвон остонасида узун тумшуғини
икки бақувват оёғи устига қўйиб ётганча эгасининг
тұхтосиз исми аъзамни ўқиб бир маромда шиддат билан
зикр түшишига мўлтайиб қааради. Баҳорнинг кеч-
ки салқинида улуғ қаландарнинг ёқасидан, бошидан,

енглари учидаң күтарилаётган оппоқ ҳовурга тикиларкан, күп ўтмай улуғ қаландарнинг оёқ учида туриб чир айланадиган гали келишини кутарди. Бу пайт ичидан уйдан санам каби бир аёл чиқиб айвон остонасига тиз чўкиб анчагача улуғ қаландарнинг ҳаракатларига маҳлиё билиб қараб ўтирди. Сўнг яна бемор ёнига кириб кетди. Бобораҳим зикр-самонинг маълум бир нуқтасига етганда оёқ учида туриб гир-гир айлана бошлишини билар, шу ондан бошлаб у вужудини, вужудининг ҳар қандай талабларипи бутунлай ҳис қилмай қўяр, унинг учун ҳаётда энг гўзал ва энг муфараҳ дамлар — вужудсизлик дамлари бошланарди. Исми аъзамни шиддат билан айта-айта унинг мияси сўнг бутунлай бўйм-бўш бўлиб қолар, күп ўтмай ана шу вужудсизлик дамлари уни ўз ҳукмига оларди. У оёқ учида шаҳд билан айлана-айлана сўнг йиқиларди. Неча фурсат буткул ҳушидан кетиб ётарди. Лекин четдан қараган одамгагина бу ҳол ҳушдан кетиш бўлиб туюларди. Аслида у ерга йиқилган ондан эътиборан вужудида бошқа бир ҳаёт бошланар, бу ҳаётнинг сирни фақат ёлгиз ўзигаю бир яратганга аён эди. Шу дамдан бошлаб унинг мияси руҳ оламининг суратхонасига айланар, ўнгиде ҳеч кимга ҳеч қачон муюссар бўлмайдиган сувратлар намоён бўларди.

У онасини тўшакда шамдай сўниб бораётганини кўриб ўзини беҳад ожиз ва нотавон сезди. У анчадан бери ожизлик ва нотавонликни бутунлай енгганман деб ишонган эди. Лекин сўниб бораётган шамни кўрганда бир зумда ожизлиги вужудига қайтиб келди. Улуғ қаландар инсоннинг ўлими ва ҳаёти олдида ожиз бўлмаслиги керак. Одам боласи фақат яратган қошида ожизэдир. Яратганнинг ҳукмига тобедир. У ожизликини енгиш ва ундан халос бўлмоқлик учун зикрга кирди. Акс ҳолда... акс ҳолда унинг яшамогидан ва дунё дардманлари сафида юрмоғидан маъно қолмасди.

Бобораҳим баҳор намгарчиликларидан юмшаган илиқ ерда ҳушдан бегона бўлиб ётаркан, хаёлида томлар, томларнинг бўғотлари, бўғотлардан осилиб ётган сариқ сумалаклар тавдаланди. Шамол турди ва сариқ сумалаклар қарсиллаб ерга узилиб тушавердилар. Онасининг тўшаги шу тўклилаётган сариқ сумалаклар тагида қолди. Сўнг онанинг ўзи ҳам сариқ сумалакка айланди. Сўнг гўё хаёл саҳнида доим ҳазрат Навоий ғазалларини ёд ўқий турган Эшон Мулла Бозор Охундининг жиккак қомати пайдо бўлди. Худо айтган: ва билво-

лидайни ихсонан... бўтам, ота-онангизга хизмат қилинг... Унда Бобораҳим мозор ва хонақоҳларда ўйнаб юрадиган, оч-яланғоч қолса ҳам мозоротдан бери келмайдиган ўн уч яшар бола эди. Эшон Мулла Бозор Охундга айтди: «Ошиқнинг ота-онаси бўлмас»... Мулла Бозор лол бўлди ва муридларига қўшилиб йиғлади. «Вахфиз лахумо жаноха ал-зулли минал-раҳмати»... — деди. Қанотингни эг, болам, қанотингни эг, болам, ота-онанг олдида... Навоийни ўқиган эдик-ку... — деб таъна қилди у охири, сўнг фойиб бўлди Эшон Мулла Бозор Охунд. Фойиб бўлди. Сўнг Эшон оппоқ кафанга ўраниб олди ва ётди. Бозор Охунд зум ўтмай худди ҳазрат Навоийга ўхшаб кетди. Ҳазрат кафандарини ечиб ташлаб қабр эшигидан чиқиб, Бобораҳим томон кела бошлади. Ҳазрат Бобораҳимнинг юзига қарамас, фақат: «Она-а.. она-а-а..» — деб чақирарди. Сўнг ҳазрат «Она-она» деган туганмас нолага кўмилиб, фойиб бўлди. Фойиб бўлди. Сўнг Бобораҳим ўз ҳужрасини кўрди. Токчалардаги китобларини чанг босган. Аллаким, бўйдор қора бир йигит бари китобларини токчадан олиб ерга ташлар ва тўхтовсиз уларни тепкилар, йиртар ва яна тепкиларди. Йигит китоб тепкилашдан ҳеч чарчамасди. Бобораҳим унинг қўлидан тутаман деганда қорача йигит фойиб бўлди. У: «Мана-мана-мана» деганча уч юз йил илгари нарига қараб қочди. Бобораҳим унинг уч юз йил нарига қочинини кузатиб турди... Сўнг қорача йигит фойиб бўлди. Фойиб бўлди.

Узоқ-узоқлардан бокира қизнинг мунграб йиғлаган саси келди. Қизнинг бокира йигисини тиловат саси кўмиб кетди. Қайдадир «Вал-лайл»ни ўқирдилар. Тиловат гўё осмоннинг Курси ўрнатилган Еттинчи қаватидан тушаётгандай эди. Сўнг «Нажм»:

«Ва аннаҳу амота ва аҳё»...
«Ва аннаҳу амота ва аҳё»...
«Ва аннаҳу амота ва аҳё»...

Бобораҳим бу оятни эшигандага чидаёлмас, кўкка қуш бўлиб учиб кетгиси келарди. О, мудом дунёдан йиғи товуши келадур...

— Раҳимжон, Раҳимжон! Туринг, туринг! Оҳ шўрлик қаландарим. Туринг, тура қолинг!..

Бобораҳим йиги ва тиловат товушидан ўзига келди. Тепасида санамдай синглиси зор титраб турганини, тинмай унга ёлвораётганини, ити санамнинг сёқлари тагида ғингшиб қаттиқ безовта бўлаётганини кўрди.

Бобораҳим шитоб билан ўринидан қўзғалди. У зикр тушган жой бир қаричдан ортиқроқ чўкиб кетган, Бобораҳимнинг оёқ изи баҳорнинг намхуш ерига икки «айн» каби ўйилиб тушган эди. Синглиси йиғлаб бу изга ҷўқкалаб юзини босди. Сўнг адл қоматини тиклади-да, дона-дона қилиб деди:

— Раҳимжон, кирингиз, онангиз кўзини юмингиз...

Бобораҳим доим онасидан негадир қочиб юрганини энди англади. «Ошиқнинг ота-онаси бўлмас!» Ўв, ўсмирлик ҷоғида айтгани бу сўз энди ёдига тушди. У сўз қанчалик улуг бўлмасин, замирида тарки дунёчилик билан бирга аллақандай мубҳам, лекин жуда хатарли такаббурлик маъноси ҳам йўқ эмаслигини ҳозир ўйлади. Ҳазрат тушида нега «Она-ал» — деб тўхтовсиз нола қилди? Ул зоти шариф ҳам мен каби она дийдорига тўймаган эдими? Ёлғиз ўтганининг боиси она дийдорига тўймагани эмасми? Ё Раббим! Бу қандай ўй! Мен-чи? Мен ахир ёлғиз эмасманми?

У бош эгиб она даргоҳига кирди. Бобораҳимнинг ўттизгача эгилмаган қанотлари синган эди..

Онаизор ҳам барҳақ. Ҳар нарсани бешак ўз бағрига олгувчи алиф комига кириб кетган эди.

ОҚ БУРГУТЛАР

Ўтирибман тош супада
балаанд тепада.

Рўпарамдан тоғ оралаб дарё келар шалдираб.
Бунда дарё сурон солиб ўзин урур йўлга тушган кўп-
рик тагига.

Нарироқда юксалади ҳайбатли бир тоғ. Асли яхлит
бир қоя.

«Мозорбоши» дейдилар бу ерни шу жойнинг одамлари.
Сирли қорамтири қоянинг сарбанд чўққисида Сўфий бобо
қабри бор дейишади.

Үнда оқ қабутар қанотидай ҳилпирайди шаббодада
оппоқ туғ.

Дастлаб кўрганимда тоғ устида уяда оқ бургутнинг
болалари ўйиашгандай кўринди. Хаёлимни олиб қочди
оқ бургутнинг болалари... Сўнг менга уни туғ деб ту-
шунтиридилар. Лекин хаёлим оқ бургутнинг сирли уяси,
оқ бургутнинг болаларидан сира айрилгиси келмайди.
Хаёлимда бургутчалар етилар ва эгаллар бу қадим
юрт самоларин. Лекин оқ туғ... Оқ туғ ҳам жуда сирли

Шу қоянинг орқасида бор эмиш яна бир қоя. У қоя ҳам, бу қояни боғлар эмиш битта харсанг тош.
Ешлигиде шу қояга дадил чиққан регарлик йигит ҳикоя қилиб берди менга:

— Икки тоғнинг ўртаси тубсиз зов экан. Тоғнинг бир учи илингандир у қояга, битта учи бу қояга. Зов тубига қараб бўлмас — қоронғу чоҳ тортиб кетади дарҳол. Қорним билан ётиб ўша харсангга аста-аста сурнилиб минг машаққат билан ўтганман Сўфи бобо тоғига. Катта майдон экан тоғ тепаси. Тик турмоқ душвор. Учириб кетади тик турсанг шамол. Үнда-мунда тошни ёриб буталар ўсган. Улар паноҳида эмаклаб қидирдим қайда деб Сўфи бобо қабрини. Қабр йўқ. Фақат қоянинг бориб бўлмас бир чеккасида ёриққа қадаб улуғ бир туғ ўрнатилган. Патирлайди тинмай шамолда. Шамолдан бошқа ҳеч нарса тополмадим эмаклаб кезиб. Жоним ҳовучлаганча қайтиб тушдим. Сиз чиқа кўрманг асло у ерга. Тоғ атрофи дарранда-чаррандалар. Ваҳмаси ёмон. Бош айланар, кўз тинади. Чиқманг у ерга. Йўқ ҳеч нарса. Билмайман, Сўфи бобо оқ байроғин у ерга тикиб ўзи қайга кетган. Аммо Сўфи бобони қидириб келарлар юртдан доим одамлар. Кўп замон термулишиб ўтиарлар пастда оқ туғ алансига... Соддагина бу ҳикоя шаҳдимни қўзғар. Чиққим келар у қоя тепасига. Етиб бўлмас у чўққига қайсиdir мард тиккан у байроқни кўргим ва ўпгим келар. Дастасидан тутиб залворли заранг жон ҳовучлаб тургим келар юксакда.

Мен ҳеч ерга байроқ тикмаганман.

Байроқ тикмай ҳам судралиб яшайверса бўлар албатта.

Ҳеч ким айтмас, солмас юзингга: Нега байроқ тикмадинг деб чўққиларга!

Элликка кирганда чиққим келар шу шамолгоҳ қоя устига.

Байроқ тикким келар.

Жўйлик устидан қозонгим келар ғалаба.

Тутгим келар ул яловнинг заранг дастасин.

Суртгим келар кўзларимга патирлаган яловин.

Лекин жон қийнамай яшамоққа ўрганган оёқларим мени тортар орқага. Шунинг учун сокингина шинамгина тошсупада пастда ўтириб ваҳший дарё шовқинидан тузык лаззат оламан.

Кўзимни ҳеч узолмайман сирли қоя устидан.

Туғ ҳилпираб имлар мени.

Гўё табиатнинг юраги жойлашгандай шу қояга тортар мени жозибаси. Чулдираган майна келиб тош устида ўтириб пир-пир сув ичди.

Сўнг роҳатланиб чулдираб учиб кетди қоя сари ҳаволаб. Ғойиб бўлди сўнг қоянинг ортида.

— Шу қушчалик ҳолинг йўқми? — сўроқлади юрагим. — Йўқми ғайрат, шижоат? Қирқилганми қанотинг?

— Сўфийларнинг чўққисига чиқа бермас ҳар ким ҳам, — мен тасалли бераман ўзимга. — Сўфийларнинг чўққисига чиқар кимса мухаббати ўлмаса. Санамларнинг ўт ишқидан асло умид узмаса.

Рўпарамда оқ туғ

Фасоналарга тўлуғ...

ТОШ СУПА

Тош супада ўтириб қотди хаёлим.

Тоғ сойи келур ялаб тошларни, силаб, сийпаб, ўпиб, тошиб, қалдираб

Ҳеч ким ўзин тошдан тошга урмагай сувчайнин,

Ҳеч ким ўзин тош устида тўлғамас сувчайнин,

Ҳеч ким босмас дунё йўлларини сувчайнин,

Ҳеч ким собир эмас сувчайнин,

Қоҳир эмас очунда ҳеч ким сувчайнин,

Сув сўйлатур тошларни...

Куйлатур оғочларни.

Тош супада мен ёлғиз

Олиб қочар хаёлимни телба сув.

Бу тош супа Хожам Пирим супаси.

Бу дарё ҳам Хожам Пирим қояси...

Бу сой Хожам Пирим тоғининг ортидан галдираб келади.

Галдираб галдир.

Хожам пирим тоғининг ортида музликлар бор ёйилиб ётар.

Уша музликлардан тили чиқиб келар бу сойнинг.

У музликлар устида гиламдай очилади сариқ чечаклар.

Маст айлар эмиш чечакларнинг иси одамни.

Музлик тўқиган бу сариқ гиламни кўрган кимса ҳеч баҳтсиз бўлмас.

Лекин музлик жуда олис.

Йўл юрмоқ керак неча кун пиёда.

Учурлардан ўтмоқ керак.

Күнгил қурғур қўймас:

— Боргил! Боргил, кўргил ул мўъжизаларни!

Кўпмас ахир сенинг кўрган мўъжизаларинг!

Қачон кўргансан музликда чаман очилган бойчечакларни.

Гулназар чиқди музликка,

Чиқди Шаҳриёр музликка!

Тожинисо чиқди музликка!

Чиқди ана Норкетган ҳам!

Сен фақат ҳар нарсадан қўйида

Ўтирасан тош супанинг устида

музлатиб танинг. Сен-сен.. таъналар қилади кўнглим.

Мен кўнглимни тушунаман!

ахир у баландликларга чиқишини истайди,

ахир баҳаво жойларни истайди кўнглим

музликлар гулидан рангу бўй истайди ахир.

Кеча Норкетган бир даста бойчечак келтирди:

— Домулла, ҳидланг тўйиб-тўйиб... бу музлик бойчечаклари.

Сентябрда очилган...

Қувват бўлар унинг ҳиди юракка

ва шеър тугади унинг ҳиди хаёлда.

Музлар аро жимир-жимир оққан жилғалар келди кўз ғимга.

Музларнинг ижоди қаҳрабо гуллар..

Ўз фурсатида музни ҳам гуллатар қодир табиат.

МУҲАББАТСИЗ ОДАМ ҚАНДАЙ ЯШАЙДИ?

Коя ва мей ёлғиз.

Коя пойида тош супа ёлғиз.

Анчадан бери сўрагим келади. Лекин сўролмайман.

Билмайман кимдан сўрайман.

Атрофда одам кўп. Лекин сўраб бўларми?

Балки сўраш керакдир Хожам Пирим қоясидан

ёки Хожам Пирим шалдираган сойидан.

Мен билмайман кимдан сўрашни.

Рост, Навоийдан сўрагим келар. Қандай чидади у ёлғиз яшашга?

Қандай чидади таъналарга, фитнага?

Қайдан олди экан шунча муҳаббатни ҳаётга?

Умуман яшашга қандай чидади экан Алишер?

Қийналиб ўтирдим тош супада: Кимдан сўрайман?

Шу ерда, шу тобда билишим керак. Йүқса бўлур кеч...
Бирдан мушфиқ Пирим сойидан садо келади:

— Тошдан сўра. Тошдан сўрагил.

Мұҳаббатсиз одам қандай яшайди?

Мұҳаббат бирдан тарк этса қунгилни одам қандай яшайди?

Мұҳаббатсиз ҳаётнинг қандай бўлар йўриғи?

Илгари одамлар bemalol сир сўйлар эдилар тошларга.

Тилар эдилар имдод тошлардан: — ал-УЗЗО, ЛОТ МАНОТлардан.

Ал-Уззо тош эди ажиг қиррадор,

Тош эдилар Лот, Манот ва ўзгаси ҳам.

Тошга бошин уриб тилак тилаганди Қайс.

Хожам Пирим сойи айтар:

— Тошдан сўра, тошдан сўра. Тош билади мұҳаббатсиз қандай яшашни. Тош аввал ўт эди. Совуган у ва ҳаким бўлган.

Муздай тошга лабим босдим. Аста шивирладим:

— Айт?

Лекин тошдан садо чиқмас. Сезиб турар юрагим тошдан қаттиқроқ бўлар жавоб:

— Мұҳаббатсиз ҳаёт бордир. Бор бўлса ҳам йўқдайдир.

Мұҳаббати ўлганлар тошдай мунглиғ яшарлар.

Яланғоч дараҳт каби

лол турарман қулоқ тутиб тошсўзга:

сангдиллик қўрқитади

буғун мени айниқса...

МУРИД

Пирмаст мурид бўламан деб, шоҳ Машрабни ҳол-жонига қўймади. Шоҳ Машраб ноилож рози бўлдилар. Лекин Пирмаст олдига шу шартларни қўйдилар:

— Унвон олмайсан,

Нишон олмайсан,

Ҳоким бўлмайсан,

Ер-сув орттирамайсан...

«Бале, бале», деб қуллуқ қилиб қўл қовуштириб турган Пирмаст кутилмаганда, ингичка овоз билан сўради:

— Хотин ҳам олмайманми?

«Муғомбир Пирмаст,—деб ўйлади Машраб.—Уй-

ланмайсан десам, Худонинг измига қарши борган бўламан. Ҳеч ким ҳеч кимниңг насл қолдирмоғига зомин бўлолмайди. Азим гуноҳ... Лекин...»—Машраб Пирмастнинг узунчиқ ияги, иякдаги яккам-дуккам узун ишгичка мўйларига паришон тикилди:

— Тўрт шарт—шарт. Қолганига ўз аравангни торт...

ҚАТЛГОҲДА ҮИНАГАН БОЛА

Азадорликнинг еттиси тугади. Келди-кетди босилди. Икки хонадон ўртасида елиб-югуриб ҳолдан тойган Ижобат ўз уйнга кетди. У эрталаб тонг оқармасдан болалардан Машрабга қаймоқ ва янги ёпилган иккита оқ нон жўнатар, кечга томон ўзи оппоқ дастурхонга ўраб кўвачада иссиқ таом келтиради.

Машраб жуда оз тотинар, кўпроқ айвон шинтига осилган, ойнаси аввалдан қуритиб халтачаларга солиб қўйган қотган нондан олиб муздек сувга ивтибиб аста кумирлатиб ейишни ёқтиради.

Ховли-жойлари нақадар чиройли ва баҳаво бўлмасин, жимжитлик Бобораҳимнинг юрагини сиқар, кўнгли яна одатдагидай тўхтовсиз кезинмоқни, тўхтовсиз йўл қатъ айламакни тилар, дашту саҳроларга тез орада бош олиб кетмаса, ҳеч иложи йўқлигини англарди. Йўл чорларди уни. Бу ерга уни боғлаб турган нарсалар Худонинг мулку мулкатларини Мажнун каби кезмакнинг жозибасига дош беролмасди. У хотираларни эъзозларди, лекин уларга қул ва банди бўлиб ўтирадиган одамлар тоифасидан ҳам эмасди.

У ҳеч маҳал бир ерда кўп тўхтаб қололмас, юрагини тўлдиргаш ҳислар ҳовлилар, уйлар, саройларга асло сиғмас, унинг денгиз каби тўхтовсиз чайқалган ҳисларига фақат чексиз кенгликлар макон ва мақом бероларди. Оlam жамики нарсалари билан Яратганинг ишқида масти аласт бўлиб ётарди унинг назарида.

Бор сабабни, йўқ сабабни, у барнибир юрагида дамбадам бош кўтараётган фарёд, нола ва туғёнларни ҳеч нарса билан босолмас, ҳеч нарса унинг афғонларига таскин бағишлай олмас, у таскин ҳам қидирмас, лекин ҳеч қачон ўзини осудалик мақомида сақлаб туролмас, бунга кучи етмас, фақат шундан ожиз эди.

У бир неча кун ҳужрасидаги китобларни шиндат билан варақлади. Ўсмирлик чоғларида ўқилгац байтлар

гарчи хотирасига нақшланган эди, лекин китобларнинг сарғайган суюкли варақларида, бу варақларнинг ажаб бир ўзига хос ҳиди димоғини қитиқлаб, унга ўзгача ҳаяжон багишларди.

Машраб ҳеч қачон қадимгиларнинг достону ғазалларини осонлик билан ўқиган эмас. Ҳусусан, ҳазрат Мир Алишернинг байтларини ўқиса юраги ҳар байтда бир портларди. Сўзлар уни мислесиз титроқ ва мислесиз азобга соларди. Чарх уриб ҳужра ичини айлана бошлар, миясида қуюн каби ўз сўзлари туғиларди. Бир қадим сўфий Олоҳу Акбар! — деганда ҳар мўйининг тагидан қон сизиб чиқаркан. Машраб қўлига китоб олса, шунга ўхшаш бир ҳолатга тушар, ё куй чалгиси, ё зикрга тушгиси, ё дунёйи хокдонни бошдан оёқ бузиб ташлагиси келарди.

Бобораҳим шу тобда Ҳўжа Ҳофизни мутолаа қилиб келди. Лекин ўз ҳужрасидаги китоблари орасидан онаси бир замонлар совға қилган девонни топмади. Сўнг меҳмонхонадаги отасидан қолган китоблар ичидан Ҳофиз девонини қидирди.

Кенг уйнинг баланд тоқидаги зич ва текис қилиб жойлаштирилган вассажуфтларга отаси қизил ва қора сиёҳлар билан ажаб бир ҳуснинат билан биттан турли замон шоирларидан олинган байтларни ҳайроналик билан ўқишига тушди. Шу қадар лазиз эди бу байтлар.. Отаси баъзи вассаларга бутун-бутун ғазалларни чиройли қилиб кўчирган, уйнинг тўр томонидаги вассаларга эса «Ан-Нажм» ва «Вал-лайл» сураларини тўлиқ кўчирган эди.

Бир улуғ оққуш икки қанотида бу илоҳий сураларни қайларгадир коннотнингми чексизликлари сари толмай элтарди.

Отаси чизган сура кўтарган оққуш Машрабни ўта түғёнга келтирди. У излаётган нарсасини ҳам унуди. Үзининг ҳам бундан йигирма йил муқаддам тоқиларга битган байтларини пичирлаб ўқиди ва жилмайди.

Шу пайт эшикда Барфоқнинг ҳургани ва аллакимнинг: «Раҳимбой! Раҳимбой!»—деб чақиргани эшилди.

Бобораҳим шипга термула-термула оғриган бўйини уқалай-уқалай айвонга тушди. Барфоқни тинчитиб, эшикни очди.

Баланд бўйли, новвотранг юпқа камзул кийган, бошига оқ пеҷдан дастор ўраган сийрак соқол киши Машрабга қучоқ очди.

— Оббохолам, ҳеч таний олмадим, Раҳимбоймисан? Отанг раҳматли мешга муқаввий эдилар. Шундоқ одам ўтиб кеттия. Волиданг оламдан ўтиблармиш деб эшилтим. Сафарда эдим. Қеча келдик. Фотиҳа ўқиб кетайин деб эдим...

— Келинг! келинг! Қапи, ичкарига...

Новча одам ёнидаги ўн икки ёшлар чамасидаги чиройли түш кийган бола билан бирга ичкарига кирдилар. Мәхмонхонага ўтиб дуойн фотиҳа қилдилар. Машраб ҳамон бу кипшни ҳеч эслай олмасди.

— Сиз жуда ёш эдингиз... — нечукдир энди сизлашга ўтиб гап бошлади келган меҳмон. — Мени танимай турибсиз. Абдували бобонинг бир ўғли бор... — меҳмон тутилди, айтмоқчи бўлган сўзини айтишдан хижолат чекди шекилли андак тараддуддан сўнг гапини давом эттириди:—бир ўғли бор... шоиртабиатроқ дейишарди. Яратгана минг шукурлар бўлсинки... мана, сизни ҳам кўриш насиб этган экан...—Мәхмоннинг кўркам кўзлари намланди. Овози беҳад юмшади ва касал одамнинг овозидай бўлиб қолди.

Машраб шунда меҳмонга билантирмай унинг ғоятда чиройли чеҳрасига диққат билан тикилди. Одам боласининг бунчалик чиройли бўлишига яна ҳайрати ортти. Эслади. Унда тўққиз-ўн яшар бола эди.

Меҳмон яна бир карра «Ёсин» сурасини қироат билди ўқиди-да, ўрнидан қўзғалди.

— Омонат дунёдан ҳаммамиз ўтиб кетамиз. Энди отангизнинг чирогини ёқиб ўтиринг. Илгари ҳамма таниш эди. Энди орадан бунча йиллар ўтиб атрофимга қарасам, нуқул нотаниш одамларни кўраман. Танишлар ўтиб кетаверар экан, нотанишлар келаверар экан... Оҳ, дариф! Мендан қандай ёрдам керак бўлса, беш устига. Лашгардан янги ҳовли қилганимиз. Панжшер ака десангиз айтиб беришади. Омон бўлсинлар. Худонинг ризосига!

Меҳмон хайрлашиб чиқиб кетди.

Бобораҳим орага бир сўз ҳам қўшолмади.

— Ўша, бу киши ўша, — деб шивирлади.

Ўша дам яна такрорланди. Машраб яна титраб, қалтираб уй ичига кирди. Яна уни худди ўшандагидай варажга тутди.

— Ўша, ўша...

Ингирма беш йил муқаддам Раҳимжон шаҳар нийгоҳида болалар билан ёғоч отларини миниб қийқирганча чопиб ўйнар эдилар. Кутимаганда майдонга ола-

Фовур оломон кириб келди. Улар бир қадди етти букилиб кетган киши билан бир аёлни судраб ийдгоҳ масжидининг улкан саҳнига кирдилар. Оломон масжид ҳовлисининг ичкарисида ўтирган катта салла ўраган, бир чакаги бир томонга оғган паст бўйли кишини ўраб олди. Раҳимжон ва болалар тол отларини шу томонга қўйдилар. Улар етиб боргандарида курсида ўтирган пакана киши ораста кийинган, ранги қум ўчган қавм-қариндошлари ичида турган бир йигитчадан нималарни дидир сурнштирас, йигитча тутила-тутила жавоб берар, у ҳар саволга жавоб берганда, йигит томонда турган оломон: «Шундай, тақсир! Рост тақсир! Бузук экан!»—деб шовқин-сурон кўтарардилар. Пакана киши қўлинин кўтариб шовқинни босар ва яна йигитчадан алласаларни сўрарди. «Биз гувоҳмиз! Ҳаммамиз гувоҳмиз!»—деб қичқиради оломон. Пакана киши йигитчанинг жавобларидан қаноатланди шекилли, сўнг сал нарида, ўнгроқда ёлғиз ўзи мушшайиб турган хотинга бошини бурди:

— Манкуҳингизнинг айтганлари ростми? «Ҳа» ёки «йўқ» деб айтнинг!

Бошига катта қора рўмол ташлаган, гулдор лозими ичида бўлиқцина оёқлари бўртиб турган хотин жавоб ўрнига пиқиллаб йиғлай бошлади. У йўқ деса бас, қутулади. Лекин қандай қилиб йўқ дейди. Ана бошидан оёқ қонга беланган, қалтакдан юз-кўзи шишиб кетган янавим ҳам чўк тушганча бошини ердан кўтармайди. Қандай йўқ десин! Қандай!..

Қози яна сўрайди.

Хотин яна қаттиқроқ йиғлайди.

Қози учинчи маротаба сўради.

Хотин энди уввоқ солиб оламни титратти. Унинг бутун вужуди, келишган қадди-қомати дағ-дағ қалтирай бошлади.

Бобораҳим югуриб бориб хотиннинг этагига ёпишиди:

— Йўқ денг! Йўқ денг! Йўқ денг!

У ингичка қўллари билан хотинни қаттиқ-қаттиқ силтади. Хотиннинг бутун қалтироғи унга ҳам ўтди. Хотиннинг бадани пир-пир учарди.

— Йўқ денг! Йўқ денг! Йўқ денг!

Раҳимжонни аллакимлар судраб нарига олиб кетдилар. У ўзини ерга ташлаб додларди. Тепинар, боши-

ни масжид ҳовлисига ётқизилган япалоқ ғиштларга уради.

Үерда булғаниб ётганча күриб турди: Хотинни судраб масжид минораси тепасига олиб чиқиб кетдилар. Зумда ўн-ўн беш чоғли кишилар минора тепасида пайдо бўлдилар. Хотинни азот кўтариб ерга улоқтиридилар. Хотин ерга ўқ еган кўк кантардай бўлиб тушди. Бир типирлаб дарҳол тинчиди. Сўнг маъшуқни ҳам унинг ортидан пастга итқитдилар. Йигит бир пас тўлғаниб, типирлаб сўнг жон берди.

Бобораҳим икки парчиниланиб ётган гавдага сўнгги марта қарадиу негадир кўнгли музлаб масжид ҳовлисидан қочиб чиқди.

Ушанда югурга-югурга шаҳар чеккасидағи мозорликка бориб қолди. Мозорнинг бир текис сувалган қабрлари орасида узоқ дайдиб юрди. Ҳеч титроғи босилмасди. Унинг эси оғиб қолганга ўшарди. Сўнг алла-қандай қабрга суялиб ўтириб узоқ пиқиллаб йиглади. Одам умрининг бунчалар увол ва омонат эканлигини у биринчи марта шунда ҳис қилди.

Унга дунёдаги энг тинч жой мозор бўлиб кўринди.

Бобораҳим шу кундан эътиборан кўп вақтини мозорлар орасида кезиб ўтказадиган одат чиқарди. Үртоқлари билан ўйнагиси келмасди. Онаси уни қидирақидира кеч говгум деганда шу ердан олиб кетарди.

Фотиҳа ўқигани келган басавлат киши ўша хотиннинг эри эди. Уни Бобораҳим кейин сира кўрмаган. Лекин қумдай оқариб кетган чеҳрасини эслаб қолган. Хотинни минорадан ташлаганида у қалт-қалт қилиб ерга ўтириб қолган эди...

Бобораҳим қабрлар орасида тиэ чўкиб ўтиради-да, бор овози билан қичқиради:

— Гуноҳларингни беринглар! Гуноҳларингни менга беринглар! Эй одам ўлдирғанлар! Гуноҳларингни менга беринглар! Бобораҳим ҳазрат Хожа Баҳоваддин одамларнинг барча балоларини бўйнига олганлигини отасидан эшигтан эди.

У бугун икки ноком мурда устида туриб, одамларнинг гуноҳларини бўйнига олгали аҳд қилди. Унинг мурғак юраги тубинга поёнсиз бир маъюслик чўкди.

Дам-бадам титрашлик, варажага тушмаклик шу кундан эътиборан унга одатий ҳол бўлиб қолди.

Бобораҳим урён юради. На эгнига боқади. На бошига.

Кўп ўтмай уни девона деб чақирадиган бўлдилар.

БОБОРАҲИМНИНГ САРИҚ ГУЛЛАРИ

Езниинг бошларида богининг аёғидаги қизил жоноқи олмалар пишди. Хожам гарчи нафсига бандиликдан қутулган бўлса-да, лекин бу қизил олмаларнинг пишишини сабрсизлик билан кутади. Нечукдир уларни ёлгиз Бобораҳимга тердиради. Бобораҳимдан ўзганинг қўли теккан олмани емайди. Шунинг учун савр ойи ўтгач, Бобораҳимни йилқидан озод қиласди ва уни таҳсилга ўтқизади. Бобораҳим таҳсил ва зикрдан ҳоли бўлган кезлари боққа чиқиб кетади. Бое жуда катта, поени йўқ. Богни бир қулочдан мўлроқ тезоқар ариқ айланиб ўтади. Богининг олд томонида икки улуғ кўшк ва икки баланд супа ва супалар ёнида икки кўк ҳовуз бор. Боққа хизматкорлар, боғбон, чўпон-чўлиқ турадиган улкан ҳовлидан ўтиб кирилади. Ҳовли карвонсаройга туташ. Карвонсаройнинг кунботар томонига эса баланд ва улуғ ўймакор масжид тушган. Масжиднинг рўбарўсида оқ тошлиардан солинган кўркам хонақоҳ. Хонақоҳнинг кунчиқарга қараган кенг ҳовлисига қатор-қатор қилиб анор ва анжирлар экилган. Анорларнинг ҳам, анжирларнинг ҳам баргидан ҳосили кўп. Ана шу анжирзор боғчанинг этатида муллавачча ва шогирдлар пирдан таҳсил оладилар. Таҳсилхона детанимиз баланд баҳаво айвон ва айвонининг ичкарисида юз чоғли одам бемалол жойлашадиган жамоатхона. Айвонга ҳам, жамоатхонага ҳам бир неча қават қилиб қип-қизил гиламлар тўшалган. Бунда дунёнинг турли чеккаларидан келган, ўз иктиёри билан Хожамга муридлик йўлини тутган юздан ортиқ муллавачалар таҳсил кўрадилар. Улар фиқҳ, тасаввуф, фалакиёт ва тиббиётга онд билимларни ўзлаштирадилар. Хожам ҳар ҳафта уч кун шогирдлар билан савол-жавоб қиладилар. Икки кун савол-жавоблардан сўнг сулук хусусида ваъз айтадилар. Ҳафтанинг қолган уч куни муридлар қалъя ва унинг атрофларидағи узоқ-яқин қишлоқларда қаландарлик қиласдилар. Зикр тушиб ҳалқни Ҷаббори оламнинг адолати ва ҳукмидан огоҳ эта-дилар:

Бугун пайшанба эрталабки савол-жавобдан сўнг

Хожам Бобораҳимни имлаб ҳузурларига чорладилар-да, боғда қизил олма етилгандир бўтам, жавзо забтига оладур. Териб чиққил,—дедилар.

Бобораҳим икки қўлини қошига теккизди ва қуллуқ қилиб, ташқарига чиқди.

Бобораҳим боғга туташ солинган уйдаги ўзига ажратилган алоҳида ҳужрасига кирди. Бир зум унугтан нарсасини эсламоқчи бўлгандай уй ўртасида ҳаракатсиз туриб қолди. Яна қулогида ўша сирли товуш: тинг! тинг! Ичолинг! Ичолинг! Ичолинг бодани гуллар сўлиюр... Умримиз! умримиз! умримиз оқибат тупроқ бўлиюр... Ким, ким айтган буни? Нега неча кундирки дилимни, тилимни ёқади бу сўзлар?

Бобораҳимнинг хаёли бирдан ёришди. Унугтан нарсасини эслади. Боққа танбурни олиб чиқмоқчи эди. У сават ва танбурни кўтариб ҳужрадан чиқди.

Ариқ ёқалаб анча юргач, бөғ этагига тушди. Бу ер хилват ва ғоятда сўлим. Ариқ лабидаги қатор жоноқи олмалар ҳақиқатан ҳам қизариб пишган, ҳатто тагига ҳам туша бошлаган эди. Атрофни жуда нафис олма ҳиди тутиб кетганди. Бир зумда бу муаттар ҳид Бобораҳимни маст қилди. Унинг боши айланиб кетди. У ҳолсизланиб ариқ бўйига олма тупига елкасини суюб ўтириди. Олмазорнинг пасти жийдазор кета кетгунча. Жийдазор эса кўз илғамас олисларда оқ теракларга уланиб кетади. Жийдазор ва оқ тераклар шунчалар қуюқки, улардан атрофга аллақандай ифодалаб бўлмайдиган бир ёғду таралади. Балки шунинг учун бу ерни Ёғаду дейдилар!—хаёлидан ўтказди Бобораҳим. Ёғаду! Ёғаду! Ёғаду! Ҳой, Ёғаду! Вой, Ёғаду! — деб такрорлай бошлади у тили ва танглайига бу сўз жуда татти туюлиб. У ҳайрон бўлади: доим тилига тонг аzonдан қандайдир бир сўз, ибора ёки жумла шундай ўрнашиб келади-да, сўнг ҳафталар бу сўз ёки жумлани тўхтовсиз ва дуч келган ерда такрорлайверади. Бирон ҳафталар бу сўз уни ҳоли жонига қўймайди. Тинмай тилига қалқиб чиқади. Маълум бир оҳангда такрорланаверади. Баъзан пир билан савол-жавоб кезлари улар беихтиёр оғзидан чиқиб кетади. Барча унинг оғзига ҳайрон бўлиб тикилади. Хожам ўзига хос юмшоқлик билан:

— Бўтам?..—дейди саволомуз.

зур кўрингиз, тақсир, бехослик...

— Ҳеч...—дейди хижолат чекиб Бобораҳим.—Маъ-

— Бекос нарсалар ҳам ўз ўрнида хосдур! — дейди Хожам. Бобораҳим бошини эгади. Хожам яна Абдулҳамид Фаззолийнинг Баёнларини шарҳлашга тушадилар.

Абдулҳамид Фаззолий ҳақида Бобораҳим илк бора марҳаматли пири Бозор охундан Наманганда эшигган. Бозор охундни эслаб Бобораҳимнинг кўнгли бузилди. Наманган, Қўқон, ота қишлоғи Андугонни эслади. Қайдо-ховв? Қайдо, у ота юртлар! Негадир юраги қаттиқ сиқилди. Бир ойдан бери бу ерда ўзини қўйгани жой тополмайди. У ўзининг бир ерда узоқ туролмаслигини билади. Жаннат бўлсин, Макка бўлсин, Мадина бўлсин, Қуддус бўлсин, йўқ, узоқ туролмайди. Унинг юрагининг ришталари бир жойга боғланган эмас. Унинг юрагининг ришталари бутун оламга, рубъйи маскуннинг барча нуқталарига тортилган. Ришталар тортилган ерларга бормагунча ва у ерларда Адолатнинг каломини айтмагунча, у ерлардан ўтган улуғларни ёт этмагунча унинг юраги тинчимайди, жони ором истамайди. Бўлмаса, Хожамнинг боғу боғотлари, Қашқар, Еркан, о, Ҳуттанинг қири адирлари жаннатдан камми? Жаннат шу! Жаннат шу! Лекин менга жаннаг керакми? Мен жаннат қидирайми? Дардманлардан юз ўгириб, хонақоҳнинг салқин пучмоқларида тиловатга берилиб ўтирайми? Айтмоқчи, Бозор пиrim... Кўзлари ёшлик Бозор пиrim... Бобораҳимнинг хаёлхонасида шу тоб бир воқеа ярқ этиб кўринди.

Уша куни Бозор пиrim Фаззолий «Иҳёсиининг муҳаббат, маҳзунлик, шодлик ва баракот бобини узоқ тушитирдилар. Муҳаббат фақат Худога чиндор, дедилар ва Фаззолий Баёнидан бир ривоят келтирдилар. Парвардигори олам Мусога қараб айтди: «Мен касал бўлдим, сен келиб мени кўрмадинг». Мусо деди: «Қандай қилиб, ё Раҳмон?» Парвардигори олам айтди: «Менинг бандам—фалон кас оғриб ётиб қолди, сен эса уни бориб кўрмадинг. Агарда уни бориб кўрганингда, мени ўша ердан топган бўлардинг...» Бозор пиrim ривоятнинг охирини айтди-ю, оҳ деб ўтирган ерида ёнига қулади. Барча шогирдлар аввал анграйиб қолдилар. Сўнг уч киши шаҳд ўрнидан турди. Пиримни сяяб ўтирдилар. Кимдир муздай сув келтирди. Рўмолни ҳўллаб унинг пешанасига босдилар. Бозор охунд бироз ўтгач, ўзига келиб кўзини очди:

— Ана жамол! Ана жамол! Болаларим! — деди ў. Сүнг айтган сўзидан қувват олдими, туриб ўтириди. Қаддини ростлади. Кўзёшларини артди.

— Бобораҳим! — деди. — Кел, мунда ўлтири! — У Бобораҳимни ёнига чақирди. Бобораҳимдан ўзга ҳеч кимга у бундай илтифот кўрсатмас эди. Бобораҳим олдинги қатордан туриб пирниңг ёнига оҳиса чўкди. — Ўқи! — деди пир.

Бобораҳим икки қўлини икки қошига қўйди. Ўрнидан туриб пирга таъзим қилди, сўнг ўзи каби муллаваччаларга енгил эгилиб қуллуқ адо этди. Сўнг пир кўрсатган ерга яна чўкди. Кўзларини юмди ва бошлиди.

Бобораҳим бир ўқишига тушса, тўхтамасдан соатлаб ўқирди. Ҳазрат Навоийдан бошлаб, Лутфийга, ундан ҳазрат Атойи ва Саккокийга, улардан Оқ сарой ва Кўк сарой шоирларига, улардан Румий, Насимий, Жомий, Деҳлавийга ўтарди. Саъдий ва Ҳофиз девонларини, «Шоҳнома», Навоий «Ҳамса»сини ёддан биларди ва ҳеч тутилмай ёд айтарди. У ўқигандан ҳамматаанг қотиб қоларди. Овозида аллақандай киши руҳини бутунлай ром қиласидиган шира пайдо бўларди. Лекин одатий сўзлашганда, жуда оддий, ғоят оҳиста сўйлар, сўзларни дона-дона қилиб, чертиб айтар ва шунинг учун ҳар қанча секин сўйлаганда ҳам, албатта, тингловчи уни аниқ-равшан эшитарди.

Бобораҳим ўзи билмасди. Лекин ҳар бир шоирниң газалини алоҳида фақат шу газалга ярашадиган ва шу газалниң яширин моҳиятини очадиган бир оҳанг билан ўқирди. Айниқса, Навоий ва Саъдий газалларини ўқиганда, унинг товуши фавқулодда сеҳрли унга айланарди. Одамлар оҳ-воҳ қилиб ўринларидан тура бошлар, бошлари, елкалари, бутун вужудларини шу ғалати оҳанг йўлига солиб тебрана кетардилар. Бобораҳим охирида ўз газалларини ўқирди. Дарё дарёга қўшилгандай унинг газаллари улуғларниң абётларига уйгун ва тेरаи бир оқимда қўшилиб кетар, нимаси биландир уларни тўлдирап ва нималари биландир уларни давом эттирап, аллақайси томонлари билан уларни барчаларидан ажralиб турарди. У пайтлар ҳали Бобораҳим газалларига исмини қўймасди. Лекин тингловчилар бари бир аллақандай ўзинга хосликдан Бобораҳимниң шеърини ажратиб олардилар.

Бу ғазалларнинг кўпини у отаси билан узоқ қиш кечалари иссиқ танча четида ўтириб ёд олган эди. Отаси эски девонларни авайлаб варақлаб хаста товушда ўқиркан, Бобораҳим рўбарўсида ўтирган онасининг чеҳрасига тикилар, онасининг ғоят нафис юз чизиқларига маҳлиё бўлар, бу гўзал чизиқлар ғазалнинг шикаста оҳангларига қўшилиб унинг беҳад ўткир ҳофизасига бетўхтоз нақшланиб борарди. Назаридан бу ғазалларнинг бари онаси ҳақида айтилгандай эди. Бобораҳим онасининг чеҳрасига суюб қараб, унда жуда кўп ғалати кашфиётлар қиласарди. Онасининг икки ёноғи шунчалар чиройли эдикни, улар худди беҳад нозик ишланган чиний кўзачаларга ўхшаб кетарди. Бу кўзачалар доим кўз деган булоқнинг ёнида турарди ва у кўзларга тенгсиз бир тилсум бағишиларди. Онасининг жуда нозик сарғиши оппоқ юзини у сариқ садбарг гулга ўхшатарди. У ҳар қачон ва ҳар қайдада ғазал ўқиса, вирди забон қиласа, кўз ўнгига онасини, онасининг ёноғидаги икки нафис кўзачани келтирадан ва шундан дилининг тубида ифода қилиб бўлмас бир сеҳрли овоз дунёга келарди.

— Жадий охирлаб, далв кира бошлаган қиш чоғларида кечаси билан гупирлатиб қор ёғади. Атроф қор ёғдуларига тўлади. Қор тўпиқдан кўтарилилган, у тинади. Осмон чарақлаб очилади. Юлдузлар тиниқ порлайди. Мана шундай юлдуз порлаган жадий кечаларида кўкка ўйнагани парилар чиқишади,—деб эртак айтарди унга онаси.—Улар юлдузларнинг шуълаларига қараб тинимсиз хандон отиб куладилар. Шунда уларнинг кўкракларидан жаранглаб дурлар сочилади. Бу дурлар ерга тўкилмайди. Балки одам бўйн баравар кўкда муаллақ осилиб қолади. У дурлар кўзга кўринмайди. Фақат кўзи ва дили энг тоза одамгина у дурларни пайқайди. Кўзинг ва дилингни доим тоза тут, Раҳимжон ўғлим. Кўдан ёғилган пари дурларни кўриш сенга насиб бўлгай.

Бир куни Бозор охунд қошида илк маротаба «Биродарлар, мен ушбу кеча Мажнундин назар тондим» деб бошланадиган ғазалини ўқиди.

Ғазал охирига етганда Бозор охунд ҳўнг-ҳўнг йиғлади. Тўни қўйнидан катта қийиқласини чиқариб, юз-кўзларини узоқ артди.

— Бобораҳим,—деди ниҳоят йиғламсираган товуш-

да.—Сенга энди ўзга раҳбар керак. Қани, охирги байтингни яна бир қайтарчи, бўтам.

Бобораҳим ўқиди:

— Нетай, зебо санам, жоноки, ҳеч ким раҳбар бўлмас,

Адаштим, йўл йитирдим, не паёму не хабар топдим...

— Ана! Ана!—деди узун қўлларини олдинга чўзиб Бозор охунд.—Елгиз раҳбар яратганинг ўзири. Лекин Фаззолий ривоятида айтилгандаи, Яратганинг йўли бандаларининг кўнгилларидан ўтади, бўтам, Бобораҳим! Сен эмди бизнинг қўллимиздан ва ихтиёrimиздан чиқдинг. Сен эмди дунёга сигмайсан. Бўтам, сенинг рамузининг йўлдир. Яна Мажнундир. Яна валий Мансурдир... Сен доим йўллар ва манзилларни қидириб ўтасан. Сен яратганинг ҳақиқатини қидирасан. Уни қидириб сен оламнинг хасталигини ўз бўйнингга олажаксан... Ўзингни дардманларга балогардон қилурсан. Лекин унгача ҳали анча вақт бор. Кўп ўтмай савр кирав. Мулки Қашқарга карвон боражак. Сен шу карвон била жўнайсан, бўтам. Эмди Опоқ Ҳожам ҳазратига юкинурсан. Дардингга шояд ул зоти бобаракотдан чора топурсан. Лекин... боягина абётда ушбу кеча Мажнундии назар топдим, дедингким, ул недир?

Бобораҳим сўйлагали оғиз жуфтлади. Лекин пирга шогирдлар олдида туш айтиб ўтириш болаликдай туюлишини англади.

— Мажнун хаёли мени таъқиб этаётир, пирим,— дея олди у. Ўша йили савр ойи у катта карвон билан Қўқон, Андижон, Ўш, Саритош орқали Улуғчот дово-нидан ўтиб Қашқарга келди. Музли тогларининг буюк ҳайбатини кўрди: Бобораҳим қўрқув ҳисеи нималигини билмасди. Гоятда чайир, кучли йигит бўла бошлиган эди. Улуғчотга не машаққат билан кўтарилиларидан Бобораҳим бу ақл бовар қўлмас ҳайбат ўтрусида бирдан ўзни овози бутун туркӣ әлларни тутган сарбалаңд шонир деб тасаввур қилди.

Мана иккинчи йилга қараб тортди унинг Қашқар таҳсили. Пир гоҳ худ, гоҳ бехуд. Замонининг ўткиничи ишиларига кўп бош қўшадир. Муридларни ҳали ёш деб йилқига жўнатадир. Лекин назари ўткир. Унинг кўзи-дан ҳеч нарса қочиб қутулмайди. Бобораҳимга кўп илтифотлар қиладир. Унинг абётларини савод-жавоб кезлари атай ўқиттириб мунг ила қулоқ осадир.

— Бўтам, абётларингни шўх ва мунглиғ ёзасан.

Битикларингда Худоининг тўғри йўлини қидирасаи. Фақат қўрқаменки, исёиларингда ифрат жўшқинлик бор. Андин ўзингни барк тутгил.

Бир кез Хожам илтифот айлаб, Бобораҳим бир қур янги битган газалларидан ўқиганда, унга янги чакмон тўи, бир хачир ва бир гоятда нафис ясалган танбур тортиқ қилди.

— Ҳақиқат майидан доим маству мустағрақ бўлиб юргайсан. Абётингни энди Машраб исми бирлан битигил, — деб оқ фотиҳа берган ва барча муриду уламолар бунга омин деган эдилар.

Ушандан бери Бобораҳим таҳсилдан озод чоғлари Қашқарининг машҳур созандаларига қўшилиб мақом йўлларини ўрганди. Ажабки, у мақомларни жуда тез ўзлаштириб олди. Мақом куйларини қанча севиб чалса, дилида газаллар шунча жўшиб, лаззатли титроқлар ичидаги қуюлиб келарди. У оз вақт ичидаги най ва уд чалишни ҳам хўб ўрганиб олди. Созандалар унинг кўп газаллари, мухаммаслари, мустазодларини мақом куйларига солиб айта бошладилар. Бу оташин газаллар шўх-шаш Қашқар элида ва ундан ўтиб бутун Фаргонаю Шошда шуҳрат тутди.

...Бобораҳим қизил олма тагида танбурни олма шохига илиб қўйганча узоқ хаёлга толиб ўтирди.

Сўнг олмаларни тўкиб юбормаслик учун шохларга авайлаб оёқ қўйиб, даракт тепасига кўтарилиди. Энг юқори айри шохга ўрнашиб тепадаги байни лоладай қизариб пишган нақш олмаларни саватга тера бошлади. Бир пасда сават қизил олмаларга тўлди. Даражат устидаги олманинг ҳиди янада ўткирроқ, янада муаттарроқ эди. У пастга тушмоқчи бўлиб турган эди, шу тоб яқин ўртада жийдазор ва теракзор томондан булбулнинг жарангдор чахчахлаган овози эшитилди. Бобораҳим ўзича мақомларни булбул яратган, одамга уларни чалишни булбул ўргатган деб юрарди. Богнинг жимжитлигида булбулнинг хониши шу қадар теран янгарар эдики, гўё оламда шу жигарсўхта кўйдан ўзга ғам, ўзга шодлик, ўзга ўйни йўқдай эди. Бобораҳим кўзларини юмди ва аста оёғи турган айри шохга ўтирди. Шохлар орасига яхшилаб ўрнашгач, у кўзини чирт юмган кўйи ўзини сайраётган булбул ўрнида тасаввур қила бошлади. Бобораҳим ўзини ўзи севган нарсалар ичидаги ёки ўзини уларнинг ўрнига қўйиб тасаввур қилиш ва хаёлида тасаввурининг сувратларини чизишни

жуда ёқтиради. У шу тобда дилини булбулга күчирдию, шу билан бор дунёни унуди. Билмайди шу алғозда дараҳт тепасида қанча ұтири. Бир замон оғи остида олма тағида недир тингир-тингир қилаётганини ва бу товуш борган сайин булбул сайроғини босиб кетаётгандыгини ҳис қылди. Бобораҳим ҳуши ұзига келиб пастга қаради. Пастда қизил рүмөл үраган, қизил нимча ва қизил күйлак кийған үн уч ёшлардаги бир қыз уннинг танбурини шохдан олиб ҳавас билан оқиста чертарди. Бобораҳим шарпа берди. Қыз уннинг шарпасын дарҳол сезди. Бошини күтариб шохлар оралаб дараҳт тепасига қаради. Уннинг катта-катта қора қиёнк күзларыда алланима йилт этиб кетди.

— Муллака, бизнинг саватимизни ҳам қизил олмангизга түлдириб бермайсизми? Ойимлар олма тиляшяпту.

— Ҳозир, ҳозир, бош устига,—деди Бобораҳим ва үнг құлинин қоши устига қўйди. Сўнг олма шохларини ларzon қилмаслик учун оқиста пастга тушди. Қўлндағи олма тўла саватни ерга қўйди ва қизнинг рангии чўплардан чиройли ясалган саватини олиб яна олма устига кўтарили. Саватни бир зумда сара олмаларга түлдириди.

— Бу танбур сизникими, муллака? Танбурингиз чиройли экан. Қыз йигитнинг жавобини кутмай саватни қўлига олди ва аста ариқ бўйлаб юра бошлади. Саватни эшиккача элтиб берай, қийналади,—деб ўйлади Бобораҳим ва қанчалик қиснинмасин, қыз ортидан юриб саватни уннинг қўлидан олди. Қыз ортиқча эътиroz билдириб ўтирмади.

— Муллака, сизни Намангандан келган дейишаду, тўғрими?—У яна саволига жавоб кутиб ўтирмай сўзлай бошлади:—Мен эса Үшдан келгашман. Отам мени пиримга назир қилган. Икки йилдан ошди бу даргоҳга келганимга.... Сизни қирда лола сайлида кўрганман. Кўп ғазал айтишган әдингиз.

Бобораҳим қизлар билан сира гаплашиб ўрганимсан. Лекин пирининг чўри ва канизаклари бемалол, әркни юришади. Уларни ҳар куни юмуш юзасидан кўради. Лекин шу қадар одамга ёқадиган саволлар берадиган ширин тил қизни биринчи кўриши.

— Муллака, нега сизни девона деб чақиришади? Ҳечам девонага ўхшамайсиз-ку?

Бобораҳимнинг жавобини кутиб ўтирмай ўзи жавоб беради:

— Девоналар яхшими? Девона эмасларми?
Яна ўзи жавоб беради:

— Менга қолса, девоналар яхши.

Улар кунжакдаги аҳли аёл истиқомат қиласидиган ҳашаматли иморатлар қатор-қатор жойлашган чиройли ҳовлига қарата очилган боғ эшикка етиб келдилар. Бобораҳим саватни қизнинг қўлига тутқазди. Шунда қўли оловга похос тегиб кетгандай жазиллади ва дарҳол қўлинни тортиб олди. Ва шитоб билан боғ ичкарисига кириб кетди.

Бобораҳим дош беролмади.

Боя олма тепасида туриб қизнин юзини кўрганда, унинг иккни ёноги бениҳоя нафис исалгани кўзача каби ўта нозик чизиқча ҳосил қилганини кўрган ва юраги ногаҳон титраб кетганди. Ҳозир мана саватни унинг қўлига тутқазаётуб яна иногоҳ унинг чеҳрасига кўз қирини бир зум ташлади ва бу оқ-сариққа мойил қирғизчароқ чеҳра дунёдаги барча энг нафис кўзачалардан ҳам гўзалроқ ва оташинроқ эканлигини кўрди. «Садбарг... сариқ садбарг...»—хәёлидан ўтказди у. Зумда онасини эслади ва кўз ўнгига келтирди. У қизни шу заҳоти, шу тобда яна кўргиси келди. Унинг лоларуҳ юзига тўйиб-тўйиб қарагиси келди. «Онамнинг иси келаётир,—деб ўйлади у.—Онамнинг иси келаётир... Ўзинг кечир, раббимо».

У гўзал нарсаларни кўрса титраб дунёга сиғмай кетарди.

Бобораҳим яна ўзининг ҳеч қаерга сиғмай бораётганини ҳис қилди. Бу тароватли олмазор, бу қушлар хониши, бу Кубро, Ғаззолий ва Аттор ҳақидаги саволжавоблар — ҳамма-ҳаммаси ҳеч нарсага кераксиз, арзимас ақл ўйинлари бўлиб, инжиқлик, сохтакорлик бўлиб туюлди унга.

Эртага у пирнинг кўзинга қаролмайди. Нигоҳига дош беролмайди. Эртага у пирга боғланниб ўтиролмайди.

Йўқ-йўқ кетмоқ керак. У йўлларга ғазаллар айтади. Тунлар оқ теракларнинг устига циқиб тўлган ойга қараб ҳеч тўхтамай байтлар ўқииди. Дунёнинг барча байтларини ойга айтади. Вайроналарга айтади у ғазалларини, вайроналарда хийп-хийп деб улаётган чуғзлар билан баравар маснавийлар ўқииди. У ўзи каби

дармандлар ва жигар-бағри куйганларни ахтаради. Улар билан дунё богининг йўлларини кезади. Уни бекор девона демайдилар. У йўлларнинг девонаси. Йўлларга, самоларга тинмай ўқилатурғон маснавийлар — мунглиқ байтлар девонаси.

Бобораҳим шу куни ва яна бир неча кун ўзидан ўзи «Кўрдим юзунгни...» деб тўхтовсиз такрорлаб юди. Сўнг бирдан қизилга бурканган ва унинг олдида бир пас қизил капалакдай парвоз қилиб борган, ҳавойи, эркни қизининг: «Девонамисиз?»—деб сўраганини эслади. Ҳа, девонамац, девонаман, деб қайтараверади. «Сен ахир девоналарни яхши кўрассан-ку...» Сўнг тунда танбур машқ қилиб ўтириб, бирдан сўзлар ўз-ўзидан қуюлиб келди:

— Кўрдум юзунгни девона бўлдум...

Шу кечада Бобораҳим яна Мажнунни туш кўрди. Мажнунининг юзи икки кўзачага ўхшарди. У кўзаларга Мажнун кўзларидан ёш қуюлиб оқар, кўзачалар тўлиботшиб тинимсиз Мажнун кўксига шовуллаб оқарди. Мажнун баланд қир устида ўтирап, унинг орқасида худди Бобораҳимниңига ўхшашиб йилқичиларнинг кўк ўтови қурилган эди. Мажнун ўтовга қарамас, оёғидан минг тешик бўлиб кетган чоригини ечиб ҳадеб ерга уриб қоқарди. Чориқ ичидан ҳеч нарса тушмасди. Лекин Мажнун йиртиқ чориқ ичига гўё саҳроларнинг кумлари тўлгандаётин тўхтовсиз ерга уриб қоқарди. Пиртиқ чоригини ерга уриб қоқаётган Мажнун Бобораҳимнинг хаёлига қаттиқ ўрнашиб қолди. Кейин Бобораҳим яна бир туш кўрди. Унда Мажнун ўша йиртиқ чоригини Бобораҳимга берди. Бобораҳим шу заҳоти уни чўлларда ёрилиб кетган оёғига кийиб олди.

Неча замонлар ўтиб Бобораҳим бу чориқни Балхда дод тагида чўнкайиб ерга қоқиб ўтиреди. Чориқ энди илма-тешик бўлиб кетган, лекин ҳали кийса бўларди...

АМИР АЛИШЕРНИНГ ТАВБАСИ

Фалакининг эврилишиданми ё бошқа, билмай қоласан: Баъзан атрофингни сенга ёт нарсалар қуршаб олади. Расталардан аста-секин сен харидор нарсалар йўқолади. Қадим-қадимларда бир нозанин чўри бозорда айтгандай: Сен сўймаган харидорлар пайдар-пай келади. Сен сўйган харидор эса топилмайди.

Саройда шоҳнинг энг яқин мулоғимлари тавозеда аввалгидаи заррача эътиносизликка йўл қўймасаларда, лекин қўзларини сендан олиб қочадилар. Шоҳ эса ҳеч нарсани билдиримайди. У ҳамон ўша-ӯша ўзи ни сенга мурид санайди. Лекин мамлакат ишлари маслаҳатига сени аввалгидаи дам-бадам йўқлатмайди. Баъзан вазириниг шоҳ билан узоқ-узоқ хуфия суҳбатлари устидан чиқасан. Салтанатда сендан хуфия ишлар пайдо бўлдими, билгилки, энди сенинг хизматларинигга муҳтож эмаслар.

Навоий шоҳларниң илтифоти огу эканлигини билади. Бу оғуга ўрганган одам уни дам-бадам қўмсаши табиний. Тинмай шоҳнинг илтифотини қозониш йўлларини қидиради. Бу илтифот шу қадар лазиз, шу қадар ширинки!.. Уннинг домига илинмайдиган одам кам! Камдан кам! Бу илтифот илинжида юрувчилар эса кўп! Ҳаддан зиёд кўп! Улар бу илтифотга эришгунларича ўзларини ҳаддан ташқари ногинч ва баҳтсиз сезадилар. Илтифотга эришгач эса, бошлари осмонга етади, оламда улардан ҳам баҳтиёрроқ зот йўқ! Гўё кўкнинг саодат ёғиладиган мовий дарвозаси очилиб, ундан сенинг қўранг сари мислсиз бойлик ортган карвонлар шоҳона оқ отлар етагида тўхтовсиз етиб кела дилар. Қандай ширин бу илтифот!

Лекин ҳамма бало шундаки, сен бу бойликлар, иногатлардан роҳатланиб улгурмайсан. Қазонинг қиличи бошқа чопарлар, бошқа отларни сенга жўнатади. Сени хашиб-паш дегунча ё қатл этадилар, ё бадарға қиласадилар, ё мол-мулкинг талон-торожда қолади. Ана ўшанда шўрлик илтифот шайдосининг аҳволини кўринг! У нималигини англаб етар-стмай ўзини жаҳанинам қаърида кўради.

Шоҳ илтифоти шунчалар нозик, шунчалар заҳарли! Энг буюк, энг одил шоҳларниң илтифотларига ҳам шу ғаройиб оғу омухта.

Ҳа, шоҳларниң илтифотлари тез сўнади. Сўнса ҳам гўрга! Ундан ҳам баттар! Илтифот нафрратга айланади. Шоҳларниң илтифот ва нафрратидан доим қон иси анқийди. Алҳазар! Алҳазар бу илтифотлардан!

Навоий то Дарвеш Алиниң кутилмаган саркашлигига қадар нечукдир ўзини Ҳусайн Бойқаро билан бир одам деб биларди. Шоҳнинг нозик бир қарашидан ва бу қарааш сарой аҳли учун қанчалар катта аҳамият-

га эта эканлигини сездики, бу янглиш экан, ҳеч қачон шоҳ билан бир одам эмас эканлар! Бир одам бўлолмас эканлар! Навоий ҳеч қачон шоҳ манфаатидан ўзга манфаатни хаёлига келтирмаган эди. Шоҳ ҳам шундай деб билса керак деб юради. Бу борада ҳеч қачон заррача иштибога борган эмасди.

Лекин унда бу сопуқчиликлар қаердан сизиб чиқяпти?

Навоий бирдан миясига келган кутилмаган фикрдан ҳаяжонга тушди: «Наҳотки мен ҳам шоҳининг илтифотлари соясида, шу омонсиз огуни ичиб яшашга ўрганиб қолган бўлсан? Наҳот менинг ҳаёт-мамотим шоҳининг нogaҳон қоси чимиришию лабининг четида ўйнайдиган кинояли табассумига боғланниб қолган? Наҳот мен шу ёшгача улуғ даргоҳдан илтифот кутиб яшадим? Ахир бирорининг илтифотига суяниб кун кўрган одам илтифотининг сути камайса, қандай аҳволга тушади?

— Ҳиридан кетмоқ керак,—деб тез-тез шу ҳақда ўйлади Навоий.— Ҳиридан кетмоқ керак. Қирқ бешга чиқиббиэ. Лекин роҳат айёмида роҳатимиз ҳаром бўлибдир. Фароғатимиз салтанат юмушларига зое ўлмиши.

Навоий ҳеч қачон қўрқув деган нарсани билган эмас. Лекин саройда яқин кишиларнинг ўзларини ундан олиб қочаётганиларни уни ортиқ даражала қийнайди. Темуринизодалар ҳамон илгаригидек шижоатли, закий ва ўта саковатли эсалар да, лекин шоҳининг майшатга тобора мук тушаётганидан, шаҳзодаларнинг ҳаддан ортиқ бачканга низоларга кун-бакун бошлари билан шўнгигиб, майдага низолар атрофига майдага кимсалар кўпроқ йигилиб бораётганидан юрагига қон бўлади, айниқса, мирзоларнинг аянчли бир тарзда майдалашиб чиранчоқ бўлиб кетаётганиларни ҳар дамда ҳис қилиш жуда-жуда оғир. Темуринизодаларнинг қуёши май ва низо ичига ботиб турур. Конга ғарқ бу қуёшини ким куткарур? Ким уни яна авжи фалакка кўтарур? Во ажаб! Барча шаҳзодалар уни ўзларига пир деб биладилар. Унинг барча абётларини ёд тутадилар. Унинг панду насиҳатларига қулоқ осадилар. Лекин салтанат шавки уларнинг қонларида ҳар дам тўхтовсиз жунбушига келадун. Салтанат шавки конда гупургандла ҳар қандай доно сўз, ҳар қандай пири муршид унут бў-

ладур. Гүёким ҳар бир темурийзодаким, дунёга келадур, она қорнидан қилич яланғочлаб тушадур. Ашъор айтадурлар, ашъор тинглайдурлар ва қон тұқадурлар. Мирзоларнинг қуввати ҳарамларда йитадур. Мирзоларнинг шавкати ҳарамларда ётадур. Ҳарамларда ўладур. Шоҳларнинг умри битаётганды үларнинг тевараклари иш қаланғи-қасаңғи майда ҳашаротлар ўраб оладилар. Булар шоҳнинг инқизозини тезлаштирадилар. Фондлар шоҳ атрофидан четлашадилар. Улар бириңириң үзға юртларга бош олиб кетадилар. Е саройдан буткул узоқлашадилар. Давлат идора ишлари бир тұда шұхратнараст қаламушларға колади. Улар шоҳнинг ва шақоздаларнинг занфлашиб бораётганидан фойдаланыб, мамлакатни, әл-юртни тағайидилар. Бог-бұстонларни кемирадилар. Қадим шақарларни емирадилар. Шоҳ үзідан ақли анча паст одамларни атрофига йигади. Ақли қосирлар билан кенгаш қуради. Улар орасыда ўз ақлидан маминын бўлиб ўтиради. Гурурини турли алдамчи йўллар билан алқайди. Менинг боболарим барни темурийлар салтантининг гуллаб-яшинаши учун жон куйдирғанлар. Эл-юрт орасыда мустаҳкам ва шаръий тартиботни йўлга қўйганлар. Менинг боболарим темурийлар давлатининг барча катта-кичик сирларидан воқиф ва ҳар ишга чорасоз эдишлар. Мен темурийлар хонадоннининг энг сўнгги яқиниман ва энг сўнгги чорарасиман. Мендин сўнг темурийзодалар хонадонларида мирлар хонадонларидан маҳодим бўлмагай. Бизнинг хизматимиз битган ўхшайдур...

Ҳали султони мансурининг билагида күч, юрагида дөн кўп. У ҳали ҳамон үзини қўлга олса бўлур. Лекин ҳарамнинг тегирмоини унинг бутун вужудини сўриб олади. Қувватилии қайтариш учун эса тинмай манишат қиласди, майхўрлик билан барни дардларини ювмоқчи бўлади. Баковулга улфат ва сирдош тутинади. Баковул... баковул...

Навоий икки-уч ой бурун бўлиб ўтган бир таажжуб воқеани эслади. Юраги қаттиқ сиқилди. Шармисорлик... шармисорлик...—деб пичирлади у.

Атрофини совуқчилик ўраган одам жуда қийин аҳволда қолади. Атрофдаги кўзлардан меҳр ва хайрихохлик кетганинги кўриб у бу кўзларға қандай қараш кераклигини анча вақтларгача англаб етолмайди. Атрофига қаттиқ совуқчилик тушган одам ё неболардан қочиб ёлғизликини иштиёр этади. Ёхуд үзини ўтга-

чўққа уриб саройдаги илгариги мавқенини тиклашга, ҳар қандай қилиб бўлмасин, совуқчиликнинг манбани топиб, душманларини яичиб ташлашга уринади. Шунда у жуда катта хатоларга йўл қўйини мумкин. Сўнг бу хатолардан умр бўйи уялиб, уларни эслаганда ўзини қўярга жой тополмай юради. Е тамом ҳалок бўлади.

Навоий саройдаги совуқчиликнинг қайдан келиб чиқаётганлигини пайқади. Лекин пайқаганини ҳеч кимга билдирамади. Ўзи аста ўзини саройдан четга тортди. Янги вазир ва унинг мулозимлари ишига аралашмоқни ўзига эп кўрмади.

— Шармисорлик... шармисорлик... оҳ, не юзим қаро бўлди...— ўзига ўзи шивирлаб айтди Навоий.

Гарчи орадан бир ичча ойлар ўтган эса-да, ҳамон бу жароҳат битмайди. Ҳамон сира ёдан кўтарилмай демайди. Ҳамон ўша оғриқ. Ўша аlam. Ўша кин...

У воқеанинг барча тафсилотлари хотирасида бунчалар каттиқ муҳрланниб қолганига Алишернинг ўзи ҳам ажабланади.

Нечакида бўлиб ўтди ул юз қаролик? Бир зум ё ўн зум, ё эллик зум? Бир зум... — пицирлади ҳазрат. — Кўз очиб юмгунича... Сўфийлар айтган ҳолга ўхшайди бу бир зум. Ярқ этиб бутун яшаган умринг кўз ўигнингда намоён бўлади. Гўё атоин умрдан хуласа. Навоий «бир зум», «бир зум» деб пицирлаб бирдан бу «бир зум» қаердан келиб қолганинг эслади. Пигитлик айёмининг бошлари Султон Абусаид Мирзоининг қисти-бастидан безиб Машҳадга борган чоғларини, бўғинлари зирқираб оғриб, оғриқнинг зўрига чидолмай бир хонақоҳда йиқилиб ётиб қолгани ва иситма аралаш муттасил: «Бир зум! Бир зум! Бахт бир зум! Тахт бир зум! Утар бир зум!»—деб тўхтовенз такрорлаб ётган чоғлари ёдига тушди. Ўша оғир замонларда ҳам, на Машҳад, на Астробод, на Марв, на Самарқандда бунчалик паришон, ошуфта ва бесарупо аҳволлиққа тушмаган эди. Нега, нега шундай бўлди? Нечун югурди? Ненинг та-масида югурди? Ахир Навоий қачон, кимдан нени тами қилиб эрди? Кимнинг ризқи, кимнинг давлатига бўйин чўзиб эрди? Боболаридан қолган не-не мулку мулкатлар Хурросону Мовароунаҳрининг қайси гўшаларига сочишмаган ва қайси эл-юрт ул мулку давлатлардан баҳраманд бўлмаган экан? Навоий ўз ожизликларини

билади. Ҳар не ожизлиги бор — нозукмизожлиги ва ўжарлигыда бор — буларни Алишер ҳўб жиловлаб олган, унинг ожизликларидан ўзгала ма тириоқча захму зиён етмас, Навоий ўзига икки парса: қўрқинч ва тама мутлақ бегона эканлигини билади. Қўрқинч ва тама одамларни қанчалар хору забун қилганлигини у кичик чоғларидан бери кўп кўргаг. Ва иеки ёзган — ҳаргиз яхшиларни тамадан огоҳ қилган. Хўш, унда ие? Не билан изоҳламоқ керак бу кўргуликни?

Уша жума куни у қулогига дам-бадам чалинаётган узуқ-юлуқ иғвога ўхшаган гап-сўзлардан юраги безиб, барвақт пиёда ҳазрат Абдуллоҳ Аисорий хонақоҳига отланди. Унда ёлғиз ўзи жуда узоқ ибодат қилиди. Ўз муножотига берилиб вақт ўтганини ҳам билмади. Дарвозага қайтганда кўча тўла оппоқ кийинги одамлар масжидлардан жума намозидан тўла-тўда бўлиб чиқиб келардилар. Мусулмонлар Алишерга тизза баравар эгилиб қуллуқ қилиб ўтар, Навоий елкасини енгил эгиб таъзим билан жавоб қайтарарди. У ўз дарвозасига яқинлаганда, иечукдир бирдан орқадан шовқин-сурон эшитилди. «Пўшт-Пўшт! Тарриқу! Тарриқу! Тарриқу! — деб тўрт барзанг гулом кўтарган тахти равон пайдо бўлди. Навоий нима гаи экан деб орқасига ўтирилиб ўтирилмаи тахти равон унга етиб келди.

Кутилмаганди тахти равон пардиси сурилди, кўзлари қийиқ, юзи тухумдай юмалоқ ва сарғиш-оқ хушбичимгина чеҳра кўринди.

— Махдум,—деди оқ-сарғиш хушрўй бу башара,— махдум, бугун ҳазрати Мирзо қошлерида ажаб гапларни айтишиди...

Парда яна сурилди. Хушрўй башара парда ортида гойиб бўлди. Забардаст ғуломлар тахти равонни шиддат билан олиб ўтдилар. Алишер ҳайратдан ҳанг-манг бўлди. «Не гап? Не гап бўлган?»—деб изтиробга тушди. Шунда бир неча ойдан бери давом этаётган, лекин ҳеч учи, сабабини топиб бўлмайдиган иғволарнинг заҳари Алишернинг бошига урди. У ўзининг нима қилаётганини англамади. Бутун азобли ўйларига ҳозир жавоб топилгандай эди. Ниҳоят, мана, гапнинг учи чиқди. Мирзо не деганлар? Мирзо мусоҳиблари не жавоб айлаганлар? Ҳайрми? Ҳатарми?

Алишер нима қилаётганига ҳисоб бермай шаҳд билан ўтиб бораётган тахти равон ортидан юкурди. «Шошманг, махдум! Мирҳожи, тўхтанд! Мирҳожи!...» Забар-

даст гуломлар тахти равонни шитоб билан элтиб бопар әдилар. Тахти равон тұхтамади. Алишер ҳам унинг ортидан югураверди. «Миржохи... Тұхтанг!..» Бироз югуриб борғац, тахти равон пардаси яна сурилди. Яна бояғи оқ-сарғыш хүшрүп ва арчылған тухумдай калла күршиди. Калла қуёшдай чарапқлаб илжаярды.

— Уэрлар бўлсин! Уэрлар бўлсан! Мирзо зарур иш билан жўнатган әдилар. Шошиб турибман. Хайр, махдум!

Қўча тўла жума намозидан қайтаётган бошдаи оёқ оқ кийининг салобат ва виқорга тўла одамлар бу воқеага ажабланниб қарашар, ҳеч нарсани тушунолмай улуг амирнинг шоҳ баковули ортидан қўлини илтижо билан чўзиб югуриб боришини томоша қилишарди. Тахти равон жадал кўздан ғойиб бўлди. Алишер қўча ўртасида хаёллари сочишган кўйи харосон туриб қолди. Мусулмонлар унинг гамгин ҳолига, уятдан оқарган кўзинга кўзимиз тушмасни деб, бошларини паст эгиб ўтардилар. Навоий ҳаддан ортиқ кулгили ва аянчли аҳволда қолганини бир пасдан сўнг англади ва бошини ердан кўтармай ҳашаматли дарвозадан ичкарига кириб кетди. Анчагача дарноза орқасига ҳолсиз суюниб туриб қолди.

Миржохи Пир султонни мансурининг арзанда ошпази. Хурросонда унчалар лазиз таом пишпрадиган ва гўзал дастурхон тузайдурган кимса йўқ. Кейинги пайтларда султонни мансурга яқин. Ҳатто сирдоши деса ҳам бўлур. Мулозимнинг шоҳга бунчалар яқин бўлиншини Навоий илгари ҳеч кўрмаган. Султон Маҳмудга гўзал Лёз қандай бўлса, Миржохи Пир ҳам ҳозир подшоҳга шунчалар суюкли... Аммо не гап ўтти экан?

Алишернинг қайтганини ва не учунлир бехол дарвоза ортига суюниб турганини пайқаган зийрак мулошимлар югуриб келиб, уни қўлтиқлаб олдилар.

— Сизга не бўлди, пирим? Тобингиз қочдими?— деб ташвишланиб дархол уни авайлаб ичкари музайян хонага олдилар.

Алишер бир зум ичиди кўкси, лаблари ортиқ қуруқшаб кетганлигини сезди.. Гулоб ва шинни келтирдилар. Алишер тут шиннисидан андак тамшаниб ҳотинган бўлди. Шиннининг ўткир таъми кўксидаги оғриқин босгандай бўлди.

Лекин шу тобда саройда Мирзо ҳузуринда қандай гап бўлмасин, Алишерга ҳеч қандай аҳамияти қолма-

тандай туюлди. Бироқ «Нега подшоқ ошпазининг ортидан уялмай-нетмай ёш боладай югурдим»,—деган савол миясини ўймалар ва унга жавоб тенишга қийналарди. Ахир подшоҳ: «Бор, сенга бутун Мовароунархининг ихтиёрини бердим»,—деганда ҳам, у бундай ашил-танил чопмас эди-ку. «Ҳонимга маълум, чонмас эдим ва менга бундай ихтиёрининг лозими йўқ эди»,—деб тақрорлади ичиди Алишер. Бир дарвеш айтган экан: «Бурга босған тўшакда ётиб бўлмагай. Тик туриб ухлаган яхши». Сени мабодо ўй таласа ҳам, ухлай олмас эдинг, эй дарвеш!—деб ичиди хитоб қилди Навоий.—Ўй деган нарса бургадан ҳам қаттиқ талайди ва сени ҳолдан тоидириб йиқитмагунича қўймайди. Баковул икки оғиз гапни шунчалар сирли ва маҳрамона қилиб айтдики, ҳар қандай одам унинг ортидан югурмай иложи йўқ эди. Менинг қонимда эса сирли нарсаларни билишга қизиқиш бор. Азиз боболаримдан, уларнинг кўкалтошлиқ ҳунаридан қолган бу одат менга. Лекин салтанат буюк амирининг сарой ошпазига эланиб чопганини тарих тарих бўлиб кўрмагап бўлса керак. Шармисорлик,—деб афсус билан тақрорлади Навоий. Бутун Хурросон ва икки дарё орасида шеърлари ёд ўқилатурғон шоирнинг ошпаз кетидан ёш гўдакдай ялиниб чопганини ким кўрган ахир? Навоий тақрор-тақрор шу ҳақда ўйлар экан, бадани қизиб иситмаси чиқа бошлади. Тама-ку бу! Гама-ку бу!—деб қайтарди у бир неча марта. Мана шоҳларга хизмат қилишнинг оқибати! Мана, шоҳларга яқин бўлишнинг оқибати! Мана, ҳар бир асарда мадҳиялар айтмоқ ва қасидалар тўқимоқнинг оқибати! Уял, эй шоир! Кўзингни оч, эй Навоий. Шоҳлардан элга имдод умиди қилмоқ ва илтифот кутмоқ киши бошига хорлик келтиргай.

«Ошпаз ортидан югургаи буюк амир! Ошпаз кетидан чопган улуғ шоир! Сени бу аҳволда ёш бола ҳам ўйинчиқ қилиб олади!»—Навоий ўзини аямай масхаралай бошлади. Ўзини аёвсиз саваларкаш, бирдан Мирҳожи Пир атай шундай қилган деган ўй миясини сирқиратиб ўтди. Эл олдида Навоий устидан кулди. Навоийни ёш боладек ўйнатди. Нечук ҳадди сиғди? Нечук журъат этти?

Навоий шунда Мирҳожи Пир илгари ҳам шундай сирли гапларни сарой аъёнларига шипшиб юрганини эслади. Мирҳожи Пир оддий гап-сўзларни ҳам сирли қилиб айтишга уста комил эди. Бунинг устига подшоҳ-

нинг арзанда баковули бўлгани учун унинг оғзидан чиқсан энг жўн гаплар ҳам бошқаларга гоятда сирли туюларди. Навоий Мирҳожи Пир шу бугун кечасиёқ янги вазирга бу гаройиб воқеанинг хир-хир кулиб сўйлаб бераётгани ва янги вазирнинг кўкси тоғдай юксалиб бораётганини яққол тасаввур қилди.

У инграб ўрнидан туриб кетди. Ташибарига чиқди. Оқшом туша бошлаган боғда қушларнинг кечки хонишлари авжга мингган эди. Мулозимлар югуриб келдилар. «Пирим, буюринг»,—деб қўл қовуштириб турдилар. Навоий уларни ўз юмушларига қайтарди. Бир нарсага қатъий қарор бериб дарвозага йўналди. Мулозимлар унинг ортидан ташвиш-хавотир ичидан кузатиб қолдилар.

Алишер ҳеч қаёққа қарамай ва ҳеч нарсаға чалғинмай тўғри ота-онасининг мозорига етиб келди. Қуёш ботиб бораркан, узоқ тиловат қилди. Сўнг бошини яланғочлади-да, ота пойининг тупрогидан ҳовучлаб олиб боши устидан сочди. Бир сочди. Икки сочди. Уч сочди. Сочаверди. Сўнг то Ҳирот қуёши ботиб, атрофга коронгулик чўккунича қабр пойига юкуниб ўтириди.

Мирҳожи Пир Алишер устидан кутнлмаганда шундай ғалаба қозонгандан сўнг босар-тусарини билмай қолди. Унинг тахти равони Ҳирот кўчаларида қирмиэн ялов каби учарди. Тахти равон жиловида йигирмата гўзал йигитчалар зебо кийимлар кийиб, қўлларида олтин, биллур қадаҳларда май тутиб юрадиган бўлдилар. Мирҳожи Пир ҳашаматли тахти равонда ўтириб, ўйнаб бораётган йигитчалар қўлидан олтин қадаҳда май иchar, сўнг уларнинг нозанини чеҳраларидан ўпид қўярди. Не шоҳлар, Баҳрому Искандарлар ҳам бундай дабдабаю базму майшатни кўрмаган эдилар.

Орадан уч-тўрт ой ўтиб мулозимнинг бу эркаликлари шоҳ мансурнинг қулогига етди. Шоҳ баковул хонадонини талон-торожга буюрди.

Кўп ўтмай Алишер Астрободга кетди. Шоҳдан, саройдан, шаҳзодалардан буткул умидини узди. Баковул Навоий Астрободда экан, яна шоҳнинг ишончини қозонди. Астрободда унинг шогирдларидан бири Алишерни заҳарлашга уриди. Эл-юртда гап тарқалди. Яна Навоийнинг ўзи шоҳ мансур саройини бу фитна

шармандалигидан сақлаб қолди. Шов-шувларни ёлғонга чиқарди. Шоҳ енгил тин олди.

Навоий умрининг сўнгги дамигача сарой баковули ортидан йигирма қадам югуриб борганини унутмади. Сўнг бу воқеани «Лисон ут-тайр»га ҳикоят қилиб киритди. Бундан илгарироқ Навоий «Ҳайрат ул-аброр»ни тугатаркан, унда шоҳнинг бошидан бандоҳ шўрпо тўкиб юборган баковул ҳақида ёзган, у ҳикоятда ҳамма шоҳ энди баковулни ўлимга ҳукм қиласди деб ўйлаган, лекин шоҳ баковулнинг қаттиқ хижолат чекканини кўриб, уни жазоламаган, бунииг уялгани ўлимдан ҳам оғирроқ деган эди.

Навоий баковулни кечирмади.

Узини ҳам ўзи кечиролмади.

ДАРДЛАР ЁРИЛГАН ЗАМОНДА

Талқинлар
Кичик тадқиқотлар

«Турғил, олтин косани май қуюб обод айла,
Тұлажак баш косасы түпроқ ила ёд айла,
Охирі манзил экан бизга шу жимлик вөдий,
Еру османа солиб ғулғула фарёд айла»

Хофиз Шерозий

БИЛСАҚ ВА АНГЛАСАҚ

Ҳар биримиз ўзимизда Навоийга муҳаббат туйғусини тұла тарбияламагунимизча, ўзимизни тұлақонли инсон деб ҳис қилишимиз балки қийиндер. Навоийда инсон-парварлик, миллатиарварлик булоги қайнағанда бау ҳеч қачон құримайдыган ва замон ҳодисаларидан булғанмайдыган булоқ. Биз ана шу булоқдан парвариш олиб, апа шу булоққа муносиб бўлишимиз керак.

Еши эллиқдан ўтиб бораётгандар Навоийнинг уч йирик санасини күрдилар. Навоий 500 га кирганды, бир бошқача әдик. Навоий 525 га кирганды яна бир бошқача бўлдик. Навоий 550 кирганды бизнинг ижтимоий-сиёсий ва ҳатто руҳий ҳолатимиз ҳам ўзгарди. Йиллар ўтган сайнин ва умримнинг ўн йилликларини Навоийнинг йиллари билан ўлчашга одатланганим сайнин ўзимга ўзим бир саволни бериб тураман:

— Йиллар ўтяпти, хўп, Навоий биздан узоқлашиб боряптыми? Еки борган сари яқинлашиб келяптыми?

Навоийнинг ёши 500 га кирмагушча биз унинг ҳалқимиз ҳаётидагина эмас, Урта Осиё ўлкалари, Хурросон, Афғонистон, Туркия, қолаверса, дунё маданиятларидаги ўрни ҳақида ўйлаб ўтирганымиз. Чамаси, бу ҳақда биринчи бўлиб йигирманчи йилларда бош қотирғанлардан бири Абдулҳамид Чўлпон эди. Шукур Ҳолмирзаев ҳалқимизга хос бир одатни хўп топиб айтган, биз ҳар доим кечикиб юрамиз. Навоийни ҳам жуда жуда кечикиб англаяпмиз ва кечикиб қадрляяпмиз. Биз ҳали неча замон тиришиб, уриниб, кўп тер тўкиб Навоий кўтарилган руҳий мақомга етиб бормогимиз даркор. Тарихдан кечикиб юришимиз Навоийгагина дахлдор эмас. Мен чор олимларидан В. Наливкиннинг «Қўқон хонлигининг қисқача тарихи» китобини ўқиб ўтириб, қуйидаги сўзларга дуч келдим: «Европа шарқ шунослари томонидан кўкларга кўтариб мақталган «Бобурнома» сатрларга деярли мутлақо маълум эмас. Мен бу китобни ерли ҳалқ ўртасидаги тапишларимнинг энг саводхон деб ҳисоблаганларига бир неча маротаба кўрсатғанман ва ҳар сафар шунга ишонч ҳосил қила-

Манкӣ, улар бу китобнинг мазмунидан бутунлай бехабар бўлишлари баробарида, ҳатто умуман шундай китоб борлигини ҳам эшифтмаганлар. Шубҳасиз классик бу китобнинг муаллифига келсак, у негадир бунда ёмон ном қозонган...»

Бу ачниқ сўзлар ҳозир бизга қанчалар оғир ботмасин, лекин Наливкин таърифлаётган давр учун маълум даражада ҳақиқат эди. Бу бизнинг қанчалар кечикиб юришинимизга оид иккинчи масала.

Инглизлар Байроннинг ёхуд Шекспирнинг кечирган ҳар бир дамини қоғозларда рақам қилиб қўйганилар. Немислар Гётеининг ҳар бир сониясини биладилар. Рус олимлари Гоголь, Пушкиннинг барча дақиқалари ни тиклашга мусассар бўлганлар.

Ҳар бир миллатнинг умуртқаси бўлади. Гоголь, Байрон, Шекспир, Гёте шундай умуртқа. Навоий ҳам ўзбек халқининг том маънодаги умуртқаси. Шу умуртқалар ушлаб туради ва тиккайтиради халқларнинг қаддини.

Биз эса ҳали ҳамон Навоийнинг онаси ким бўлганлиги, қайда туғилганлиги, қайси шажарага оидлиги ва ҳатто у кишининг исмлари нима бўлганлигини билмаймиз.

Навоийнинг ёшлик йиллари, мадраса даври ҳаётидан мутлақо бехабармиз. Навоийнинг тоғалари йирик шонир бўлганликларини эшифтганимиз. Лекин уларнинг асарларини топиб нашр этиш йўлида бир қадам ҳам ташламаганимиз.

Навоий каби даҳо зотларни англаш ва уларга яқинлашиш учун уларнинг мухитларини, атрофларини тўла билиш зарур. Биз эса ҳали ҳануз ҳатто Мирхонд ва Хондамир асарларини тўла таржима қилиб нашр этмаганимиз. Хўш, булар аён кўрининб турган нарсалар. Лекин кўринмай ётган нарсалар қанчадан-қанча. Уларнинг сон-саноғи йўқ.

Навоийнинг ҳаёти беҳад бой баёт. Бу ҳаётнинг дамларини бир ерга қуяверсангиз, улуғ дengиз ҳосил бўлади. Биз эса дengизнинг бир қатрасини биламиш ва шу қатра орқали дengизни умуман тасаввур қилишга уринамиш.

— Хўп, шундай экан, Навоий бизга яқинлашиб келяптими ёки тобора узоқлашиб боряптими?

Эндиликда Навоийни теран билсак ва англасак, бу

ўзимизни билиш ва англаш билан баробар эканлигини тушуниб турибмиз.

Навоийни ва унинг атроф тарихини билганимиз, тушуиганимиз сайни у бизга яқинлаб келаверади.

Кўп маҳал Навоийни тушунолмай қийналамиз. Унинг фикр ва тимсоллари дунёси олдида лол бўлиб, бегонасираб турамиз. Унинг тили бизга беҳад оғир бўлиб туюлади. Навоийнинг тили ҳам ўта ўзбекона, ҳам ўта мураккаб. Навоий ўта соддалик билан ўта мураккабликни бир-бирига қовуштиrolган, бу ҳодисалардан гўзал бир уйғунлик яратолган эди. У бадиий адабиётни, шеъриятни содда бир нарса деб тушунмасди. Унинг назарида инсон ҳаёти ва руҳий дунёси қанчалар мураккаб ва кутилмаган фазовий поёнда бўлса, унинг акси бўлган адабиёт ҳам шунчалар мураккаб бўлиши табиий эди. Навоий ўзбек туркий тилини қадимги араб, қадимги форс, қадимги туркий тиллар ҳисобига беҳисоб даражада бойитди. Унинг бойлиги энди бизга мураккаб бўлиб кўринади. Бу даҳонинг мураккаблиги. Уни тушунмоқ учун аввало юрагимиэда унга муҳаббатни тарбия қилишимиз керак...

ҚҮНГИЛНИНГ НОЗИКЛИГИ

Навоий ўз замондошлари ўртасида кўнглининг ўта нозиклиги билан машҳур бўлган. Бу ҳақда унинг ҳамасрлари ва муаррихлар ажид шаҳодатлар қолдиргандар. Биз ҳозир кўнгли нозик деганда кўпроқ инжиқ, тез таъсиранадиган одамни тушунамиз. Кўнгилнинг нозиклиги аслида тенгсиз бойлик. У оламни тушуниш ва ҳис қилиш бойлиги. Кўнгилнинг нозиклиги хеч истиносиз атрофдаги барча нарсалар, барча ҳодисалар ва мавжуд ҳаракатларга бадиий кўз билан, нафосат нигоҳи билан қараашдир. Фақат қарааш эмас. Балки энг олий савиядаги нафосат назари билан баҳолашдир.

Кўнгли нозик бўлмиш одамларнинг яшашлари жуда қийин кечади. У атрофни тушуниб, англаб турадио, атроф эса кўпинча уни тушунмайди. Тушунганда но-тўғри тушунади. Ёки энг ёмони—тушунганда, тушуниб, бу нозикликни ерга уришга, унга талафот етказишга, кўпинча, унинг устидан кулиш ва масхаралашга уришишлар ҳам бўлади.

Навоий ўз даврининг ўта фаол кишиси сифатида мана шу каби тушунишлар ва тушунмасликларга тез-

тез дуч келган. Бу ҳол унинг барча асарларига ҳам жуда кучли таъсирини ўтказган.

Кўнгли ўта нозик одамлар дунё ишларини нозик идрок қилишлари баробарида ўзларига ўзлари яна ўта танқидий қарайдилар. Оламни англашдаги нозиклик ўзни англашнинг нозиклигига айланади. Бу ўз Руҳининг барча паст-баланд мақомларини англамоқдир. Навоий ўзининг нималарга қодирлиги ва нималарга қодир эмаслигини теран билади. У ўзини тўхтовсиз танқид қиласди, ўзи ҳақида ҳақирларнинг ҳақири даражасига тушиб фикр юритади.

Навоий кўнглининг ўта нозик тарбияланганлиги ва шу билан бирга бу нозикликнинг туғмалиги ажаб бир тарзда унинг хат-услубига ҳам кучли таъсири кўрсатади. Навоийнинг бадний услуби тамомила унинг кўнгил нозиклигига қамралгандир. Худо айтган: биз оламини илм бирлан қамраб олдик. Худонинг сўзидаги «қамраш» маъноси менга беҳад ва бепоён бўлиб туюлади. Буни англаш учун назаримда одамнинг тушунчаси ожизлик қиласди. Қамраш Худонинг сири. Биз бу сирга дахл қилолмаймиз. Лекин Навоий қалбининг нозиклиги унинг бутун бадний услубини қамради десак, Навоий даҳосининг гўзал ва сирли оламига нечукдир яқинлашгандай бўламиз.

Навоий бадний услубидаги:

ўта муболағадорлик

ўта рангинлик

ўта ҳаяжон

ўта такрор

ўта ўз-ўзини танқид —

шоир қалбининг ўта нозиклигидан туғилади.

Навоийни туғма нозик дёдик. Бу бизнинг эмас, асрдошларининг кашфиётни.

Туғма нозиклик ҳазратни бутун умри давомида бир зум тарк этган эмас. Туғилгандан то сўнгги дамгача Навоийнинг барча ҳаракатларида шу нозиклик зоҳир. Айтиш мумкинки, нозиклик унинг қадамларини бошқаради.

Навоий «Лисон ут-тайр», «Маҳбуб ул-қулуб» сингари улуг асарларини умрининг охирги йилларида яратди. Навоий бу даврда шоҳу шаҳзодаларнинг тинимсиз таҳт ва тож талашларидан беҳад чарчаган ва Бойқародай маърифатли шоҳ тузган йирик давлатнинг муқаррар инқизозини сеза бошлаган эди. Лекин ижтимоний

турмуш довуллари уни қанчалар ҳолдан тойдирмасин ва озурдадил қилмасин, у ўз қалбининг бебаҳо бойлигини андак бўлсин йўқотмаган эди. Кўнгилнинг нозиклиги ҳамон асарлар яратишга чорлар эди.

Назаримда бу нозиклик болалик чоғларида саргардонликда устод Шарафиддин Али Яздий билан учрашганда, унга тақдирнинг инояти билан рўбарў келганда, шариф зот билан савол-жавоб қилганда ва ниҳоят унинг муборак дуосини олгандаёқ намоён бўла бошлигаган эди. Бу нозиклик жуда эрга ёшларида мактабда сабоқ ўқиб, ҳамсабоқлари «Қаломуллоҳ», «Гулистан», «Бўстон»ни такрорлаб, у эса Шайх Фаридиддин Атторнинг «Мантиқ ут-тайр» — «Қушлар тили» достонига ошиқи беқарор бўлган кезларида юзага чиққан эди.

Тақдир пешашага ёзилган бўлади, дейдилар. Балки ростдир. Лекин тақдир илк дафъа одамга рўбарў келадиган дам ҳам бўлади. Бу дам толе демакдир. Одам боласи шунда ўз толесини учратганини англаса, сўнг бу толе унга умр бўйи ва эҳтимол асрлар бўйи унга ҳамроҳлик қиласди.

Навоий болалик фаслида, энди сабогини чиқараштаган паллада Атторга ва унинг буюк асарига дуч келгани — толе билан учрашув эди.

Навоий бу учрашувгача қушларга ошиқ ва уларга маҳлиё бўлганими-йўқми, буни аниқ айтиш қийин. Лекин у Атторгача ўз гўзал боғчасидаги неча турфа қушларга эътибор бермаганда, уларнинг не ажиб сайдарашларига қулоқ солмаганда, эҳтимолки, унга мактабда сабоқ чоғи «Мантиқ ут-тайр» ҳам дуч келмасди. У Атторнинг достонигача қушларга ва уларнинг қўшиқларидаги турфа оҳангларга қизиқиб юрдики, бу қизиқишнинг сирли қўллари унга «Қушлар тили»ни тутқизди. Қушлар нима деркин? Уларнинг бунчалар анвойи-анвойи сайдарашларидан мурод нима? Қушлар нинг ерда эмас кўкда учишларидан мақсадлари борми? Ана, кўк кабутар тиниқ Хирот осмонида учиб борадур. Ў шу учиб бораётган маҳалда ўзининг қаерга учиб борағганлигини биладими? Қаерга нима учун қўнишини олдиндан биладими? Еки шу учганча тўхтамай учиб кетаверадими? Ҳа, ҳа, қуш қаерга боришини биладими?

Алишер Аттор достонини қўлига олгунча шу саволлар устида ўйлаган. Унинг нозик кўнгли донм қушларга интилган. У кўп замон тушида анвойи қушларни

кўрарди. Тушларнда уларнинг сайрашлари қулогидан аримасди. Алишер улкан боғнинг гўзал кунжакларнда қушларнинг овозларига қулоқ солиб соатлаб жим ўтириши севарди. Қушларнинг сайрашларини тингламаган ва уларни юрагига сингдирмаган одам ҳеч қачон шоир бўлмагай.

Алишер Атторнинг достонини сабоқ чоғи қўлига олди-ю, сўнг уни қўлидан қўймади. Қушлар билан ошно тутишиб, уларга неча саволлар бериб, жавоб ололмаганлари боиси энди унга аён бўлди. У биринчи маротаба қуш тили, қуш сўзи, қуш нутқи деган иборалар устида диққатини қўйиб ўлади. Ҳа, ҳа, қушларнинг ўз турфа тиллари, ўз турфа сўз ва нутқлари бўлар экан. Улар бир-бирлари билан баҳслашар ва баҳслари ичida Яратганинг ҳақиқатини қидирар эканлар. Алишер бобосидан Сулаймон деган набий ва унинг Осаф ибни Бурҳиё деган амакиси ҳақида эшитган эди. Қушлар Сулаймон пайғамбарга тобе эканлар ва доим унинг айтганларини адо этар эканлар. Лекин Сулаймон шунча улуғлиги билан қушлар нима ҳақда сўйлашганлари, нима истаганларини баён этиб кетмаган экан.

Алишер Атторни ўқиркан, унинг юрагига илоҳий сўзлар қуюлди. У қушларнинг сирли тилига ошно бўлди. Алишер боиқа ҳамма нарсани унуди. Бу китоб унинг табиатини шунчалар чоғ қилиб юбордики, ҳар ерда ундан ўқиган сўзларни ёд айтиб юрадиган бўлди. У қушларнинг сўзлари устида соатлаб ўйлаб ўтирас ва бирдан бу сўзлардаги ғалати маънолар унга очилар, шунда унинг мурғак юраги чексиз нашъаларга тўлиб кетарди. «Завқ кўп хушҳол этар эрди мени. Шарҳи онинг лол этар эрди мени», деб ёзади Навоий бу ҳақда орадан қарийб эллик йилдан ортиқ вақт ўтгач «Лисон ут-тайр» достонида. Завқ, ростдан ҳам, Алишерни хушҳол этип-ю, лекин кутилмаганда, унинг аҳволида боғиқача бир ўзгариш ясади. Алишернинг қушлар ҳикоятлари тузишган дафтарга эътиқод ва муҳаббати ортган сари в элдан, ошною биродарларидан узоқлаша бошлади. Қушлар китоби унинг ёлғиз дўстига айланди: «Ул китоб эрди анису хилватим», деб ёзади Алишер. У кўпчилик ичida юришдан, гала-ғовур одамлар инғиладиган жойлардан ва умуман, одамлардан қочиб, хилватни ихтиёр этди. Бора-бора қушлар китобини тўхтовсиз такрорлашлар ишққа айланди. Алишер шайдо бўлди. «Оқибат ишқ айлади шайдо мени»,

деб ёэди Навоий эллик йил ўтгач. Алишерга Қушлар китобидаги ҳаёт ва қушлар китобидаги сўзлар ҳаётдан ортиқроқ кўринди. У китобга ва унинг сўзларига том ошуфта бўлди. Атрофдаги барча нарсалар бемаъни бўлиб туюлди. Фақат китоб сўзларининг лаззати ва хаёли билан нафас олди. Шунда ёш Алишерда узлатга чекиниш фикри туғилди.

Алишернинг сўзга қизиқиши савдога айланганини атрофдагилар кейин пайқадилар. Ота-онаси бу савдо телбаликка айланмай туриб унинг олдини олишга киришдилар. Қушлар китоби Алишердан яширилди. Ҳатто бу китоб ҳақида сўзлашишини ҳам ман эттилар. Лекин қушлар сўзи савдоси Алишернинг кўнглида анча чуқур илдиз отиб бўлган эди. У анчагача мутлақ хаёл ичида юрди. Китоб унинг оташин юрагига буткул муҳрланиб қолган эди. «Ондин ўзга сўзга майлим оз эди, Қуш тили бирла кўнгил ҳамроз эди», деб ёэди Навоий. Мана шу фавқулодда ҳамрозлик эллик йилдан ортиқ давом этди. Сабийликда ортирилган кайфият Навоийни ҳеч қачон тарк этмади. Кўнгилнинг туғма нозиклиги, орада айтиб ўтай, бу сўзни Алишер талаффуз қилган каби «нозук» деб талаффуз қилсак, сўз эҳтимол биз кузатган маъно кайфиятини янада равшанроқ ифодалайди, Алишерни Қушлар китоби мутолаасига етаклаб келди. Қушлар китобига шайдоликдан сўнг кўнгил нозуклигини бошқа бир нозуклик қўшилди. Кўнгилга олни сўзлардан маърифат ва ҳақиқат тарбияси кириб келди. Қушлар китоби кўнгилдаги даҳо нуқталарни шиддатли тарзда очиб юборди.

Навоий шеъриятининг тўрт хазинасини яратиб ҳам, достончиликкенинг панж ганжини майдонта чиқариб ҳам, ҳеч бир вақт Қушлар китоби ёзишини ёдидан кўтармаган кўринади. Қушлар китоби ёзишини у жуда эрта кўнглига туккан, лекин ўз эътирофига кўра Қуш тили олдиди ўзини нотавон сезган, буни амалга оширишда юзага келадиган душворликларни енгиб ўтишга то эллик саккизга киргуича ҳам ўзида ишонч сезматан. «Олтмишқа умр қўйғонда қадам, Қуш тилин шарҳ этгали йўндум қадам», деб ёзади Навоий.

Ха, «Лисон ут-тайр» эллик йил Навоининг кўнглида ёзилди. Эллик йил у даҳонинг кўнглида тугун бўлиб ётди. Эллик йил оламга шердек наъра тортган шоир бу тугунни ечолмади. Роз эшигига яқинлашолмади. Сўнг олтмишга қадам қўйғанда хар тун шам

ёруғида ўтириб ўз эътирофича, қирқ-эллик байтлаб қоғозга туширди. Алишер Қушлар ҳақидаги китобини жуда тез ёзиб тутатди. У нозук күнгилда пишиб етилган, тошқын умрнинг суронли йўлларнда ҳаёт синовидан ўтган эди.

Навоий бу асарини ҳам туркӣ әл қошида тўла жавобгар одам бўлиб ёзди. Ўз эли олдидаги жавобгарлик туйғуси ҳали ҳеч кимда бунчалар қудратли тарзда намоён бўлмаган эди.

Навоий ижодкор сифатида озод инсон эди. Озодлигининг даражаси жавобгарлигининг ҳам даражаси ва йўналишини белгилайди. Навоий барча асарларини туркӣ қавм олдида ўта жавобгар инсон каби ёзганилиги кишини ҳайратга солмай иложи йўқ.

Навоий кўнглининг нозуклиги Қушлар китобининг жуда кўп нуқталарида гўзал бир мақомда муҳрланиб қолган.

Навоий Қушлар ҳақидаги китобининг охираida Қақнус ҳақидаги қадим шарқ ҳикоятини келтиради. Бу ҳикоятнинг аввалдан маълум чизиқларига Навоий ҳеч қандай ўзгариш киритмайди. Лекин Қақнус ҳикоятини кутилмаганда ўз ҳаёти ва бу Китобни ёзаётган чогидаги ўз ҳолатига тамсил қилиб келтирадики, гўё бу ҳикоят чироғи Навоий ҳаётига бирдан бутунлай ўзгача шуъла ташлагандай бўлиб туюлади. Қақнус учишга қанот боғлагандан то умрнинг охирги дамигача хилват бир ерда қуруқ ўтин йиғади. Умри поёнига етгач, у қуруқ шоҳлардан тўпланган тепа устига чиқади-да сўнгги хуш олгувчи қўшиғини айтади ва сўнг ўт келтириб шоҳларни ёқади ва ўзини шу улуғ аланга ичига отади. Гулхан ёниб бўлгач, умр гулханининг кули остидан янги Қақнус бош кўтариб чиқади.

Алишер ўзини шундай умр бўйи қуруқ ўтин йиған ва хирмон ясаган Қақнусга қиёс қиласди. Умр хирмонига ўт қўядиган палла келди, дейди у. Бу улуғ гулхан ичидан Алишернинг Қушлар ҳақидаги китоби туғилади. У бениҳоя ҳақирлик билан ўтиналарни улуғ Шайхнинг — Атторнинг дарёсидан йиғганлигини айтади. Биз юқорида кўнгли ўта нозук одамлар ўзларини олам қошида ўта ҳақир тутишлари ва ўзларига ўта танқидий кўз билан қарашларини эслаган эдик. Мана. Навоий Қушлар китобида шунча буюк сўзларни ёзиб ва ажаб меъморлик кошонаси қуриб ҳам охираida яна айтади: «Мен бу дарё ичра дурри покни Топмайин

йиғдим эса хошокни Найлайнин бу эрди мақдурим менинг...» Навоийни комил жавобгарлик түйғуси билап яшаган инсон дедик. Бу фавқулодда жавобгарликтиннинг манбай ҳам яна бориб ўша кўнгил нозуклигига етади. Жавобгар одам эса ўз елкасига бошқалар кўтаришмайдиган юкларни қўяди ва бу юкларни тарих қаърларидан, неча-неча қарн-ақронлар орасидан олиб ўтишликини кўзлайди. Навоий халқ учун ўз уҳдасига қанча улуғ юк олса, унинг ўзига қараши шунча танқидий тус олади. Бу ўз-ўзини танқид гоҳо ўз-ўзидан ўта норозилик тарзида кўзга ташланади, бу айниқса, Қушлар китобининг бошланишидаги Муножот бобида кескин ифодаланади. Навоий бунда ўзинни, ўз ижодини сира аямаган инсон сифатида кўзга ташланади.

У ўтган бутун умрига назар ташлайди. Назаридан умрини ўткинчи ҳою-ҳавасга, нафс ва ошиқ-маъшуқлик ўйинларига сарф қилиб елга совуриб юборгандек тулади. Энди ўзининг аввалги ошиқлигидан ҳам маҳбубнинг жонга ўт солгувчи турли жилвасоз ва афсунгарликларидан нафраланади. Бу маҳбубсиз тирикликни ўлим билан тенг кўрган дамларидан энди уялади. «Олло-олло ўлтурур шармандалиқ Ҷимма келса бу янглиғ бандалиқ...»

Юз қаролиг онча бўлмиш жаҳл аро,
Ким кўзумга қилди оламни қаро.
Қилмадим умрумда бир ракъат намоз,
Сарбасар маҳзу ниёз, эй бениёз.
Харгиз андоқ қўймадим түфроққа бош,
Ким кераклик бўлмағай бошимға том.
Бермадим ҳаргиз гадога бир дирам,
То ўзумни кўрмадим соҳиб карам.
Тұтмадим отинг қилиб фарзоналиқ,
Сабҳа элдин осмойин юз доналиқ.
Бир амал ҳаргиз риёсиз қилмадим,
Ризқисиз ҳаргиз ўзумни билмадим...

Умрниңг поёнида ўз-ўзига бунчалар аёвсиз, рўй-хотирсиз сўзларни айтиш учун, билмадим, ким бўлиш керак. Бунинг устига булар шунчаки сўзларгина эмас, Ҳақ оллидаги, халқ олдирадаги, келаётган асрлар олдирадаги уэрхоҳлик ва ғабодо таъбир жоиз бўлса, тавба эди.

Ўз хаётидан чиқарилган жуда аччиқ Хулоса эди. Навоий ўзининг Қушлар китобида ҳақ ва мажозий

Хақиқатни ахтарган Қушлариниң тирикликининг етти водийсидан олиб ўтди. Қушлар йўқлик — фано водий-сига етганда ўзларини танидилар. Ахтарган нарсалари ўзларида мужассам эканлигини билдилар.

Навоийнинг ўзи ҳам Ҳақ йўлида ана шу етти водийни босиб ўтмадими? Фано водийсига етиб келганлигини аён сезмадими? Ва шу водий ичида туриб ўзига Фоний тахаллус топмадими?

У «Ҳақиқат сирлари»ни англаб етгани учун ҳам ва алалохир шу етти водийдан аввал гўдакликда, сўнг эллик йил мобайнида ўз умри баробарида ўтгани учун ҳам бу улуғ китобини умрининг якуни яқинлагандага ёзди.

Навоийнинг улуғ ғруҳи ҳамиша дарвешлик ва сўфийликка мойил ва талабгор эди. Лекин у Ҳақиқат сирига етни учун таркидунё қилмади.

Балки ҳеч тўхтамай эл-халқ учун тер тўкди.

У Ҳақ, Фано қошида қандай жавобгарлик ҳис қиласа, Халқ ва Тарих олдида ҳам шундай жавобгарлик сезарди.

Сўз танигандага қуш тилига шайдо бўлган бу мислсиз зот мудом Қуш тили билан қўшиқ айтди. Бу тилни халқига мерос қолдирди.

ИККИ ДЕБОЧА АРО

Алишер Навоий доим улус ичида яшади, доим улус қуршовида бўлди. У улуснинг бутунилиги, бирлиги, ободлиги ва қудрати учун курашди. У улусни беҳад севар эди. Шу билан бирга улусдан беҳад озурда эди. Жуда ёш чоғларидан бошлаб бошига улус ғавро ва можаролари тушди. Ёши чоғларидан темурий мирзоларнинг ўзаро гоятда беҳосил, лекин ўтакетган қонли талашлари ва тортишувларини кўрди. Навоийнинг отона аждодлари темурийлар хонадонлари билан хонавода ва хоназода бўлиб кетган эди. Мен ҳатто баъзида Навоийнинг асли аждодлари шаҳрисабзлик бўлсалар керак, деб ўйлаб юраман. Ҳеч шубҳасизки, унинг боболари Амир Темур ва унинг улуғ хонадонига жуда яқин кишилар бўлганлар. Навоий ўзининг томир-томирлари темурийларга илдиз bogлаб ажратиб бўлмас даражада туташиб ётганлигини билади. Ўзи ҳам то бир зум бўлин ушбу илдизлардан ажралолмайди. Лекин шу билан бирга бу улуғ хонадон ўзаро таҳт талашиб, мулк, юрт

талашиб ўзини ўзи қуритиб, қуриб бораётганлигини күриб ва кўрганидан ҳам аъло ҳис қилиб туради.

Навоийни мана шу мирзойи қирғинлар ҳаддан ташқари чарчатган эди. Унинг тушларига қон оқаётган дарёлар ва тагида қонлар қуриб қолган сўхта дарёлар киради. У бу дарё узоқ замонлар қуриб ётажагини сезган эди. Ўзининг башорати ўзига ғоятда қўрқинчли кўринарди. Лекин атрофига қараса, шаън, доно, ўткир фаҳм, сўзамол темурийзодалар билан муомала қиласа, уларнинг лаззатпастликларда нозуклашиб кетган чеҳралари, нозиклашиб бораётган қўллари, ўта ингичка табассумларга мойил лаблари, лаззатли рӯёларга қарай-қарай йилтираб кетган қийиқ чиройли кўзларида дам-бадам тирқираб кетадиган шармандаликларда башоратнинг кўп қўрқинчли нишоналарини кўради.

Темурийлар учун қўрқинч Навоийни ҳаддан ортиқ ҳолдан тойдиради. У доим уруш ҳолатидаги шахзодаларнинг ораларига тушар, тўхтовсиз ота билан фарзандларни, акалар билан укаларни, қони бир, томири бир, лекин нияти бошқа кимсаларни яраштириш мушкулликлари ичра кун кечирад, шаҳзодаларга тўхтовсиз хатлар ёзар, подшони эзгу ишларга ундар, бир дам натижаларга эришгандай бўлар, лекин кўп ўтмай низолар яна бошқатдан, аввалгисидан ҳам кучлироқ шиддат билан алганга оларди.

Навоийни толдирган, унинг умрини қисқа қилган ва ҳатто насл қолдиришдан мутанаффир қилгани асосий сабаблардан бири ана шу ўзаро низолар эди.

Навоий табиатан ёлғизликни севарди ва ёлғизликка интиларди. Ва ҳеч қаҷон, тақдирнинг ўйинлари ва масҳарабозликларини қарангки, ёлғиз қололмасди. Ёлғизликка етолмасди.

Навоий табиатан ўта нозик эди. Доим ҳаёлнинг домида эди. Унинг нозик табиатига ёлғиз бир кун хоким ва ҳукмпармо эди. Уни улуғ соҳиба — шеър Илоҳаси бир зум тарк этмас, бир зум тинч қўймас эли. Шеър Илоҳаси Навоийнинг кунглида таърифга сизмайдиган гўзал, чексиз хоналарга эга сарой қурган эди. Илоҳа шу мўъжиз саройда яшар ва тўхтовсиз Навоийга сўз айтади.

Навоий айни йигитлик чоғларида эл-улус талаби билан тартиб берган биринчи йирик девони «Бадое ул-бидоя»да айтади:

Кўнглумда не маъни ўлса эрди пайдо
Тил айлар эди назм либосида адо
Ул назмга жонни қилибон халқ фидо
Солурлар эди гунбази гардунга садо.

Кўрдингиизми, Илоҳа унга мудом шеър шивирлаб туради. Кўз ўнгидаги сўз оламининг гўзал манзаралари намоён бўлади. Навоий шу оламдан чиқмасликни, шу манзараларни муттасил қофозга туширишни истайди. Лекин тўртинчи иқлим — Хурросон¹ подшоҳлигининг барча ғавфо-тўполонлари аллақандай сирли иплар билан унинг бутун вужудига уланган, ҳар замон бу иплар шиддат ва изтироб билан тортилади. Шоирни Илҳом ва шеър Илоҳаси тортиқ қилган оламдан низо ва ғаразлар оламига тортиб кетади.

Суқротни Афина халқ мажлиси ўлимга маҳкум этганда, улуғ мутафаккир охирги марта ўзига ҳукм ўқувчиларга қаратса шундай деган экан: «Айё, афиналиклар, ўлимдан қутулиб қолиш қийин эмас, лекин, мана, фосиқликдан қутулиш анча мушкулроқдир: бузуқлик ўлимдан ҳам тез етиб келади». (Платон. «Суқрот таърифномаси.») Бу foятда теран фикр орадан қариб уч минг йил ўтаётганига қарамай ҳамон ўз кучини йўқотмаган. Навоий бузуқлик ўлимдан кучлироқ эканлигини айниқса, умрининг кейинги ўн беиу йили давомида жуда қаттиқ ҳис қилди. Унинг кўз ўнгидаги бутун Хурросон, Мовароуннаҳр мулкида биродаркушлик урушлари авж олиб борар, бир туркий эл иккинчи туркий элнинг кўзини ўяр, қувғин қилас, экинзорларини бузар, яйловларини қон билан сугорар, гўзал шаҳарларини вайронага айлантиради. Навоий кўз ўнгидаги бузуқлик ва бузгунчилик ўлимдан ҳам шиддатлироқ тусга кира борарди.

Холбуки, Навоий шоир эди. Платон айтган экан: «Шоир — ҳавоин қанотли ва муқаддас хилқатдир; у илҳом ва жунунига берилган чоғдагина яратади». Платонининг бу сўзлари Навоийга нисбатан юз бора, минг бора ҳақдир. Навоий табиати шундай эдик, уни Илҳом бир зум ҳам тарк этмас, шеър Илоҳаси ундан бирон марта аразлаган эмас. Илҳом ҳолати унинг учун доимий эди. Бу жиҳатлардан Навоий ер юзида ноёб даҳо соҳибидир. Бундай Илҳом Конфуций, Достоевский, Толстой, Гёте, Байрон, Фирдавсийга хос эди. Навоий шу қаторда молокаломдир.

Навоий муттасил илҳом қанотида эди-ю, бироқ унда буюк ижодий ишларга рағбат, иштиёқ «Бадое ул-бидоя»-дай улуғ девонни яратгандан сўнг пайдо бўлди. Бу девоннинг юзага келиши ғоятда ажойибдир. Навоийнинг ғазаллари йигитлик чоғидаёт эл-улус ўртасида, шеърпарамаст темурийзодалар ўртасида шуҳрат топган, ҳеч муболагасиз айтиш мумкинки, бутун эл — Самарқанддан тортиб Ироққача бу ғазалларни куйлар, уларга мусиқа боғлар, ёддан айтарди. Мұҳаммад Султон каби нозик таъб шаҳзодалар Навоий ғазалларини оққа кўчириб кўпайтирас, эл орасида ёйар эдилар. Мұҳаммад Султон Навоийнинг ёшлиқ ва йигитлик чоғида яратган ғазалларини илк бора тўплаган эди. «Бадое ул-бидоя»нинг яратилишига ҳам шу «шоҳи дарвеш Мұҳаммад Султон» сабаб бўлди.

Навоий анчагача девон тузишни ўзига эп кўрмай, бундан ўзини тортар эди. У девон тузиш шоирга улуғ масъулият юклашини теран ҳис қиласади. Кўз ўйгода Саккокий ва Лутфий девонлари ва уларнинг шуҳрати турарди. Ўзини ҳали — йигирма беш ёшларида — девон тузиш учун етилмаган деб биларди. Лекин Мұҳаммад Султон ҳам бўш келмас, бу борадаги илтимос ва таклифларини қайта-қайта айтишдан чарчамасди. Навоий эса унга шеър билан шундай жавоб берарди:

Ҳар куни яна бир ишқ иладур афсона,
Ҳар тун яна бир шамъгадур парвона,
Иш анга жунун, манзил анга майхона,
Девон ясамоқни не билур девона?

Лекин мамлакат тепасига олтмишинчи ишлар поенида Ҳусайн Бойқаро келиб, ўзаро урушлар матълум бир тарихий вақт давомида босилгап ва шу вақт ичиди Бойқаро тимсолида шоҳ эмас, дарвеш устун чиқди. Навоий уни кўпроқ дарвеш дейиш ва дарвеш деб тасаввур қилишини севарди. Дарвеш деганда у энг олий покизалиқ, ҳалоллик, тўғри сўзлик ва тўғриликини назарда тутарди. Дарвеш шоҳининг кўп ишлари адолатли эди ва бу Навоийга тенгиз кўтаринкилик бағишларди. Биринчи девон шундай кўтариники шаронтда тартиб берилди.

Навоий барча иккиланиш ва шубҳалардан халос бўлди. Бу орада унга гайбдан бир садо келди. Бу садо сўнг унга умрининг охиригача йўлдош бўлди. Ўйлайманки, бу яна ўша Илҳом ва шеър Илоҳасининг овози

эди. Садо Навоийга шундай таңбәҳ беради ва уни шундай түғри йўлга бошлайди:

Ки: «Фалон, бу не тийражонликдур?
Не бало ажзу нотавонликдур?
Ранж кўрмай киши топарму фароф?
Қўнгли ўртамайин ёнарму чароф?
Тухм ерга кириб чечак бўлди,
Қурт жондин кечиб ипак бўлди,
Лола тухмича гайратнинг йўқму?
Пилла қуртича ҳимматнинг йўқму?»

Садонинг — Навоий уни «Хирад пири» деб атайди — бу таңбәҳи Навоийга бутун умр кор этди. Унда улуғ ишларга рагбат уйғотди. Бир улуғ асар иккинчсини етаклаб келаверди. Қўп ўтмай «Наводир уни-ниҳоя» яратилди. Ана шу икки буюк шеър майдонидан туриб, Навоий сўнг «Ҳамса»га, сўнг «Ҳазойин»га журъат қилди.

Булар муқаддас бир оби ҳаётким, у ҳалқни барча қирғинлар ва барча забунликлардан омон олиб чиқди.

ДИЛПИСАНД

(Мактубларда Навоий сиймоси)

Нома ва мактублар маданий инсон кашф этган мұлоқотларнинг энг гўзал, энг таъсирчан ва энг қулай воситасидир. Шарқда негадир нома ёзиш Европада бўлганчалик кенг миқёсда урфга айланиб кетмаган. Лекин Шарқ адабиёти номанинг гўзал шаклларини яратган. Нома Шарқдан чиқди. Фарбга борди. Фарб маданий ҳаётининг ажралмас узвий қисмига айланди. Үрта Осиё адабиётларида номалар гарчи мустақил жанр сифатида шаклланган бўлса-да, лекин умуман ёзишмалар оддий ҳалқ ўртасида кенг тарқалмади. Хатларни сақлаш ва нашр этиш ибтидоий даражада қолиб келди. Шунинг учун барча йирик адиларимизнинг ёзишма бисотлари ғоятда камбағалдир. Ҳолбуки, ёзишмалар ҳам даврлар, ҳам давр одамларининг қиёфаларини келажак насллар олдида равшан қилувчи шаҳодатлардир.

Шарқ адабиётлари бу шаҳодатнинг инсон ҳаётида қанчалар муҳимлигини ҳаммадан илгари англади, ёзишмаларни асарлар ичига турли шакллар ва турли мун-

дарижа йўналишларида олиб кирди. Лекин сўнг ижтимоий турмушда бошланган караҳтлик, мулоқотларга лоқайд қараш, тор қобиқларга ўралиб яшаш ва шуларниң ҳаммасидан келиб чиқадиган ва ҳаммасининг онаси бўлган танбаллик, эринчоқлик ёзишмаларни ибтидоий мавқега тушириб қўйди. Халқнинг қўли, агар таъбир жоиз бўлса, ёзишмадан чиқиб кетди. Бизда йирик наср жанрлари жуда кеч шаклланатганинига урф бўлаётганлигининг сабабларидан бири ҳам ёзишма маданиятининг муртак ҳолида қолиб келганлигиdir. Мактуб маданияти — ёзув маданияти, ёзма маданияти нинг бебаҳо бўлаги. Мактуб маданияти эътиборсиз жойларда ёзма адабиёт қулоч ёзиб ривожланмаган бўлади.

Мактуб аввало фикрлашга, атрофга разм солиб қарашга, яхши-ёмонни танишга, ҳар нарсага мустақил баҳо беришга, ўз фикрига эга бўлишга, кузатувчанликка ўргатади. Шулар баробарида мактуб ёзиш инсон ижтимоий фаоллигининг энг ёрқин кўринишларидан биридир.

Ҳаракатдаги инсонпарварлик деган ибора бор. У инсонпарварликнинг энг олни кўринишидир. Ҳаракатдаги инсонпарварлик бу ҳар кун, ҳар йил, кун сайин, соат сайин, дам сайин амалда инсонпарварлик билан шуғулланиш, унга қулоч-қулоч сўзларда эмас, амалда риоя қилишдир.

Алишер Навоий амалий инсонпарварликнинг дунё адабиётларидаги жуда ёрқин намояндасидир. Навоий асарларининг ҳар бир сўзи, ҳар бир ҳарфи инсонпарварлик ғоясига хизмат қилганидек, Навоий ҳаётининг ҳар бир дақиқа, ҳар бир сонияси ҳам инсонпарварлик ишига бахшида этилгандир. Навоий инсон бир-бирини парвариш қилиш учун туғилади деб тушунган. Бир-бирини парвариш қилиш нима дегани? Камолат бир-бирини парваришдан пайдо бўлмайдими? Саодат бир-бирини парваришдан туғилмайдими? Марузват, марҳамат бир-бирини парвариш қилиш истаги эмасми? Камолат келтирмаган, саодатни яқинлаштиргмаган, марҳамат туйғусини уйғотмаган ҳар қандай сўз пуч сўздир. Пуч сўзларга ўрганиб қолган халқ қашшоқлик ва разолатлардан қутулишда қийналади. Пуч сўзлар ҳар нарсадан ёмондир. Атрофимиз, эътибор берингизким, пуч сўзларга тўлиб ётибдир. Пуч сўзлар

пуч ҳәётининг маҳсуллни. Пуч ҳәёт эса, пуч сўзларни урчитади.

Навоийнинг «Муншаот» деб номланган асарига жамланган иншоларида унинг энг юксак мақомдаги инсонпарварликка интилгани ва шунинг баробарида пуч сўзлар, пуч интилишлардан буюк бир изтироб ичидаги яшаганлигига гувоҳ бўламиш.

Навоийнинг мактууларига кўпроқ салташат валинадларига битилгандир. Навоий Ҳусайн Мирзо фарзандларига ўзини мураббийдек тутади. Уларни ўз фарзандларидек севади ва хусусан, Бадиузвазон мирзога ёзган иншоларида замонасининг қанчалар фозил, қанчалар маданий ва қанчалар ҳукамо кишини бўлганишти кўзга ташланади. Навоий ўзбек элининг фарзандлари ҳам худди форсэли фарзандлари каби иншоси дилписанд ва имлоси аржуманд мактублар ёзишга ўрганишларини орзу этади. Шундай орзу йўлида ўзи биринчи қадам қўяди ва турли йилларда ёзилган мактубларни жамлаб, «Муншаот», яъни мактублар китоби яратади. Навоийнинг шаҳзодаларга мактублари бу—шахзодаларга мактубларгина эмас. Улар ўша даврнинг барча ёшларига, барча эл-юрт йўлида хизмат қилувчиларга қаратилган деб тушунмоқ керак. Навоий ўз хатларида замон ёшларининг эътиборларини нималарга тортади? Аввало, хатларда буюк шоир ва мутафаккир беҳад хоксор инсон каби намоён бўлади. У подшоҳ хонадони эшигига ўзини тупроқ деб билади. Ўз сўзларини хоксорлик остонасидан туриб, жаҳонга ҳукмини ўтказишга отланган шахзодаларга қаратади, тўғрироғи, «арзга еткуради». Навоий мактубларида шахзодаларнинг бебошлиги, айш-фароғатга берилганлиги, ҳар бири ўзича мустақил подшо бўлиш учун ўлиб-тирилиб ҳаракат қилганлиги, ўзаро низолар ва қирғинлар ичидагонга ботганлигидан ортиқ даражада қайғуряди. Шунинг учун шоирнинг хатлари фожиали нидоларга тўладир. Биз ўз ишимизда Навоий хатларида унинг сиймоси ва шахси қандай гавдалангани, Навоийнинг ижтимоий ва инсоний қарашлари қандай ифодаланганини асосий эътиборимизни қаратамиз.

«...Бу фақири хоксор ва бу хокиващи беътиборким,—деб ёзади Навоий чамаси Бадиузвазон мирзога,— бу давлатлиғ эшик остонасиға туфроғдек тушуб эрдиму хаёлимда бу эрдиким, магар ажал сарсари туфроғимни бўсағадин совурғай ва ўлим сайлий хошокимни

бу эшикдин сургай ва лекин хаёл ботил (бекорчи) экандур ва муддао отил (беҳуда).

Бу учурда (вақтда) юқоридин бу фақир хизматиға рақаме тортилди ва убидиятиға (қуллигига) қаламе сурулдиким, жавоби тасдиқдии ва хитоби сидқдии ўзга билілмади...

Хосил, шаввол ойининг йигирми олтисида душанба куни ижозат бўлиб, Марвдин Астрободга азимат итти-фоқи тушди. Эмди, агарчи сизга ҳеч ишда насиҳатга ҳеч эҳтиёж билмасмиз, ва лекин бир-икки сўз айтурдин ҳам чорамиз йўқдур. Оlamda ҳаргиз дўстлуқ киши душмансиз бўлмайдур ва аҳбоблиқ одами аъдосиз топилмайдур. Ва тавфиқ нишони улдуурурким, андоқ маош қилғайким, дўстлар тили душманлар қошида қисқа бўлмагай ва аҳбоб боши аъдо илайда қўйн тушмагай...»

Инишони давом эттиришдан олдин қўйидагиларин ўзнимиз учун аниқлаб ўтайлик. Хатдан шулар равшан бўлади:

Навоий давлатлиғ әшик — яъни шоҳ хонадонини ҳаддан зиёд яхши билади. Бу хонадон аъзоларининг феъл-атворлари, хатти-ҳаракатлари, эл-юрга, салтанатга муносабат ва муомала йўсинлари Алишербекка беш қўлдай маълум. Бу хонадоннинг шаҳзодаларига қай гапни қай йўсинда айтса, қандай таъсир ўтказиши Навоийга маълум. У шаҳзода сulton Бадиузвазонга ўз сўзлари оғир ботмаслиги чорасини кўради. Ўзини давлатлик хонадон остонасидаги тупроқ деб танитади. У шу олий хонадон остонасидан бир зум бўлсин йироқ тушмасликни кўзларди. Лекин замоннинг совуқ шамоллари ундан, унинг хоҳишлиридан қудратлироқ. Замоннинг совуқ еллари шоир хаёлларини елга совуради, уларни беҳуда бир нарсага айлантириб қўяди. У ўзининг олий фармон билан Астрободга жўнатилганини шундай баҳолайди ва буни Бадиузвазон мирзога маълум қиларкан, сафар олдидан шаҳзодага зарур сўзларни ёзиб юборишиликни лозим кўради.

Шоир қанча буюк бўлмасин, шаҳзодалар билан сўйлашганда, албатта, уларнинг мавқеига нисбатан ўз мавқеини таъкидлаб ўтишини жуда зарур билади. Иигит ёшига етган шаҳзодага қарата: сиз энди ўзингиз ҳар ишни ҳал қиласиз, ҳар ишга ақлингиз етади. Сиз насиҳатга муҳтоҷ эмассиз, дейди. Кошкийди шундай бўлса. Шундай бўлса, Навоий унга насиҳат учун кетадиган

вақтини бошқа мұхимроқ ижодий, инсоний ишларга сарф қыларди. Лекин ҳамма гап шундаки, Навоийнинг қулогига шаҳзода ҳокимлик қилаётган вилоятлардан турли ташнишли хабарлар келиб турибди. Шаҳзода бебошликлардан, раиятга зулмдан ва айниқса, майшатбозликлар, майпарастликлардан ўзини тутиб туролмайди. Навоий эса мирзолар хонадонига мансуб бўлган бу каби турли «параст-парастликларни» шоҳ Ҳусайн саройида ҳам кўп кўрган, уларга ҳар куни дуч келиб туради. Шаҳзода Бадиуззамон эса ўз уяси — ота саройида кўрганларини ўзи ҳоким ерда, ўз саройида тўла тақрорлайди. Навоий кўп нарсалар, кўп сирларни билади. Лекин уларни айтмайди. Бу сирлар бари: «ва лекин бир-икки сўз айтурдин ҳам чорамиз йўқдур», деган узроҳоҳлик тагида қолиб ётганини англаш қийин эмас. Ҳа, чорамиз йўқдур... Навоийнинг чораси йўқ. Агар шу сўзларини айтмаса, мулк ҳам, эл ҳам, Навоий ўзи эъзозлаган шаҳзода Бадиуззамон ҳам оғир кулфатларга дучор бўлаҗаги аниқ. Навоийнинг чорамиз йўқдур, деган сўзини худди мана шундай англашмоқ керак. Навоий шаҳзодани биринчи навбатда дўст-душман ҳолидан доимо огоҳ бўлишга даъват этади. Атрофимизни фақат дўстлар ва аҳбоблар эмас, нияти бузук душманлар, бадният фосиқлар ҳам қуршайди. Қишининг ҳаёти дўстлар ва душманларнинг уйғун қуршовида кечади. Алишербек ёш султонни атрофга тирик кўз, соғлом назар билан қарашга чақирияпти ва шунга яраша иш, йўриқ тутишини илтимос қиляпти. Навоий сўзлари биэга қоронгу, лекин шаҳзодага ғоятда тушунарли ишораларга тўлиқ. Айниқса, унинг манави сўзлари Бадиуззамонга яхши англашиларли бўлиши керак:

«Ва тавфиқ (мадад) нишони улдурким, андоқ маош қилғайким (тирикчилик), дўстлар тили душманлар қошида қисқа бўлмагай ва аҳбоб боши аъдо (душман) ислайнда қуий тушмагай...» Навоий шаҳзода билан дўстини уялтириб ва ундан ҳам баттар — унинг тилини қисиқ қилиб қўймаслик дўстни оғир аҳволга солмаслик устида мұҳокама юритяпти. Чамаси, шаҳзода Навоий нима дейтганлиги, нималарни назарда тутаётганлигини жуда яхши тушунади. Навоий унинг ёнини Султон Бойқаро ҳузурида олиб, уни не балолардан мұҳофаза қилиб, яна боз устига кейин бу иши учун қандай уятлик бўлганликларини билмай иложи йўқ. Бу борада Алишербекнинг тили Бойқаро таъналари олдида қашча маротаба қисиқ бўлиб турмаган дейсиз...

Навоий ўзини Бадиуэззамонга дўст ва мураббий дес билади. Зотан Бойқаро фарзандларининг тили Навоий каломини айтиб чиққан.

Навоий мирзолар ҳонадони юбошига толенинг икки киличи доим осилиб турғанилигини аниқ билади. Бу қўрқинчли қиличларнинг бири — бебошлик, иккинчиси — чоғирпастлик. Навоий шу икки бало туфайли адолат қўёши қорайиб, мулк тобора инқирозга юз тутиб бора-етганилигини кўриб турибди. Улуғ мулкни балки ўзига севимли шаҳзода Бадиуэззамон мирзо сақлаб қолар. У шаҳзодани икки хавфдан огоҳлантириш ва уни асрарни ўзининг буюк бурчи деб билади. Хатнинг давомини ўқиймиз:

«Аммо биронниким, тенгри таоло бир сурук бандалари устига ҳоким қилди — анга ҳеч амри итоати адлча бўлмас ва ҳеч наҳидин (қайтариш ва ман этиш) ижтиёб (тортиниш) чоғир таркича бўлмас... Ва ҷогирни «уммул-хабойис» дебдурлар. Жамъи ёмонлиғ андин мутаваллид бўлурким, борча яхшилиқ ва ямонлиқ бу икки нима зимнида мундариждур. Ва илтимос улким, агар мұяссар бўлур — куллий, ва агар мұяссар бўлмаса, улча мақдурдур, бу икки ишда кўшиш қилғайсиз. Дағи агарчи бу фақир ҳеч ҳисобда эрмасман, аммо эшикда эрконим била йироқ эрконимга бир ҳукм бермангиз ва улча бор Мирзонинг (яъни Ҳусайн Бойқаронинг) ҳукми ижросида саъй қилиб, ул давлат маслаҳатининг дақоқи-қидин (нозик маънилари) ҳеч вақт номаръи (кўринмаган, риоя қилинмаган) қўймангиз. Ва ҳазарот (улулар, ҳазратлар) ва маҳодим (ходимлар) била, балки сойир наввоб (ноиблар, ўринбосарлар) ва худом била хизматкорлиғ тарийқин маслук (маҳкам тутиш) тутунгуз.

Сўз мухтасар, бир рубоий била ихтисор қилилур...» Подшоҳ билан унинг фарзандлари ўртасидаги тортишув ва жангу жадаллар Навоийни оғир изтиробларга солган, айтиш мумкинки, унинг умрини қисқартирган ва ҳаёт шаъмининг эрта сўнишига олиб келган сабаблардан эди. Навоий қўлидан келган қадар бу жанжалларни, тортишув, талашларни бостиришга жаҳд қилди. Үғилларни ота олдида, отани ўғиллар олдида қаттиқ ҳимоя қилди. Лекин бу жанжаллар ва ўзаро адоватларни келтириб чиқарган ҳодисалар, балки Ҳадича бегим каби зотлар, ҳар қанча улуғ бўлмасин, Навоийдан кучлироқ эди. Толе ва тарих йўлини яхшилиқ, эзгулик йўлига буришга Навоий ожизлик қилди. Адоватнинг табиати ғоятда чу-

құр. илдизи ҳар томонға тарқалған эди. Бошқа бир хатида Навоий Бадиuzzамонға отаништің фарзанд ҳәетидеги ўрнини тушунтириш учун узоқ тарихларга, муқаддас манбаларға мурожаат қылады:

«...Пайғамбар... буюрубтурким, тенгри таоло ризоси ота ризосига вобастадур ва тенгри таоло ғазаби ҳам ота ғазабига вобастадир. Бас, киши ота ризосин ҳосил қылса, тенгри таоло ризосин ҳам ҳосил қылмаш бўлгай ва ота ғазабига учраса, тенгри таоло ғазабига учрамиш бўлгай. Мундоқ бўлғондин сўнгра киши нечук ота ризосидин айру дам үргай ё қадам қўйгай. Ва машойх сўзицурким... отанг парвардигорингдур, бу жиҳатдинким, тенгри таоло сени йўқдин бор қылмоққа васила улдур ва туфулиятдин шабоб синниғача парвариш бергувчи ул. Ва Ҳаким Сулаймон... сўзицурким, ота қодири қайюм, она розиқи марсум ва Адип Аҳмад... дебтурким, рубояи:

Атодин хато келса, кўрма хато,
Савоб бил хато токи қылса хато.
Атонинг хатосини билгил савоб,
Сени юз балодин қутқарғай худо.

...Ғараз бу муқаддимотдин улким, бу банда доим сизга давлатхоҳлиғ сўзин айтибмен ва сизни умру давлатдин бархурдор тилиб, дуо қилибмен ва ҳар номуносиб ишким, сиздин кўрубмен, сизга айтибмен, балки китобларимда насиҳатномалар назм қилиб, арзингизга еткурубмен.

Бу учурда бир неча иш сизнинг тарафингиздин эшилдиликим, важиб кўрунди сизга арз қылмоқим, борча Мирзонинг жонибининг риоятидин ғоғил бўлғон чоглиғ кўрунди.

Бири улким, вилоят молин машваратсиз олиб турурсиз ва бу маъҳуд (келишилган, ваъдалашилган) эмас эрди. Ҳеч уч-тўрт кун эмаским, бир кишингиз келмас, агар имойин қилсангиз эрди, йўқ дейилмагуси эрди.

Яна улким, битибсизким: «Астрободға киши юбормангким, бермагумдир». Бу мазмунни ҳам мулойимроқ битиолур эрдингиз ва «Ироқ вилоятин улашибмен», деб битибсиз. Иншооллоҳ, Ироқ иликка киргай. Кирмасдан бурун, Мирзо била бир-икки қатла сўзлашмай, арз қилмай, бу иш қилимниш бўлса, ўзга элдин ажаб бўлмаса, сиздин ажаб воқе бўлубтур.

Керак эрдиким, шаръ риояти учун, ўзунгиз ҳам оз ё кўп соқол қирқмасангиз эрди, то анга не етгайким,

Элингизнинг ҳам соқолларин қирқтурмагайсиз. Мунда күп сўз бор, деса бўлмас...»

Навой, қандай бўлмасин, ўртадан гина-кудурат, ноаҳиҷчилик кулфатини кўтаришга уринади. Эл-юртнинг равнақи ва тинчлиги йўлида барча воситаларни ишга солади. Упинг бу урнишлари замонрида подшоҳ хонадонининг манфаати эмас, эл, ҳалқ манфаати ётибди. Тарихда Навоийдек яраш миссиясини бу қадар жонкуярлик ва фидокорлик билан олиб борган иккинчи бир зот бормикин? Шу поёб хатнинг охири шоирининг шоҳ ва упинг ўғиллари олдиғаги хатти-ҳаракатлари қанчалар улкан инсоний миқёс касб этганилигини аён кўрсатади. Куйган дилининг ноласи бўлган ушбу хатни якунлаб қўяйлик:

«Соҳиб давлат салотин (яъни Ҳусайи Бойқаро) мушфиқ ва давлатдоҳ қулларининг беғараз сўзларига кирибдурлар. Узинги билурсизким, Мирзо тобугида бу қул не навъ сўзларга густоҳлик қилибмен. Сизнинг дағи қошингизда ҳамул дастур била воқе бўлубтур. Ёшингиз узун бўлсан. Аидоқ кам воқе бўлубдурким, бу қулнинг сўзин рад қилмиш бўлгайсиз. Эмди дағи бу қулнинг жони куйганди, ўзгаларнинг этаги куймас. Бу бир неча сўз густоҳлик қилулди, умид улким, қабул тушгай. Тушмаса, бу банда айтур сўзни бўйнумдин адо қилмиш бўлғаймен. Тенгри таоло тонуқдирким, бу арзадошт Мирзо бу йруғи била эрмас, балким вуқуфлари ҳам йўқдур. Хаёлингизга келмагай — буйруқ била битилибдур. Чун сизнинг тобуғингизда айтурча давлатдоҳлиғ сўзини айтурға маъмурмен. Ул жиҳатдин густоҳлиғ била арзадошт битилди».

Аерлар қаъридан келаётган овозлар ана шундайдир. Ўзаро талашлар замонида замину замон қўлдан чиқиб бормоқда эди. Навоий бу улуғ хатарни ҳаммадан бурун англаған, сезган эди. У замона шоҳларини бу хатардан воқиф қилишга не куч, ақл сарф қилди. Лекин шоҳлар ўз қисмат шаробини тўла ичдилар. Бойқаро ўз набирасини қатл қилишгача борганди, Навоийга энди ҳар нарса аён бўлган эди. Шу муносабат билан ёзган хатларидан биринда у шундай деб тан берди:

«Аммо тириклиқ ғаниматдур. Бу факир илгимдин келганча саъи қилдимким, бу ерга етмагай, чун тақдир бу воқеага боргондур — суд қилмади ва чун қазо бу ҳодисага боис эркандур — натижа бермади. Эмди мултамас улким, тенгри таоло тақдирига ризо берилғай ва борча тақсирни ўз нафсидин кўрулгай...».

Алишербек шунча қабоҳатлар ва шунча келишмас

адоватларни кўриб ва улар ичида яшаб ҳам умидсизликка тушмаган эди. Унинг кўзлари ҳамон очиқ. Ҳамон насллардан умид қиласди.

КОИНОТ, КҮХНА РАВОҚ ВА НАВОИЙ

Мир Алишер Навоий коинот доирасида хаёл қиласди, фикрлайди ва ёзади. Навоий самовий фикрлайди. Тўғрироғи, самовий фикрлаш билан воқеи фикрлашни узвий боягайди.

Навоийнинг тасаввур миқёси инсон кипригига қўнгган ғубордан то Зуҳал қўлидаги газчўп билан ғалвиргача қамраб олади.

Навоий алоҳида тил оламини яратганидек, алоҳида фикрлаш оламини ҳам яратганки, бу оламга тегишли ҳар бир сўз, ҳар бир тушунча алоҳида дикқат-эътиборга лойиқ.

Белоён фикр ва тимсоллар дунёси бўлган «Ҳамса»-нинг бошланишида Навоийнинг хаёли коинот чексизликларига кўтарилади. Ва бунда истисносиз барча нарсаларни, уларнинг катта-кичиклигидан қатъи назар, бир-бирига чамбарчас боғлиқ ва пайванд ҳолда кўради. Бунда сайдерлардан тортиб кўзга кўринмас юлдузларгача шамолдан тортиб сувгача, одам боласидан энг кичик махлуққача — ҳаммаси бир-бирига уйғун ва мутаносиб эканлигини англайди. Шу мутаносиблик ва уйғулик олдида у ҳайратга тушади. Навоийни яна бир мўъжиза лол қиласди. У коинотда ҳамма нарсалар ўз-ўзича мустақил ва ўз-ўзича боғлиқлиги билан бирга ҳамма нарсалар яна бир-бирларига кўзгу қилиб яратилганлигини ҳам қайд этади. Шунинг билан биргаликда яна буларнишг барни жам ҳолида Яратганинг қудрати, яратувчилиги, меъморлиги ва мусаввирлиги, шафқати ва қаҳрига ҳам кўзгудир.

Навоий ер куррасини фалакнинг маркази деб тасаввур этади.

Айлади сокин курраи ҳокин,
Сойир этиб давраи афлокин.
Токи муҳит ўрнига афлок эрур,
Маркази онинг курраи ҳок эрур...

Унинг хаёлида фалак ер атрофида айланниб туради. Мана шу айланниб турувчи сойир коинот ва сокин ернинг худди марказига эса у инсонни қўяди.

Ганжинг аро нақд фаровон эди,
Лек баридин ғараз инсон эди.
Турфа каломингга доги комил ул.
Сирри ниҳонингга доги ҳомил ул.
Кўнглига қилдинг чу яқин ганжи қисм,
Жисмини ул ганжга қилдинг тилсим...

Навоий оламнинг бу каби яратилишида шунчалар тенгсиз маъно уқади. Яратган, Яралган ва Яралмишга доир буюк илмлар ва очиб бўлмас сирларни беҳад лўнда ва равшан замирли сўз ва сатрларда ифодалаб ўтади. Мутафаккир наздида инсон «ганжи роз»гина эмас. Ҳолбуки, «ганжи роз» деб таърифлангач ва бунинг исботи учун улуғ сўзлар юритилгач, чамаси, бошқа таърифнинг кераги йўқ эди. Лекин Навоий назарида бу таъриф билан ҳам инсон моҳиятини қамраб олиб бўлмайди. «Ганжи роз» — инсоннинг бир сифати. Инсонни тўлароқ англаш учун унинг бошқа бир сифатини ҳам айтиб ўтиш керак.

Маърифатинг ким қила олмай сифат,
Қилдинг ани орифи ул маърифат...

Демак, инсон «ганжи роз» бўлиш билан бирга «орифул маърифат» ҳам! Яъни маърифатни билувчи! Бу икки таърифда энди инсоннинг моҳияти бизга тўлароқ на-моён бўлади. Улар билан бизни тушунтириш мумкин. Бизни англаш мумкин. Бизнинг кўнглимизга йўл топиш мумкин! Заррадан Юпитергача бари-бари Яратганга кўзгу экан, демак улар муқаддас, яъни «ҳарам» деб билади Навоий. Бу «ҳарам» ўз-ўзидан муқаддас. Лекин унинг муқаддаслигига шоҳид бир нарса бор. Уни муқаддас қилиб турадиган ягона кўзгу бор. Нима экан у кўзгу? Ким экан у шоҳид? Юқоридаги мисралардан сўнг Навоий яна икки мисра ёзади:

Айла Навоийни бурун одамий.
Ким бўла олғай бу ҳарам маҳрами...

Шундай қилиб, коннот марказида курраи ҳок, ер марказида одам, өдамнинг марказида — одамийлик турди. Одамийлик йўқолган ёки бартараф қилинган ерла ҳаёт тугайди. Оламга маҳрамлик қилмоқ учун ҳаммадан бурун одамий бўлмоқ шарт. Йўқса, бу боргоҳга кирмоқдан маъно йўқ.

Навоий тасвири ва қарашларида одамийлик Яратганинг лутфи ва карами. Одамийликнинг йўқолиши ва

инсониятнинг турли гуноҳларга ботиши эса Яратганинг Каҳри бошланиши...

Навоий Яратганинг Карамини ҳам, Қаҳрини ҳам коинот миқёсларида тасаввур қиласи ва шу тасаввуринг кўра тасвиirlайди. «Ҳамса» ибтидосида қиёмат қойим манзараларини чизаркан, унинг ҳад билмас хаёли ердаги ва кўклаги ҳолатларни мислсиз сатрларга жо қиласи:

Соврулубон кўк бир этак гул киби,
Кўзғалиб анжум бир овуч гул киби...

Мана шу юлдузлар тўзони ичра Навоий Зуҳал, Муштарий, Баҳром, Уторуд (Тийр), Қуёш, Зуҳра, Ойнинг ҳар бирининг ўзига хос ҳолини чизади.

Ер тутубон авжи фалак таҳ тушуб,
Гаҳ бу чиқиб юқори, ул гаҳ тушуб.
Үт қилибон баҳрда ғаввослиқ,
Тоғ этибон чарх уза ракқослиқ.

.....
Тоғ фалакларда тароқ тароқ,
Борча тароқида аён алфироқ...

Бу мўъжиза тасвири ва тасаввуротда инсон боласи учун гўё халос йўли қолмагандай туюлади. Гўё барни шу коинот қора қуюни ичра йўқолиб кетадигандай. Лекин нажот бор, нажот йўли бор, нажот имкони бор. Боя Навоий бу гўзалдан гўзал оламга маҳрамлик қилмоқнинг бирдан-бир белгисини кўрсатган эди. Яъни одамда одамийлик шарафи бўлмагунча уни дунёга келган деб аташ мумкин эмас. Одамийлик шарафи оламга маҳрамлиknинг ёлғиз-ягона белгиси экан, коинотда умумқуюн ва қиёмат чоғида уни қутқарувчи нажот борми? Бўлса, у нима?

Навоий ёзади:

Ул нафас иймон менга ҳамроҳ қил,
Кўнглум аро маҳви сиваллоҳ қил...

Навоий нажот — иймонла деб эътиқод қиласи. Қиёмат кунига кўнглида ёлғиз Оллоҳ ёди билан киришни истайди.

Шундай қилиб, Навоий одамийлик ва иймонни коинот миқёсига кўтаради. Уларни гўзаллик ва ҳалоскорликнинг асоси деб қарайди. Сўнг беш буюк достон ичидаги турли инсон ва мамлакатлар ғуларнинг

куч-қудратини тимсолларда тенгсиз бадий даҳо билан намоён этади.

Навоий коинот ва оламнинг қурилиши, инсоннинг яратилиши устида бадий хаёл қиларкац, беҳад маънодор яна бир тушунчани ҳам бот-бот эсга олади. Биз бунда Навоийнинг коинот ҳақидаги тушунчаларига боғлиқ ҳолда унинг «Базм» тушунчаси тўғрисида ҳам тұхталиб ўтишни истаймиз. Бу пайтгача Навоийда «Базм» тушунчаси ва унинг доираси ҳақида ҳеч ким, назаримизда, тўхталган эмас.

«Ҳайрат ўл-аброр»нинг XII бобида Навоий ҳамса-чиликка асос солган Низомий ва Деклавий ҳақида юксак мақомда сўз юритади ва орада шу сатрларни битади:

Қайси шабистонғаки, ул қилди азм,
Базми ерида бу дөғи тузди базм...

Низомий олам ижодхонасининг қайси бир махфий, сирли хилватгоҳига қадам қўйса, Деклавий ҳам ўша ерда ўз ижод базмини тузди, демоқчи Навоий. Эътибор қиласайлик: Навоий ўша икки даҳо ижодини «Базм»га қиёс қиласи. Низомийни «роҳрав», Деклавийни «пайрав» деркан, яна:

Базмда бир кун юзидин нур эди.
Ҳар соридин нодира мазкур эди...

деб ёзади·кейинги бобда.

Шундай қилиб, «Базм» тушунчаси. Боя Навоий тушунчаларни коинотий, самовий миқёсларга кўтаришини эслатган эдик. «Одамийлик» ва «иймон» тушунчаларни самовий даражага кўтарганлигини кўрдик. «Базм» тушунчаси ҳам унинг самовий фикрлаш доирасига киради. Навоий коинот ва оламда «базм» ҳукмрон деб билади. «Базм» бу — Яратганинг тирикликка тухфаси. Тирикликнинг, ҳаётнинг байрами. Навоий «Базм» хусусида сўз юритаркан, биз бундан қуйидагиларни тушундик:

Базм — бу коинотда гавҳарлар сочиладиган олам.

Базм бу — юлдузлар сочилиб саодат буржига ки-рувчи он.

Базм бу — тенгсиз ҳуси ва малоҳат, зебу мажоз олами.

Базм бу — сеҳргар санамларининг жилвасозликлари.

Базм бу — ҳақиқат сўзидан баҳрамандлик.

Базм бу — тирикликнинг тўхтовсиз давом этиши.

Базм — Низомий каби даҳо зот Деҳлавий каби иккинчи даҳони, бул иккиси қўшилиб, учинчи — Жомий даҳосини, бу учи бир бўлиб, Навоий даҳосини нурлантирадиган ҳол ва маскаи. Яъни «Базм» — даҳолар даҳоларни пўллайдиган ва қўллайдиган эъжозий ҳодиса. Унинг сарҳадлари бутун қадим Шарқ адабиёти ва фалсафаси, Ислом руҳий иқлимларини ўз ичига олади.

Базм бу — мўъжизакор тухфалар дунёси...

Навоий ана шу базм дунёсига кўнглида улуг ҳаваслар билан қадам қўяди. Даҳолар базмидаги унда ажаб бир миллатпарварлик кафияти бош кўтаради. «Махзан ул-асрор» ҳам, «Матла ул-анвор» ҳам, «Тухфат ул-аҳрор» ҳам форсигўйлар базмларида яратилган эди. Уларда форс тилининг қудрат ва гўзаллиги намоён бўлган эди.

Навоий туркий базмни, туркий халқлар санъатлари базмини орау қиласди.

Навоий «Ҳамса» бошланган нуқтада уч «Базм»ни бир-бирига боғлаб тасвир этади.

Биринчи базм: Коннотдаги базм.

Иккинчи базм: Даҳолар санъати базми. Сўз базми.

Учинчи базм: Миллий базм.

Навоий қўллайдиган кўп тушунча, истилоҳлар — «Жаҳон боғи», «Коннот гули», «Гулшан», «Даҳр боғчаси»... кабилар ўша «Базм» тушунчаси ичига киради ва уни турли томондан тавсифлаб туради.

Оlam va konnotda bazm bir zum ham t'uxtamайди. Bazm iştirokchilari t'uxtosiz ўзгариб turadilar, odamlar ўrniga boşqa odamlar, taribiylar ўrniga boşqa taribiylar keladi. Lekin «bazmning azal moxiyati ўzgarmaididi. Bu abadiy-azalij bazm uzra Yaratgannining: «Kun!» — degan amri timumay янграб turadi. «Bazm» bu «Bўladni!» — degan ilk sўzdan tughiladi. Navoijda tasvirlangan bazmlarning shiori ham shu sўzdir.

Навоий тириклик ва ижод базми давом этаётган азал боғи эшигидан кириб келар, бу боғнинг чексизлиги, гўзаллиги, мавзунлигидан ҳайратга тушар, Низомий, Деҳлавий, Жомий даҳосига чексиз эҳтиромини баён қиларкан, ўзини Яратганининг Карам ва Қаҳри, даҳолар сўзи қаршисида бениҳоя кичик зарра деб билади. Ўзини эргашувчи леб атайди.

Ит киби чун пастлигим чогладим,

Ўзин бийиклар ипига боғладим.

Бўлса улар озими дашти адам,

Мен ҳам ўлай соя киби ҳамқадам.
Қаҳри бақо ичра алар бўлса гум,
Мен ҳам ўлай робиъухум калбуҳум.

Ит деса, бугун биз ажабланмайлик. Ит азал базмнинг иштироқчиси. Шоирлар уни эргашувчи, қўриқловчи ва вафо тимсолига айлантирганлар. Навоий бу ерда «Қуръон»да баён қилингани бор соҳиблари ҳақидаги қиссага ишора қилади. «Қаҳф» сурасининг 21-оятида: «Сайақулун салосатун робиъухум калбуҳум...» деб бошлинувчи калима бор. Яъни Асҳоби Қаҳф нечта киши эдилар? — деган саволга, бирор: учта эди. тўртингчиси ит, бошқаси: Бешта эди, олтинчиси — ит, яна бошқаси: Еттига, саккизингчиси — ит, деб жавоб берадилар. «Уларнинг сонини раббим яхши билади, деб айт».

Навоий уч шеърнит ва тафаккур даҳосини эътиқоди йўлида ғорга кириб яширингани гўзал ҳулқли ёшларга нисбат бериб ўтятти. Уларни эътиқодидан тоймайдиган зотлар қаторига қўйяпти. Шу билан бирга ўзини уч даҳони қўриқлаган ёки, янада тўғрироғи, уларга вафо билан эргашган ит қаторига қўяди. Бу ҳам Навоий маънавиятидаги тарихда камдан-кам учровчи буюклика бир ишора. Навоий кейинчалик, ўн йиллардан сунг, бир воқеа муносабати билан бу мисраларга қайтиб, «Хамсат ул-мутаҳаййирин» асарида шуларни ёзиб ўтади: «Ул вақтиким, факир «Хамса»га татаббубу килдим, бир достонда ҳазрати Шайх Низомий ва Амир Нисрар Деклавий ва ул ҳазрат маддоҳларидаким, Ўзумни ихлос ва шиёзмандлиғ юзидин аларга тобеъ ва пайрав тутуб, сухангузорлиқ воқе бўлуб эрди».

Лекин Навоий ўз сўзишинг кучини яхши билади. Чунончи у Базм ҳақидаги тасвирини давом эттириб, қуйидаги ажойиб гувоҳликни беради:

Базмда ҳар мутриби достон саро
Чекса тараннум била дилкаш наво,
Нақшда ҳар неча талоло деса,
Ё амал ичра танадирно деса,
Борчасидин ҳаз этар аҳли уқул,
Гар ҳуд узоқ чекса бўлурлар малул.
Ё бу наво зимнида асраб маҳол,
Чекса Навоий сўзидин бир ғазал,
Ким анга оташ бўлуб оташ фишон,
Берса улус кўнглиға мунгдин нишон —
Базмда ул лаҳза алолони кур,
Қўйи харобот аро ғавғони кур.

Қўрки, нечукдур яқо чок айламак,
Ўзни фифон бирла ҳалок айламак...

Навоий тириклик базмини гўзал назмсиэ тасаввур қилмайди. Гўзал назм «базм»га түғён солади. У сўзни май билан тенг кўради. Ўзини сўз майдан доим маст эканлигини ёзди: «Менки, бу май нашъасидин мастмен. Дайри фано аҳлиға ҳамдастмен...»

Сўз майдан мастилик ҳам ўша «базм»га хос бир ҳолатdir. Навоий кейинги боблардан бирида сўз ва назм базмига кириб, ўз атрофида унга ҳамовоз, жўр бўладиган туркигўй шоирларни кўришни истаганилиги ҳақида ёзди.

Турк суруди била солиб қўлум.
Қилсан адo: «ҳей тулугум, ҳей тулум»,
Ул қила олмаса ҳамовоziлиқ,
Қилса аёлгу била дамсоziлиқ,
Бўлмаса бир жомим ичар журъати,
Бўлса бирор журъа чекар қуввати.
Базми муродимни сипеҳри баланд
Қилмади бу тухфа била аржуманд.
Ийқ эди эркинму бурун ҳам киши,
Ким бу май ичмак эди эркин иши?
Ё бўлубон борчаси азм эттилар,
Базмға мен етмас экач кеттилар...

Навоий бу ҳолни ўзи учун «бекаслик» деб атайди. Бизга эса бу сатрларнинг фожиавийлиги миллий ҳаётда улуғвор санъатлар базми у пайтда ҳали етилмаганлиги, ҳали урф бўлмаганлиги, Навоий эса бу миллий базмни беҳад соғинганлигини кўрсатади.

Лекин Навоий йўқ экан деб қараб ўтиrmади. У миллий санъат базмига асос солди. Бу базм учун сервиқор, улуғ, нурамас саройлар ҳақиқатлар қурди. Ўзини ёнг паст олиб тўриб санъат ва ѡмаънавият дунёсининг энг олий мақомларига кўтарилиди. Одамийлик ва йўмон, орнфул маърифатлилик миллий ҳаётда гўзал ва сўнмас базмлар яратишни тақозо қилишини исботлади.

НАВОИЙНИНГ ХАЁЛ КЕМАСИ

Ҳазрат Навоийнинг ҳар бир ғазали мўъжиза билан яратилган тенгизиз бир кемадурким, ул кема мудом Руҳнинг доимо сертуғён, доимо мавжли уммонларида беш юз эллик йилдан берин сузиб юрадир.

Ғазалларнинг сўзлари ул кеманинг мўъжизакор гаввосларидурким, ул гаввослар беш юз эллик йилдан буён маърифат чоҳларидан жавоҳирлар излайди ва жавоҳирлар беради.

Ул хаёлий ғазал кемасининг асрлар сари йўлга чиққан доруғаси даҳо шонрининг ўзиидир.

Навоийнинг бу хаёлий кемаси сузмаган денгиз ва у стмаган инсон мазгиллари йўқ. У ҳар қайга етганда фақат одамийликдан хабар беради, одамийлик камолотидан башорат айтади.

Навоийнинг ушбу одамийлиги Руҳининг буюк парвозларида стилгандир. Руҳ эса инсон боласини азал-абал йўргакланган Висол ва Хижрон ўйинларида иштирок этади.

Дунё билан топишмоқ висолини ва охир-оқибат дунё билан хайрлашмоқ ҳижронини ҳеч ким Навоийчалик ёниб ифодалай олган эмас. Ҳудди мана шунга кўра ҳам у Шарқимизнинг Милтони, Шарқимизнинг Данtesи, ўзбекнинг маърифатли Гётесидир...

ОДАМНИНГ ХОҲИШЛАРИ

Одамнинг хоҳишлари кўнгилда денгизнинг тўлқинларидай пайдо бўлади. Тўлқиндай пайдо бўлиб тўлқиндай ўчади. Лекин тўлқиннинг келиши тугамайди. Одамнинг хоҳишлари тўлқин бўлса, дунё шу хоҳишлар тўхтосиз бош ўриб борадиган соҳил. Тўлқинларининг садолари эса дунёда рўёбга чиқмаган орзу-истакларнинг нолаларидир. Одам ҳаётининг турган-битгани майллар ва истакларнинг туғилиши, синиши, барбод бўлиши ва бунинг тескарни, яъни барбод бўлиши, синиши ва туғилишидан иборат.

Истак, хоҳиш одамда ақлдан кўра устунроқ. У ақл пайдо бўлмасдан илгари пайдо бўлади.

Барча ҳаракатларимиз ва интилишларимизни истаклар бошқаради. Истакларнинг эса чеки йўқ.

Одамнинг хоҳишлари билан унинг имкониятлари ўртасида тубсиз фарқлар этади. Хоҳиш кўп. Имконият горва чекланган ва ҳар кимга ўз ризқи ўлчаб берилган.

Дунё ҳеч қачон одам боласининг хоҳишлари билан ҳисоблашган эмас. Хоҳишлар тинимсиз енгиллиб боради, енгилган хоҳишлар кўпгилни ўзига мозор тутади. Ҳар бир кимсанинг кўнгли бу — енгилган истаклар мозори. Хоҳишлари рўёбга чиқмаган одамлар дунёни тескари

қурилган деб топадилар, уни хокдон ва ҳасратхона деб атайдилар ва шоирлар кўнгиллардан келиб турадиган иолаларни шеърга соладилар.

Нега одам боласининг ҳамма ҳоҳишлари рӯёбга чиқавермайди? Нега ҳаётда ушадмаган истаклар бунчалар кўп? Нега биз тугамас армон ичида яшаймиз?

Навоийнинг ғазалида бу саволларга жавоб борми? Борга ўхшайди.

Истакларнинг юзага чиқмаслигига сабаб: одам билан у қурган дунё ўртасида уйғунликнинг бузилганида. Одамнинг ўз ҳоҳишларига кўр-кўронада қул бўлиб қолганида. Ҳоҳишларни рӯёбга чиқаришда табиатнинг ўзи ва унинг илоҳий амалларидан ибрат ва кўрсатма олмаганида. Уйғуликтининг йўқолиши аслида муҳаббатнинг йўқолганидир.

Худо «Вал-лайл» сурасида айтади: «Инна саъйакум лашатто». Яъни, сизнинг интилишларингиз турличадир. Интилишларнинг турличалиги дунёда ва одамлар ҳаётида бир-биридан қочувчи кучларни вужудга келтиради.

Мен ҳастни ва тақдирни юракнинг хомашёси деб биламан. Яъни: ҳар кимнинг тақдирни ўз юрагининг ихтиёрида. Юрак ҳастни ва берилган тақдирни қандай тасарруф этса, қандай қабул қилса ва қандай сингдирса, ниҳоят, қандай йўлга бошласа, баҳт ва баҳтсизликнинг даражаси ҳам шундайдир.

Навоий ўз ғазалларида инсоннинг ранг-баранг руҳий ҳолатларини ифодалайди. У руҳий ҳолатларни жуда нозик идрок этади. Нозик идрок этгани учун сўзларни ифодаси ўта равшан. Либоси келинчак либосидай. Равшан фикр, теран идрок унинг ғазалларини ҳикматга айлантиради. Навоийнинг фикри доим афористик жамулжамликка интилади.

«Мени мен истаган...» деб бошланадиган ғазалнинг икки машҳур байти ифодасининг бадиий куч-қудратига кўра афоризм тусини олган. 550 йил мобайнида ҳеч ким Навоийнинг бу фикрини инкор қилолган эмас. Эҳтимол, «Сўймаганга сўйканма» деган фикр одамзоддининг ўзидаидар. Лекин поэзийнинг қадим қонунияти бўйича жуда қари фикрлар ҳам, мабодо гўзал либос кийсалар, яна яшарадилар ва янги фикр каби жараанглайдилар.

Навоий биринчи ва иккинчи мисрада «истак» сўзига алоҳида ургу беради. Учинчи мисрада уни яна бир карра — учинчи маротаба тақрорлайди. Тўртичинчи мисрада эса «истак»нинг синоними «тилак» сўзини қўллайди.

Бизнинг истакларимиз бошқа бир кимсанинг истаклари билан доимо ҳам мос тушавермаслиги ва бу ҳоллар турли зиддиятларни юзага чиқаришга ишорат қиласди.

Бирордан баҳра исташ эхтимол ёмон эмасдири. Лекин баҳра исташ ва умуман фақат истакнинг ўзи инсон муносабатлари ва мумалалари учун етарлимикан? Бир сўз билан айтганда, истакнинг қуруқ ўзи етарлими?

Навоий ғазалидан шу англашиладики, истакнинг қуруқ ўзи баҳра исташ учун етарли эмас. Истакнинг қуруқ ўзи, истакнинг тажовузкорлиги — бир-биридан қочувчи кучларни юзага келтиради. Навоий кейинги байтда ҳур ва пари базмини истамаслигини ёзади. Лекин шоир менинг қатлимда аччиқ кўзёшлари тўкмайдиган ҳурни истамайман ва менинг ҳаётим учун яширинча қувонмайдиган, гўзал табассум этмайдиган парини истамайман, деб изоҳ беради. Бу ғазалда унинг инкор шаклидаги фикрлари доим тасдиқ маъносига эга. У инкор орқали тасдиқлаш усулини ғазалнинг бошидан охиригача изчил қўллайди. Кейинги байтда шоир ой ҳам, кун ҳам керакмас дейди. Ойнинг ҳусни ичимни чок-чок этмаса ва куннинг малоҳати жисмимни банд-банд қиласа, бундай ойнинг ва бундай куннинг — уларга хос ҳусн ва малоҳатнинг менга ҳожати йўқ, деб қайд этади. Кейинги мисрада эса менга бузуғ кўнглімдан бошқа ерда жавлон урмайдиган менинг ўз қотилваш, мажнунваш чавандозимгина керак, деган фикрни тасдиқлаб айтади. Бу мисранинг заминида кўнгил кўнгилга уйғун, яъни мос бўлиши, мувофиқ бўлиши керак деган фикр пинҳон. Бу мисра ғазалнинг биринчи ва иккичи байтидаги шоҳ фикрга кутилмаган шуъла ташлайди, улардаги фикрларни кутилмаган томондан ёритади. Нега мени мен истаган ўз сұхбатига лойиқ кўрмайди, деган саволга шу мисрадан жавоб чиқади. Бунинг сабаби — кўнгилларнинг кўнгилларга лойиқ эмаслиги, мутаносибликларнинг йўқлигидир. Истакнинг ёлгиз ўзи эса уйғунликнинг ўринин тўлдиромайди. Уйғунлик бўлмаса, истакларнинг қуруқ ўзи одамга фириб беради. Истакларнинг ўйинлари маккор чархнинг алдамчи ўйинларига ўхшайди. Чарх эса доим одамнинг бўйнига сиртмоқ ташлашини кўзлайди.

Навоий охирги байтда яна ойни эслайди. Лекин энди бу ойнинг юқоридаги ҳур, пари, ой ва кундан жиддий фарқи бор. Бу ойнинг юзи ўтлуғ. Ут эса энг аввало

муҳаббатга алоқадор. Ойнинг ўтлуғ юзи унинг муҳаббатидан дарак беради. Табиийки, шоир бу олов чехрага кўз тегишини истамайди. Уни муҳаббат уругини сочиб асрашни истайди. Навоий ўтга исириқ ташлаш одатига нозик ишора қилиб ўтади. Лекин энг муҳим фикр бу ерда шуки, фақат муҳаббатгина кўнгилларни, дилларни, истакларни бирлаштиради. Истак қанчалар кучли бўлмасин, ҳуси қанчалар гўзал бўлмасин, агар муҳаббат ва уйғунык ўртада бўлмаса, улар одам учун фириб ва сиртмоқ, алдовдан бошиқа нарса эмас. Навоий шу фикрни ажид бир далолатлар силсиласида теран ифодалаб беради.

ҚУЕШ БОШПАНАСИ ВА БОБУР

Бир одамда бутун бир халқнинг хусусиятлари жамланиши ва юзага чиқиши мумкин деб ўйланаман баъзан. Масалан, Гёте немис халқининг, Достоевский русларнинг, Шекспир инглизларнинг мужассам тимсоли бўлиб кўринади менга. Узбекларнинг шундай одами борми? Бор дейман ўзимга ўзим. У — Бобур. Узбекларнинг, қолаверса, барча туркий қавмларнинг хос хусусиятларини ўз шахсида жамлаштирган сиймолардан бирин Заҳирiddин Мухаммад Бобур эди.

Бобурнинг фикр қилиш йўсинларида, хаёл сурин ва хаёлини сўз билан ифодалаш тарзларида, барча ранго-раинг кечинмаларида, зтроф-мухитга, мураккаб дунёга, табиатга, дўнёнинг қурилиши, тартиботи, равишига муносабатларида унда тўла туркиёналик ва демак, ўзбеконалик кўзга яққол ташланади.

Бобур замонида ва ундан минг йиллар илгарилар ҳам туркий қавмлар ўз ботирликлари ва ўта соддадилликлари билан машҳур эдилар. Лекин сон-саноқсиз туркий қавмларнинг азалдан ҳеч аримас бир фожиаси бор эди ва бу фожиа уларни неча минг йиллардан бери тўхтовсиз таъқиб қиласиди. Эҳтимол бу фожиа кейинги иккиминг йилликининг энг тузалмас фожиаси бўлгандир. Гап шундаки, туркий қавилар ҳеч бирлашолмас эдилар. Қавмлар яна қавмларга бўлинар, бир неча қавм бирлашиб ҳар юз йил — юз ўттиз йилда бир сулола ташкил этар ва бу тили бир, урф-одати, феъл-атвори, табиати бир сулолалар бир-бирлари билан ернинг ўртасини ташлашар эдилар. Салжуқийлар, газнавийлар, ануштегин — хоразмшоҳлар, қорахонийлар, санжарийлар, темурий-

лар, шайбонийлар, жонийлар, бобурийлар, ҳоказо ва ҳоказо сулолалар ернинг ўртасида шунчалар қудратли давлатлар яратган эдиларки, бу давлатлар кези келиб емирилади деса, ақл бөвәр қилмас эди. Лекин бу улуғ давлатлар ва сулолаларнинг бари емирилди, битди. Ўларни бошқа бирор эмас, туркий қавмларнинг ўзлари емирилдиар. Чакмоқдек чақнаб тузишган улуғ давлатлар ўзаро қирғинлар ботқогига ботди. Тўғри, дунёга қайсанки халқ келибди, бир замонлар ўз ичидаги албатта қирғин чиққан, узоқ замонлар ўзаро низоларни бошдан кечирган. Лекин бу ички қирғинлардан кўп жалқлар ниҳоят тугал бирлашиб, яктан, яквужуд бўлиб қутулгандар. Ақл-идрок заминида бирлашиб узилмас тараққиёт йўлига кирганилар ва сўнг бу тараққиёт йўлидан ҳеч қачон тоймаганилар. Лекин туркий қавмларнинг ўзаро қирғинлари бора-бора ўнглаб бўлмас таназзулга олиб келди. Халқ учун таназзул бу — йўлини йўқотишdir.

Қуръони каримнинг «Қахф» сурасида Худо Зул-қарнайин қиссасини хабар беради. Зул-қарнайн куни чиқишига қараб юриб бир қавмнинг устидан чиқди. Оллоҳ бу қавмнинг устига қўёшдан ўзга парда қилмаган эди. («Қахф» сураси. 89 — 91 оятлар). Яна Худога аён: Назаримда қўёшдан ўзга бошпанаси йўқ бу қавмлар — менинг боболарим эди. Қуёш қавмлари, яъни туркий қавмлар эди. Туркий қавмлар Зул-қарнайн замонларидаёқ бошпанана қидирар ва ернинг ўртасини ѹказар эдилар. Лекин бу азоб-уқубатларнинг энг ёмони ўзаро қирғинлар, аҳисизлик эди.

Бу гапларни айтатётганимнинг боиси шулки, бу азобларнинг барини улуғ истеъдод эгаси Заҳириддин Бобур ҳам кўрди. Ўзаро қон тўкишлар, жудоликлар, абгорликларнинг ҳаммасини ўз бошидан кечирди. Ўзбекка жафо ҳақида сўйласанг, ёқасан. Жафо ҳақида гапирсанг, у кўзинга дарҳол ёш ғолади. Вужудида неча минг йиллик жафоларнинг садоси ўйғонади. Бобур ўз жафоларини қоғозга сўйлади. У шунчалик шижоатли, мард одам бўлишига қарамай йиғлаб-йиғлаб ёэди. Лекин кўзёшларга гарқ бўлиб ўтиришни ўзинга эп кўрмади. У буюк фаолият одами эди.

Гарб шетрияти ва адабиётини ўқисам, кўп маҳал ёлғизликка дуч келаман. Үнда одам ёлғизликка интилади, ёлғизликни хоҳлайди, ёлғизликни севади. Чамаси ёлғизлик ва ёлғизликни хоҳишлари кишининг тўдадан шахс каби айрила бошлагани белгиси. Ўзинга хос шахс дараҷасига кўтарилиш ажралишга, балки аксар 'пайтлар

одамлардан ўзини тортишга, дунёдан бегонасирашга олиб келади. Шахснинг эркинлиги сиймоларга ажралиши кучайтиради. Ҳалқ ичидан кетма-кет кўп сиймолар етишиб чиқаверади. Ёлғизлик одамга ўзини аиглаши учун керак. Қадим хитой ва япон шоирлари аксаран ёлғизлик кайфиятларини бениҳоя нозик илрок этадилар. Бизнинг қадим ўзбек шеъриятимизда ёлғизликка интилиш йўқ. Бу шеърият ҳамдам, ҳабиб, дўст топишга интиладиган шеърият.

Оёғингга тушуб барги ҳазондек муинча ёлбордим — дейди Бобур. У доим ҳамдам излайди. Ҳамдам йўлида не ажиб фидокорликлар, валломатликлар кўрсатади. У ҳамдам учун таҳти, мамлакати, ширин жонини беришга тайёр. Ўзбек азалдан ёлғизликни севмайди. Ёлғизликдан қочади. Ёлғизлик ўзбекнинг назаридаги одамсевмаслик, бадхўйлик, шумшуқлик билан тенг. Бобур ажиб бир тарэда доим мажлислар, латиф ва рангин суҳбатларни беҳад севади. Анжуманларда нечоғли хушхол ва баҳтиёр қўр ташлаб ўлтиради. Бобурнинг тинимсиз жамиятга интилиши, жамиятдан завқу сурур олиши унинг бениҳоя одамсевар бўлганлигини англатади.

Аҳбоб йиғилмоқни фароғат тутунгиз,
Жамъиятинигиз борини давлат тутунгиз...

Бобур доим мардона ва очиқ юзлик сўз юритади. Дўст бўлиб, ёр бўлиб, жафокаш ҳамдам бўлиб эр сўз айтади. Бобурнинг юрагида ҳеч сўнмаган бир дурдона, бир муқадаслик бор. Бобур қайси ҳолатда, қандай ахволда бўлмасин, ўзини мудом ва қатъий сувратда яхшиликка чорлайди. Унинг яхшилиги мардлик, адолат ва очиқ кўнгилликдир. У ўзини доим яхшиликка чоғлагани учун ҳам ҳеч бир қийинчиликлардан қўрқмайди. Улар қаршиисида чекинмайди. Умидсизликка тушмайди. Бобур ўзини беҳад қаттиқ назорат қиласи. Унинг бу улуғ ички назоратидан чидам ва матонат камолга етади.

Киши бўлдию бўлди борча тому тош қор,
Жамъияти бор кишига бордур хуш қор...

Жамъият сўзи Бобур тилида бу ерда ва умуман қанчалар терап маънога эга. Жамъият бу ерда ҳам атрофингни ўраган азиз сдамлар, ҳам фароғатли муҳит, ҳам қурб, ҳам жозибалли висол... Оламнинг гўзаллиги кишига киши жамъияти билан татииди.

Бу рубоийда инсон қайфиятларининг бу қадар рангин ўзгаришини кўринг:

Бу қишиң на ямон йўлу паришон ҳолим,
Ераб. менин яхшилиғ сарнга бошқор...

Бобурдаги муқаддас нарса: олижаноб фикр, олижаноб кечинма. Бу ўша... қуёшдан ўзга бошпанаси йўқ одамнинг сиз билан бизга мерос қолдирган ой нуридай тиник ҳаёллари.

ФАҚИРЛАРНИНГ ШОҲИ

Баъзилар Машрабни ювли ё деб биладилар. Бошқа бирорлар Бобораҳим Машраб — улуг шоир, деб айтадилар. Қимларгадир Машраб — сўфий, дунёни саргашта кезган, қўнимсиз, тинимсиз қаландар. Оддий қаландар эмас, қаландарлар шоҳи. Барча фақирларнинг шоҳи. Яъни шоҳ Машраб.

Дунёда маънавий, руҳоний бойлигидан — юрагининг камолотидан ўзга бойлиги бўлмаган, мулқларни тасар-руф этмаган ва лак-лак қўшинларни ўз оғалари, бирорларни устига бошлиб бормаган, ўзидан кучсизроқ ва занифроқ ҳалқларнинг тақдирларини ҳал қилишга, уларни тобе этишга уринмаган шоҳлар ҳам ўтганлар. Улар ишқ ва маънавий гўзаллик шоҳларидир. Машраб ана шундай асили камолотга интилган ва унга эришига олган шоҳлардан эди.

Тириклик чоғида ва ундан сўнг бир қанча замон Машраб оддий халойиқ орасида «девона Машраб» деган ном билан шуҳрат қозонган. Унга Машрабнинг ўзи асос берган. У онгли суратда девоналиқ йўлини танлаган. Бир қанча газалларда ўзини девона деб атайди. Девона эканлигини тўхтовсиз таъкидлаб боради.

Бизнинг замонамиизда шунчалар оташин, тоза нафас асарлар яратган зотни девона дессангиз, ҳақорат бўлиб эшитилади. Инсоний дардларини ва ошиқона кайфиятларини бу қадар ёниб куйлаган шоирни девона дейишга ҳеч кимнинг тили бормайди. Бизнинг девона ва девоналиқ ҳақидаги тушунчаларимиз билан ўн еттинчи асрдаги шу ҳақидаги тушунчалар ўртасида катта фарқлар бор. Машраб замонасида — ўн еттинчи асрда — моддий дунёни тан олмаган, мол-давлат йиғмаган ва ҳатто бола-чақа орттирмаган дарвешваш, қаландарваш кишиларни девона дер эдилар. Ёлгиз ҳақнинг васлига интилган ва бир худодан бошқа ҳеч нарсани тан олмаган ва бошқа ҳеч нарсага сиғинмаган одамларни девона дер эдилар. Шу маънода девоналиқ ақлдан озиш,

жинниликни билдирилас эди. Оддий одамлар назарида уларга ўхшаб фикрламайдиган, уларга ўхшаб ҳаракат қилмайдиган, уларга ўхшаб яшамайдиган одам девона саналарди.

Девоналик асли бу ўзини ва дунёни бениҳоя теран англаш ва билиш бўлса керак. Шу асосда девоналик ўзликдан ва дунё меҳридан кечиш, яъни ўзини бутунлай унуниш бўлса керак. «Соқийи азалдин майи антаҳур ичибман, Бас онинг учундир манга бу нашъи даврон» дейди Машраб. «Майи антаҳур» Худонинг муборак китобида «Инесон» сурасида эслатилган энг тоза шаробдир. Ва сақойҳум раббухум шаробан таҳуран. Яъни худо уларга, яъни умрини яхшилик билан ўтказувчилар — арбобларга, энг тоза шароб ичирди. Бу яратганинг ишқ шаробидир. Машраб ўзини шундай шароб ичганлар сағида кўради. «Нашъи даврон» деганда ундан мастиликни назарда тутади. Қуръон ўртага ҳар томонлама гўзал маънавий инсон гоясини қўяди. Машраб шу — ҳам илоҳий, ҳам тугал инсоний гояни ўзига дастур қилиб олди. Шу гоя тагига етганда унинг тенгсиз гўзаллигидан девонага айланди. Машраб яна ўша ғазалида айтади: «Ишқинг ўтида бу юрагим ўртанадир оҳ. Охир юрагим бўлғуси ишқ ўтида бийрон». Машраб шундай улуғ бир ишқ ўтида тинимсиз қовурилаётган одамдек таасурот қолдиради. Унинг тили — шу ишқнинг тили. Унинг сўзи — шу ишқнинг сўзи. Унинг девоналиги — шу ишқнинг девоналиги.

Мен Машрабни куйган ва тинимсиз куйишда давом этаетга одам эмас, балки бусбутун, яъни бошдан-оёқ мунаvvар алангага айланган ва оқ аланга тимсолида жаҳонни саргашта кезган, ҳақиқат қидирган зот деб тасаввур қиласман. Унинг ғазаллари шу оқ аланганинг бутун Мовароуннаҳр бўйлаб тўкилган ва ҳамон ёнаётган парчаларидир.

Шу маънода Машрабнинг девоналиги энг юксак маънодаги маърифат нишонаси, деб қаралмоги керак. Машрабнинг девоналигини олий маърифат деб қарасаккина, унинг асарлари ўз асрор пардасини бизга андак очади. Яъни Машрабнинг газал оламини буюк аланганинг ўртасида очилган чечаклар деб қарамоқ лозим бўлади. Бу чечаклар Намруд ўтига ташланган ҳазрат Иброҳим ёнида очилган чечакларга ўхшайди. Балки баайни ўша чечакларнинг ўзи бўлса ажабмас.

Маърифатни мен инсоннинг дардини англаш даржаси деб биламан. Одамзотнинг дардларини англайди-

Ган ва англаганларича иш кўрадиган зотларгина чин маърифат эгаси бўладилар. Бошқача маърифат йўқ ва бошқа зиё йўқ. Зиёли ҳам йўқ.

Бобораҳим Машраб одамзотнинг дардини жуда эрта аяглаб етди. Жуда эрта ёшидан атрофидан доим бегуноқ қурбонларни — ҳосили етилган далалари дайхон қилишган дехқонларни, боялари кесилган ва топталган боядорларни, дастгоҳлари бузилган ва ёндирилган уста, ҳунармандларни, чорвалари таланған ва бўғизланган чорвадорларни, халққа ҳақиқий маърифат беришдан ожиз, қотиб қолган ақидаларни тўтидек тақрорлаган, халққа чин ҳаёт мактабини яратиб беролмаган шариат пешволарини кўрди.

Машраб яна ўз умр йўлларида хонадони тўзиган, хонумони барбод бўлган, у хон зулмидан қочиб доим бу хон зулмига тутилган, қаерга борса ўша ерда қирғининг дуч келган, боши бошдоқлиқдан чиқмаган, бесаранжом, саргардолликка гирифтор халқни кўрди. Узаро ички на ташқи урушларда халқнинг асиш ўғлонлари ўз қонинг гарқ бўлиб, хонлар ўз халқлари томирига тўхтовсиз болта ураётганликларини кўрди. Хоплар ўзларини ҳақ деб билар эдилар. Шариат пешволари ўзларини ҳақ деб билар эдилар. Амирлар ўзларини ҳақ деб билар эдилар. Уларнинг бари ўз ҳақларига шафқатсиз зўравонликлар билан эришмоқчи бўлар эдилар. Тўхтовсиз зўравонликка дучор бўлган халқнинг ўнгланиши, ўзини таниши, халқ сифатида намоён этиши фоятда қийин кечади.

Ҳимоясиз, панюҳсиз ҳалқнинг ючор аҳволига чидалмай Машраб дарбадарлик йўлини тутди. Зулм остида эзилган ҳалқ аҳволига у бефарқ қараб туролмади. Ҳалқнинг дардини юрагига жо қилди. Бу дард шунчалик поёнсиз эдики, у дунёга сиғмай қолди. Адолатсиз ликлар ҳукм сурган дунёда у ўзини бегона сезди.

Машраб қаландар бўлгани билан ҳалқ аҳволидан ўзини олиб қочгани йўқ. У эзилганларга раҳнамо бўлишга, зулм остида эзилганларнинг ҳолини енгиллаштиришга уринди. Ҳалқни хонлар ва ҳокимларнинг жабрситамларидан ҳимоя қилди. Машрабда ҳур, эркин фикр, тўғрироғи, шундай фикрлаш қачон пайдо бўлганлигини айтниш қийин. Унда шоирлик туғма бўлганидек, ҳур фикр ҳам туғма эди. Одам боласининг тадрижий шакллакиши қонуниятларига риоя қилиб айтадиган бўлсак, эркин фикр унда жуда эрта уйғонди. Унинг қонида, зумрасида, вужуднинг мағзида асл ғалаён ҳоким эди.

Машраб чамаси ҳеч ерда шу маъшода исён ёки ғаләён сўзини қўлламайди. У ҳур фикр, эркин фикр деганда «куфр ўти», ҳур фикрли одамлар деганда «куфр эли» деган тушунчаларни ишлатади. «Куфр» деганда исёнкорликни ва барча зулмешалик ва мутлақо бефойда зуҳд-тақвога қарши исёнкорликни назарда тутади. «Этагимни елпишидан юз худо пайдо бўлур. Бу дилими кавламанг, оташкадо пайдо бўлур», дейди Машраб. Бу фикрининг ёрқинлиги, кутилмаганлиги, жасорати бизни ҳайратга солади. Киши жуда юксак маърифат эгаси бўлмаса, у бундай фикрни ғайта олмайди. Айтотмайдигина эмас, шунчалар мураккаб фикрни бунчалар равшан ва тиниқ ифодалай олмайди. Бу сатрларни тузукроқ тушунтириш учун ҳам камида бир китоб ёзиш керак. Ва шу билан бирга Машрабдек дард ва дарбадарлик йўлини босиб ўтиш керак.

Қўз ўнгимда чаңг, ғубор йўлларда шиддат билан этагини силкиб кетиб бораётган, балаанд бошига қулоҳ қўндирган зот намоён бўлади. Унинг мияси бир зум фикрсиз турмайди. Оёғининг остида чигирткалар ва беданаалар дамбадам патирлаб кўтарилади. Олами бедана ва чигиртка садоси босиб ётади. Қаландар этаги ортидан енгил ғубор эргашади. Қаландар ҳар зарра худонинг зуҳуроти эканлигини билади. Инчунин лаблари пицирлаб, қовжираган дудоқдан шу сўзлар отилиб чиқади: — Зарра худодир, зарра — худодир. Эҳтимол у замонда Машрабни осиш учун шу биргина исёнкор сатрнинг ўзи етарли эди. Лекин Машраб буни айтмай ҳам туролмасди. Айтмаса, Машраб бўлмасди. Мансури Ҳаллож ва Мажнун этагида юрган ориф қаландар бўлмасди. Машрабни яхлит бир аланга дегани эдик. Бу мисрадан Машрабнинг дили доим яллиғланиб турган чўғдек бўлганлиги англашилади. Чўғни кавлассангиз, у оташ-парастларнииг ўтхонасига айланади. Оташкадада эса ўт ҳеч қачон сўнгани эмас. Зуҳд эли бу ўтга дош беролмайди. Шоирнинг эркин фикри үлар ўртасида ғалаён кўтаради. Тақводорлар ғулғулага тушиб, наъра йортадилар. Дод-фарёд кўтарадилар. Шоир бу ғавғоларга тинч қараб туролмайди.

Дил туташди куфр ўтиға
шайх ғавғосин кўруб,
Ул ситамгар ришваҳўрлар
зуҳду тақвосин кўруб...
Фақр элидан музд олур

муфти таманносин кўруб,
Шармсор зуҳход элинни
халқни яғмосин кўруб.
Бу тилимдин найлайин, аччиқ
садо пайдо бўлур.

Машраб бу ерда ўзида исёнкорлик нимадан ва қандай пайдо бўлганлигини аён айтиб ўтади. Ҳар қандай ҳурлик ва ҳур фикрлиликни бўғишга ва маҳв этишга доим тайёр турган шайхларнинг бу каби ғавғоларига Mashrab қаерларда ва қачон дуч келмади дейсиз. Бу ғавғолар уни тўхтовсиз таъқиб этди. Лекин шоир бу таъқиблардан синмади. Ақидапарастликка бўйсунмади. Балки унинг дарди янада теранлашди. Исён ўти тобора баландлади. Mashrab огоҳ зот эди. Огоҳ зотлар эса зулм ва зулмларга индамайгина қараб туролмайдилар. Узларини ёлғиз Худогагина таслим қилган одамлар ҳеч қандай золимнинг олдида эгилмайдилар.

Машраб халқ ичида бузғунчилик билан шуғулланганларни очиқ-ошкор кўрсатади. Ва уларга қарши кескин аччиқ сўз айтишда чўчиб ўтирумайди. Mashrabning табнатидаги бир улуг хусусиятини ҳам айтиб ўтишимиз керак. У турли-туман соҳтагарчиликлар, ҳайлуҳашамлар, таманнолар, ясама улуғворликларга беҳад қарши эди. Таманноҳашам, дабдаба, мунофиқона иззат ҳурмат, риёкорлик билан сира чиқиша олмасди. Қайда бўлмасин, қандай шароитда бўлмасин, кимда бўлмасин мунофиқликка дуч келса, ўша ерда, ўша онда унга қарши шафқатсиз бош кўтарарди. Бундай ҳолларда Mashrab аёвсиз кимсага айланади.

Машрабнинг куфр-исёни аввало ҳамоқатга, ғафлатда ётишга қарши қаратилган эди.

Шу баробарида Mashrab чин ошиқликни ҳар доим қутлар эди. Юрагини туганмас дард босган бу зот аслида жуда шўх ва қувноқ одам эди. Улкан истеъоддларга хос бўлган бу қувноқлик унинг ғазал оламига ўзгача нафас, бир шуъла сошиб туради. Унинг ошиқона ғазаллари ғоятда ўйноқи ва шу билан бирга ўта дардлидир.

Машраб ўз ғазалларида ошиқлик, ишқ-муҳаббат, дард, ёрнинг туганмас озорлари ҳақида зўр муболага қилиб лоф ураётгандек туюлади. Аслида булар на лоф, на муболага. Mashrab шундай яшар эди. Шундай ўйлар эди. Буларнинг бари унинг тафаккури, ҳиссиётлар оламининг бор ҳақиқати.

Машраб одам боласига туганмас марҳамат назари билан қарайди. Үннинг табиати ўзи асил марҳаматдан бино бўлган. Машраб ўз номининг маъносини тушунти-раркан, мен ҳар қозонда қайнайман ва менга чин дилдан рафиқ бўлувчиларга рафоқатлик қиласамац, дейди. Машраб дегани шу бўлади. Ҳақиқатан Машраб одамларга, ҳалққа шунчалик яқин, ҳамдам, дўстdir.

ТИЛИНИ ТИЛГАН ОЛЛОЁР

Ҳазрат Эшон Сўфи Оллоёрнинг «Ожизларнинг саботи» деб аталган манзума китобини Яратганин ва уннинг чексиз маърифатини англаш китоби деб аташ ҳам мумкин. У шоирнинг Аллоҳни яна бир карра кашф этиш йўлидаги уринишидир. Илгари ҳар бир ўзбек хонадонида мойчироқнинг сариқ олтиндай парпираған шуълаларнида қироат билан чўзиб ўқилар, ҳикоятлари қайтадан ҳикоя қилинар, ёқа-енглар кўз-ёшлардан жиққа ҳўйл бўлиб кетар эди.

Сўнг бу китоблар сарқитга чиқди. Лампамой чироқнинг сариқ ёғдулари йўқолгани каби бу китоблар ҳам ўша шуълалар билан бирга йўқолди. Уларни баланд супаларда ўтириб катта давра олиб ўқимай қўйдилар. Ўқиш ҳаёт учун хавфли бўлиб қолди.

Агар боло чиқиб кетсанг, ўзингдан,
Ииқилгайсан тойиб ерга юзингдан —

деган эканлар бир ўринда мавъиза қила туриб эшон сўфи Оллоёр. Гап ўзини унтутиш, қаерда келгани ва қаерга боражагини билмаслик, яъни кибр, такаббурлик ҳақида бораётир. Дунё ва коинот маърифатини англаш ва шу маърифат ичидан ўзини топиш, шу маърифатга лойиқ бўлиш ўринини мағрурлик эгаллаганда, одам ўз оёғи остидаги заминдан узилиб қолар, заминни ҳис қилмай қўяр, натижада ҳар қадамда тойилиб юз тубан йиқилиб яшашга гирифтор бўлар экан.

Эшон Сўфи Оллоёр ҳазратларининг «Ожизларнинг саботи» манзумаси бош гояси шундай кибрга қарши қаратилгандир.

«Ожизлар саботи»нинг фикри янгилик эмас. Бу мавзуда сонсиз-саноқсиз асаллар битилган. Уларнинг бадиий-фикрий даражалари ҳам ҳар хил бўлган.

Лекин «Ожизлар саботи» улуғ бир оригиналликка

даъво қилмаса-да, у моҳиятига кўра эслатиш китобидир. У одам боласига заминда яшаётганлигини эслатади.

Яратганинг маърифатини билиш инсоний камолот йўлидаги илк зарур қадамдир. Эшон Сўфи Оллоёр сабр-қаноатга, тоат-ибодатга, шукур қилиб кун кечиришга даъват қиласкан, асло қулликда қўл қовуштириб ўтиришни ёқламайди.

У инсон учун яхши амалларнинг ва илм олишнинг аҳамиятини ҳар ўринда таъкидлаб боради. Маълумки, яхши амаллар Қуръони Каримда ҳам инсоннинг бу дунё ҳаёти билан боғлиқ бош ғоялардан биридир. Худо яхши амалларни, яхши амал қилгувчиларни севади.

Худони сунъидин кўрдинг карашма,
Бир эски ердин оқти янги чашма —

дейди «Саботул ожизин».

Назаримда бу манзумадаги ҳар бир байт, ҳар сатр ана шундай эски ердан оқсан янги чашмадир. Бу чашманинг суви ғоят тоза ва таронатли туюлади.

Маърифат, иймон, муҳаббат ҳалоллик, садоқат, аҳда сабитлик ҳар бир инсоннинг кўркидир. Эшон Сўфи Оллоёр ана шу маънавий гўзалликларни халқа тарғиб қиласди.

Тўлин ойнинг сутдек шуъласида бир бева хотин чарх ўгириб ўтиради. Ой тезда ботади. Шунда халифа ва унинг одамлари ёруғ машъала кўтариб ўтиб борадилар. Хотин халифа машъаласининг ёруғида тезгина бир-икки чарх ўгириб қолади. Хотин негадир бу ҳақда узоқ ўйга ботади. Бироннинг чироги шуъласида йигирган ришта менга ҳалол бўладими-йўқми, деб изтиробга тушибди. Бу масъалани ўзи ечолмай, буюк имомлардан бири Аҳмад Ҳанбалдан сўрайди. Бироннинг машъаласи ёруғида ундан изн сўрамай ўгирилган ип ҳалолми, ҳаромми? Аҳмад Ҳанбал бу жуда оддий, лекин таги ғоятда теран савол қаршисида лол қолади.

Ҳалоллик борасида ҳар биримиз шундай қайғурсак, биз ҳаммамиз аллақачонлар бутунлай бошқача одамлар бўлган ва шу билан бирга бутунлай бошқача равишда яшаган бўлар эдик. Кишини чуқур ўйлатадиган бундай ҳикоятлар манзумада оз эмас.

Сўфи Оллоёрнинг китобида доимо шоирона ажиб кашфиётлар сочилиб ётади. Улар тилнинг үчига соғасал томчиси каби ўрнашиб қолади. Сўфи Оллоёр ўх-

шаш шаклли сўзларнинг ажиб жаранглари ва маъно ранг-барангликларидан айниқса, ғоят маҳорат билан фойдаланади. Шоир тилининг фасоҳати ва мазмундорлигини кўрсатиш учун бир неча мисоллар келтириб ўтамиз:

Үёлма маърифатни ўрганурдин
Танур жойинг бўлур қолсанг танурдин.

Жонли сўзлашувда тандирни танур дейдилар. Шоир танур сўзини икки марта бир шаклда ишлатади. Лекин уларнинг бири тандир маъносида, иккинчиси «танимоқ», яъни билмоқ маъносида қўлланилади. Тандур сўзини эса мажозан дўзах маъносида ишлатади. Яъни маърифатни урганишдан уялган кимсанинг жойи дўзахдир.

Ҳаво мисдек қизир, ер ҳам темирдек,
Ғазаб қилган киши бўлғай қўмирдек...

Жаҳолат ва ғазаб шундай баттарин нарса. Ғазабнинг ранги қора. Бировга ғазаб қилган кимса эса ҳақиқатан ҳам қўмирдек қорайиб кетади. Сўфи Оллоёр оддий сўзлардан одамни титратиб юборадиган манзаралар яратади. Сўзларнинг кутилмаган маъно қирраларини наомён қилади:

Тилим уэр айғоли, эй кошифи роз,
Тилимни минг тилим қилсам, эрур оз...

Бу инсон доим уэр мақомида қойим турсин деганидир. Ёки:

Отанг эрдур, санам эрдек қилиқ қил.
Ямонлиғ айлаганга яхшилик қил...

Сўфи Оллоёр ўз ҳикматли сўзларини дилларга ана шундай нақшлайди. Бундай лазиз мевалар Оллоёр бобомизнинг абадий қуримас боғида олтиндай товланиб ётибди. Уларнинг тирик зиёси кўзингизни қамаштиради. Лекин шу зиё юрагингиз қаватларини ёритиб, кўнглинигиз муҳаббат билан тўлади. Ва бу китобни чиқарган «Чўлпон» нашриётидан ҳам, уни тайёрлаган Рашид Зоҳид ва қимматли маслаҳатларини аямаган Нўъмон Тошкандий ва Найм Норқулодан ҳам беҳад миннатдор бўласиз.

Кел эй толиб, кўзунг ибрат била оч,
Муҳаббатсиз кишидан қуш бўлиб қоч,
дейди Сўфи Оллоёр.

У асрлар қаъридан туриб, ўз наслларининг кўзини очиш, уларни муҳаббатли қилиш устида тинимсиз қай-уради. Мени тўғри тушун, болам, дегандай бўлади...

НЕГА ШОИРЛАР ДЕВОНА БУЛАДИЛАР?

Чўлпон сўзи билан иши доимо бир бўлган одамлар тоифасига киради. У бир йилнинг ўзида бир миллат томонидан қилинган икки инқилоб ваъда этган озодлик гоясига чин дилдан ишонган ва унга беҳад умид боғлаган соф кўнгилли миллий зиёлилардан эди.

Қанчалар орзу қилган эди ва қанчалар кутган эди бу халқларга ижтимоий озодликни!

Бугун Чўлпоннинг барча асарларини диққатимизни қўйиб хотиржам ўқишга мусассар бўлиб шундай хулосага келамизки, ҳеч ким озодликни Чўлпончалик севмаганди. Ҳеч ким озодликни Чўлпончалик ўйламаганди. Ҳеч ким озодликни Чўлпончалик дилга тутмаганди. Қон томирлари, ҳар бир ақл ва зариф ҳужайраларига сингдирмагандир. У юртнинг талон бўлган вайронагарчиликларга кўмилган, халқи гирён ва тўзғиган, тараққиёт қопқоқлари узоқ замонларга ёпилган, тупроққа қоришган тарихини жуда теран биларди.

Чўлпон ўз халқининг тикланиши, қад ростлаши, маънавий ўсишини фақат ва фақат озодлик билан боғларди. Халқнинг келажагини озодликсиз тасаввур қилмасди.

Забунликдан, хорликдан, қарамликдан, турли йўсиндаги камситишлилардан халқни фақат озодлик қутқаради деб қаттиқ ишонарди.

Унинг хаёлини шунинг учун озодлик фикри жуда эрта банд этди.

Озодлик унинг хаёли-оромини ўғирлади. У бутун ҳаётини озодликка бағишлади. Озодлик орзуси Чўлпонни шоир қилди.

Чўлпоннинг озодлик орзусидан ҳоли, озодлик фикридан ҳоли бир қатор сўзи йўқ. Бир дона шеъри йўқ.

Унинг муҳаббат ҳақидаги энг интим, энг туйғули шеърларида ҳам озодлик, озод инсон ҳақидаги фикр марказда туради.

Чўлпонни неча замон расмий мафкура миллатчилик ва миллатпарастликда айблаб келди. Лекин шоирнинг миллатчилиги унинг озодликни соғинишидир.

Мен озодликини севганлар халққа ва ўз юртига душман бўлганликларини кўрган эмасман.

Мен озодликни севган одамлар ғаламис, қаллоб, худбин бўлганликларини кўрган эмасман.

Мен озодликни севган одамлар ўз йўлларидан чекинганликлари, тонганликлари, ҳиёнат йўлига кирганликларини кўрган эмасман. Озодликни севган одамлар юртини сотганилар, элни талаганиларга ёрдам берганликлари ва мададкор бўлганликларини кўргаи эмасман. Озодликни севган одамлар ҳар ерда ҳалқ орасида энг олижаноб, энг вижданли, энг маданий, энг ишонпарвар одам бўлганликларини биламан.

Улар учун озодлик ширин жондан ҳам ширинроқ. Озодлик деган гулгун ёшлар ўзларини танклар тагига ташлаб, Ватанларини топталишидан асрәётганликларини кўриб, гувоҳи бўлиб турибмиз.

Озодлик истагини аллакимлар фанатизм деб тушуниришни истайдилар. Лекин озодлик истаги энг олий истак. Шу маънода Чўлпон озодликни орифи, ошиқи, одили эди.

Уни йигирманчи йилдан сўнг ёзган шеърларида умид ва умидсизлик фожиали суратда фарёд чекиб ётади. Инқилоблар ваъда қилган озодликдан уч йил, тўрт йил, беш йил, ўн йил ўтиб ҳам мутлақо дарак йўқ эди. Озодлик ғояси ҳалқларнинг қон селига ғарқ қилинганди. Чўлпон кишинларнинг эскилари ҳам, янгилари ҳам нечогли мустаҳкамлигини кўрди. Ҳеч қачон озодлик фикри бунчалар аянчли ва фожиали аҳволга тушмаган эди.

Чўлпон севгани озодликнинг бу қадар топталганини кўриб телба бўлар ҳолга етди. У эркинликнинг заволини кўриб ҳам, эркинлик умили билан яшади. Бу даврдаги кўпгина шеърларида Чўлпон ўзини галдир, девона, қаландар, телба, жинланяётган шоир каби танишитиради. Ошиқликда ўта аҳволга етганлар албатта девонадирлар. Лекин бу девоналар одамзоднинг энг яхшиларидир.

Мен дутор билан туғишган кўхна бир
девонаман,

Ул туғишғоним билан бир ўтда доим
ёнаман, —

днейди машҳур қўйма шеърида Чўлпон. Бу машрабона байт одамнинг тилида бол каби эрийди. Чўлпон дуторни эмас, ўзини девона дейди. Лекин девона билан туғишган девона бўлмаганлигини ким кўрган? Булар бир ўтда — озодлик ишқи ўтида ёнадиган икки телбадир.

Икки шоирдир. Фақат бирининг оти — дутор, иккинчнинг оти — Чўлпон.

Дилларида гам тўла бечораларга ёрман,
Вақти хуш, ғам кўрганлардан
тамом безорман.

Озодлик ўтида куйган одамнинг ўзи каби бечораларга ёр бўймаслиги мумкинми? Асил мақсадларига етмаган одамларга вақти хушлик, ўйин-кулгилар масхаравозлик бўлиб туюлади. Шоир — ошиқ адолатсиз дунёдан қочиб дуторнинг пардаларига яшириmmoқни истайди. Пардалар куй чалгандা, парда остидан тўхтовсиз нолалар эшитилади.

Ҳа, ўз пайтида ҳеч ким халқ озодлиги учун Чўлпончалик қайғурмаган, ҳеч ким унчалик оламни озодлик нолаларига тўлдирмаган. Насллар Чўлпон олдида қарздордирлар.

Озодлик — Чўлпоннинг илҳоми, муҳаббати. У илҳом ҳақида сўйласа, озодлик ҳақида сўйлаган, муҳаббати устида сўз юритса, озодликни ўйлаган бўлади. Чўлпоннинг Малак деб аталмиш ажаб бир шоирона сиймоси бор. Унинг шеърларида ушбу Малак ғоятда сирли ва ғоятда суурорли, дилни, кўзни ошуфта этгувчи либослар кияди. Бу каби Малак Пушкинда бормиди, Лермонтовда бормиди, Байронда бормиди, Гейнеда бормиди, Саъдийда, ҳазрат Навоийда бормиди, билмадим. Лекин шуни биламанки, чин шеърият истиқомат қиласан ва истиқомат қилаётган жойда, чин шеър туғиладиган ва туғилган ерда Малак, албатта, бўлади. Қанотлари билан доим шоир қошлиарини сийпаб турди. Шоир дилга илоҳий сўзларни шивирлаб турди. Шоир қулогига Иброҳим алайҳиссалом, Мусо алайҳиссалом, Довуд алайҳиссалом, Иссо алайҳиссалом, Мұхаммад алайҳиссалом ва улардан ҳам кўз етмас олислардан руҳни сарафroz этгувчи қўнғироқ сасларини олиб келади.

Ана шу Малак Чўлпон шеърнининг мададкори, уни асрорчи, етакловчи, сарбаланд руҳий маконларга олиб чиққувчидир. Ҳа, бу Малак шивирлай бошлаганда, Чўлпон шеърлари сеҳрланади. Сўзлар фусункор бир мусиқа билан қовушади.

Кўнгилдаги муҳаббатнинг учқунин
Хаёлимнинг бир бурчидан беркитдим, —
деб бошлайди «Хаёлий» шеърини Чўлпон. Мен бу сўз-

ларнинг сирли оғушини очмаслик керакмикин, деб иштибоқ қиласман. Шеърни таҳлил қилиш жуда ҳам гўзл қизнинг кишригини санаш билан баравар. Киприк санашга берилиб кетиб, гўзалликнинг асл моҳиятидан бехабар қолиб кетасиз. Шоир бу нозик сатрларда «кўнгил» билан «хаёл»ни фарқлайди. Биз ўйлаймизки, кўнгилда бор нарса хаёлда ҳам ўэ-ўзидан бўлади-ку! Лекин муҳаббат хаёлда эмас, кўнгилда ошён қуради Кўнгил — мулк. Мулкнинг эгаси эса муҳаббат. Аммо хаёл кўнгил устида туради. Хаёл жаҳонни бир сонияда қамраб олишга қодир. Шу хаёл ичига интиҳоси йўқ орзулар ҳам киради. Кўнгил — қуий мулк. Хаёл юксайдаги мулк. Шоир муҳаббати учқунларини қуий мулкдан олий мулкка — ҳаракатлар амалга кирадиган мулкка олиб чиқади. Муҳаббатнинг бир учқуни билан хаёл дунёсининг чексизликларини ёритиш, мунааввар қилиш ва агар имкон яралса, унинг ҳаракатсиз, беҳосил пучмоқларини портлатишни истайди.

Шоир айтаётган бу муҳаббат озодликдир. Озодлик учқунлари асли зулматларни ёритадиган машъаллар ёқомги жонз. Лекин йигирманчи йиллар бошланганда машъаллар ёқилмади. Зулматлар ёrimади. Озодлик учқунлари йўлига зўравонлик тўғонлари қўйилди. Хаётда аланга олмаган учқунлар шоир сийнасини тўхтосиз куйдиришдан ўзга нарсага ярамади. Шоирнинг хаёли ва кечинмалари жуда фожиали тус олади:

Қулогимга, ол баҳт, деб эшитилган
Азонларни шайтоний деб ўйладим.
Шунинг учун баҳт берган малакка
Турли-туман афсоналар сўйладим...

Чўлпон озодлик саробга дўнгани, у алдов ва макр тўзонлари ичра кўмилиб кетгани, шайтоннинг аzonи каби ишониб бўлмас, бир нарсага айланганини шундай тасаввур қиласди. Малак эса унинг кўз ўнгидаги оқиб бораётган чексиз қонли дарё манзарасини гавдалантиради. Шайтон эса баҳтинг, тахтинг шу қонли зардоб дарёда деб шоирни насвасага солади. Шоир уни жонҳолатда қувади. «Кет, эй шайтон... Кет-кет. Қилич синган, қалқон тешилган. Кўрасанми? Мен эзилган ётаман. Устимга-да бало тоғи ёғилган...» Шундай ҳолда Чўлпон яна, барибир, ёлғиз Малакдан — яъни озодликдан мадад ўтинади. У эса рўйхуш бермай девона қиласди шоирни...

РАҶНО ВА ХАЙЁМ

Ҳа, Абдулла Қодирий романларидан мен маърифат излайман. Чунки маърифат ва маданият орқасидангина биз барча эзгу тилакларимизга өришамиз.

Йигирманчи асрнинг илк йилларида бизда, яъни Марказий Осиёда роман ҳақида бокира тасаввурлар пайдо бўлди. Ҳамза, Фитрат, Чўлпон, Қодирий сингари халқ маърифатпарварлари юрагида роман яратиш орзуси туғилди. Фитрат ва Ҳамзанинг аср бошларидағи насрин уриннишларида (Фитратнинг ўнинчи йиллардаги барча насрин асарларида романга интилиш борлигини сезиш қийин эмас) халқ ижтимоний-маданий, майший ҳаётига бадиий ойна бўлоладиган асар яратиш иштиёқи кучли кечганлигини англаш мумкин.

Мана шу орзулар йигирманчи йилларнинг бошларида келиб «Ўтган кунлар»ни юзага чиқарди. Ёзувчи зиёлиларнинг роман ҳақидаги орзулари «Ўтган кунлар»да мужассамлашди. Бу Марказий Осиё маданий ҳаётида улуг воқеа эди. Бадиий тафаккурнинг роман қадар ўсиб чиқишида жуда катта тарихий маъно бор эди. Европа, Шарқ, Россия романлари муҳташам қасрлари қошидаги қўрқув, ҳадиксираш, чоғиззлик, ожиззлик енгиб ўтилган эди.

Мазмунни тўлиқ, бадиияти етук роман халқ учун мактаб, яъни маънавият ва фикрлаш мактаби.

Ўзбек халқи «Ўтган кунлар»ни худди шундай қабул қилди. Тўнғич фарзанд жуда севимли бўлиб туғилди. Ҳозир «Ўтган кунлар» деса, ийиб кетмайдиган ўзбек йўқ. Роман миллий бадиий тафаккурнинг барча қирраларига ўз таъсирини ўтказгани бежиз эмас. «Ўтган кунлар» қоғозга тушаётган маҳаллардаёқ Қодирий мозий бир романга сиғаслиги, у юзлаб жуда ўткир йирик асарларга мавзу беражагини теран англаб етган эди. Ажаб эмаски, «Ўтган кунлар» ёзилаётган чогдаёқ бошқа бир роман фикри ёзувчини бозовта қила бошлаганди.

Кўп ўтмай бу бозовталик «Меҳробдан чаён» либосларини кийди. Йигирма саккизинчи йилнинг бошларида ёзувчи бу романга охирги нуқтани қўйди. Бу икки романни мен ўзбек адабиёти тарихидаги бокира романлар деб атагим келади. Чунки уларга ҳали шу йилларда жаҳон адабиётида кучли мавқега эга бўлиб қолган экспрессионизм ёки модернизмнинг минг исни қориштириб бир ис яратган шабадалари ўз таъсирини кўр-

сатиб улгурмаган эди. Ҳолбуки, бул романлардан салгина кейинроқ яратилган «Обид кетмөн» ва «Кеча ва кундуз»да ички монолог, ички психологик таҳлил, шахснинг ички иккиланиши, сюжетнинг «исталган» ерда бошланиши ва «исталган» ерда тугаши, янги воқеа чизиғининг бошланиши каби экспрессион ҳолатларнинг бошланғич зуҳуротларини кузатамиз. Бокира романлар деб атасимга Қодирйининг ўзининг бир ажойиб шаходати сабаб бўлди. Ў «Мехробдан чаён»га ёзган дебочасида роман ва унинг қаҳрамонларини яратишда ўзи танлаган принцип устида тўхталади. Бу гашни у киши билмасдай айтиб ўтиди. Лекин эътибор бериб тўхталган одам учун унда жуда чуқур фикр очилади. Бу фикр ўлкада янги роман йўналишини, унинг методологик сарҳадларини белгилайди. Албатта, бадиий адабиёт ҳар қандай сарҳадлардан баландроқ туради. Уни маълум сарҳадлар ичида чеклаб қўйинш изоқ ўтмай таназзулга олиб боради. Лекин бадиий адабиёт бир сарҳадни босиб янги бошқача бир сарҳадга кўтарилади. Шунинг учун бу ерда «sarҳad» деган сўзни ишлатдим. Қодирй дебочада ёзади: «Албатта, мен бу сўнгги марғуб қаҳрамонларни (яъни меҳнаткаш камбағалларни) на-зарда тутади — И. F.) ўзбек тарихининг ҳазми кўтарган қадар ўз ҳолиша олишга тиришдим». Кўчирманинг давоми бор. Лекин шу ерда андак тўхтаб ўтайлик. Бу аввало «ўзбек тарихининг ҳазми кўтарган қадар» деган жумла. Чамаси, бу тарихий ҳаққоният масаласи. Кейинчалик биз ўзбек тарихидан олиб ёзилган бир қатор турли жанрларга мансуб асарларда қаҳрамонлар ўзбек тарихининг ҳажми кўтарган қадар олинмаганилиги — улар ё ҳаддан ташқари бўяб ва ёки ҳаддан ташқари янги замон фикрига мослаштириб тасвиirlanganligidan юзаки таъсирчи ёхуд тўғрироғи, сохта таъсирчан бўлиб қолганлигини биламиз. Бу тарихининг ҳазми кўтармаган нарсаларни унинг бўғзига тиқишириш, тарихни, бошқача айтганда, «зўрлаш» оқибатида юзага чиқди. Ҳазми кўтармаган таом еса киши касал бўлади. То ҳазми оғир озуқдан қутулмагунча ўзини қўярга жой тополмайди. Назаримда адабиётимиз кўп замонлар ана шундай ҳазмига тўғри келмайдиган таом еб юрди. Эндиликда эркин шароитда ижод қилиш учун у ўзини тозалаши керак. Қодирйининг эътиборни ўзига қаттиқ жалб этадиган иккинчи жумласи: «Ўз ҳолиша олишга тиришдим»дир. Бу Толстойнинг ҳаётни биз истаганча эмас, борича тасвиirlash

керак, деган машхур фикрига тўғри келади. «Ўз ҳоли-ча олиш» — реалистик ҳаққоний тасвирининг опасидир. Афсуски, адабиёт кўп даврлар ҳаёт ва инсон манзараларини ўз ҳолича олиб тасвирлашдан йироқ-лашди. Идеаллаштириш, йўқ нарсаларин бўрттириш, борича эмас, идеалга тўғри келадиганча ёзиш, ўзбекона содда қилиб айтганда, аравани қуруқ олиб қочиш адабиётга бўлган ишончни сўндириди. Қодирий кейинги жумлада «ўз ҳолича олиш»нинг афзаллигини яна шундай тушуниради: «Чунки шундан ортиғи соҳта бўлиши устига, китобнинг қадрини ҳам туширас эди». Қодирий йигирманчи йиллардаёқ адабиётнинг қадр-сизланиш эҳтимоли борлигини сезган эди.

«Ҳазми кўтариш» ва ҳазми кўтармаслик қандай бўлишини романдан кўрайлик. Анвар мирзо оғир шароитда сифинди бўлиб ўсган йигит. Уни сармуншийликка кўтармоқчилар. Лекин Анвар мирзо буни истамайди. Анварнинг хон саройидаги катта лавозимдан ўзини олиб қочиши ғалати бўлиб туюлади. Шу ўринда Қодирий ўз даврининг илғор кишиси бўлган, илм ва фаросат эгаси Анварнинг ички изтиробларини, аламли ўйларини, сарой ҳаёти ва умуман, ўша давр ўзбек турмуши ҳақидаги тасаввурларини кенг йўсина-да тасвирлаши мумкин эди. Шундай тасвирларга романда ҳаддан ташқари кўп ўрин бор. Бироқ Анвар ҳар қанча илғор ёшлардан бўлмасин, ўша даврда «изтироб оқими» ичида яшашга қобилмиди? Мураккаб ички изтироб оқими — Европа адабиётининг энг зўр кашфиётлари ва қадриятларидан. Бу қадрият оз де-ганде Оксфорд ёки Петербург университетлари таълими, жаҳон фалсафий тафаккуридан теран хабардорликни тақозо қиласди. Анвар эса ўз билимлари — араб, форс, турк тилларини билиш, ҳисоб ва иншо қоидаларини яхши ўзлаштириш натижасида ўрдада Муҳаммад Ражаб пойгачи қўл остида тажрибалик мирзолар қаторидан жой олди. Шундай экан, мураккаб ички изтироблар оқимини на Анварнинг тарбиясин ва на у тарбия топган шароит кўтарар эди.

Еки бошқа бир ҳолни олайлик Раъононинг юлдузи Анварнинг юлдузига ғоятда мос. Улар ўртасидаги ана шу уйғунликни Қодирий зўр шоирона мақомда гавда-лантиради. Бу ўзи жуда нозик симфония. Бундай но-зик уйғунликка Тагор ғоят моҳир. Раъно ибтидоий мактаб маърифатини олган. Қодирий унинг ўқиган китобларини батафсил айтиб ўтади: «Ҳафтняк»,

«Қуръон», «Чаҳор китоб», «Сўфи Оллоёр», «Маслаки муттақин», Навоийнинг барча асарлари, Фузулий девони, Амирий, Фазлий, Шерозий, Бедил, Саъдий...

Раъно ўзи севган шоирларнинг шеърларидан мажмуалар тузади. Манзумалар ёзади. Лекин шуларгина эмас. Қодирий бизни романнинг икки ерида Раъно... Умар Хайём китобини ўқиб тургани устидан чиқарди. Нега бирдан Хайём? Менинг, мисол учун, ожиз ақлимча, Хайёмни Анвар мирзо ўқиса, кўпроқ тўғри келарди. Лекин Қодирий Хайёмни Раънога ўқитади. Нега? Ростдан нега? Эҳтимол Раънода шоирона завқ Анвардан кўра кучлироқdir. У бекорга мушоираларда доим Анвардан устун келмайди. Лекин, қани Хайём эсланган саҳифаларга қарайлик-чи, қандай сирлар бор экан:

«Раъно айвоннинг устунига суюниб китоб ўқир, Ниғор ойим ўчоқ бошида овқат пишириш билан машғул эди. Раъно ўзига қараб келувчи Анварга ер остидан кулимсиб олгач, бир оз кўриниб турган оёқ учларини сариқ атлас кўйлаги билан яширди, атлас кўйлакни яхшигина туртиб турган сирли кўкраги устига ён ўрим соchlарини олиб ташлади. Анвар яқинлашгач, секингина китобдан кўзини олиб, «ҳорманг» деди, яна китобга юз ўғирди. Анвар келди ва унинг қўлидаги китобга қаради.

— Умар Хайём! — деди ва Раънонинг қаршиисига, ҳовлига оёқ солинтириб ўтирди. — Қани, ўқи-чи, эшитайлик!

Раъно китобни секингина ёпиб, Анварга узатди:

- Сиз ўқинг, мен эшиштай.
- Узинг ўқи, баҳилсан-да!
- Мен тўғри ўқий олмасам, тунов кундагидек куласиз...

— Жўрттага хато ўқиб, ўзинг кулдирдинг... Ўқи, Раъно!

Раъно китобни ерга қўйди:

— Мен ўқиб зерикдим...

Бунда хайёмча шўхлик барқ уриб турибди. Шўхлик Раънонинг рангига ранг, жозибасига жозиба қўшяпти. Хайём Раънонинг зуваласидаги завққа латофатли руҳ бағишлайяпти. Лекин Раъно шу тобда, Анвар кириб келган маҳалда, оқшомнинг шан нурлари оқариб ёйилганда Хайёмнинг қайси рубоийсини ўқиётган, ёдлаётган эди? Қайси? Нега ёзувчи буни айтмайди? Мен ожиз ақлим билан буни дарҳол шошиб-

пишиб айтиб ўқувчини тинчлантырган ва бундай са-
вollarга ўрин қолдирмаган бўлардим.

Кўза-ю косангни кўтар, эй дилдор,
Кўклам сув бўйи, салқин жойга бор,
Бу чарх кўп сарвқад, ой юзлиларни
Гоҳ кўза, гоҳ коса қилмиш неча бор...

Шу сатрларни ўқиб терга тушмадимикин Раъно —
шонира? Ахир бундан кейинги тасвиirlар қанчалар
хайёмана: кўкда ўн уч куплик гўзал ой сузади. Майин
шамол гулларни аллалайди. Раъно ўғринча Анвар-
нинг ёзувига боқади... коинотда, ўзбекнинг осуда
масканларида шеър руҳи кезинади. Раъно шунда
шеър баҳсида ҳам, тиб баҳсида ҳам мирзони енгади...
бу парчани Хайёмсиз тасаввур қилиш мумкини?
Барча шонронга оқим ундан бошланди. «Оёқ учларини
сариқ атлас кўйлаги билан яшириш» ҳам тўла хайё-
мана. Кўкрак устига ташланган ўрим соchlарда ҳам
Хайём сезими. Хайёмга биз «Фотиҳа — муҳри худо-
дир» бобида яна бир карра дуч келамиз. Лекин бунда
энди вазият мутлақо ўзгарган. Ўрдадан Раънога сов-
чи келган. Маҳдум учун бу «хайрли фол, файзи ило-
хий...» Раъно учун эса... «Ўзича саодат бўлиб кўрин-
ган бу фожиа хабари билан Нигор ойимни эсанкират-
ди, йиғлатди, Раъно эса танчада ўқиб ўтирган Хайём
рубоиёти устига ҳушсиз бошини қўйди». Аввалги ман-
зара билан бу манзара ўртасида қанчалар буюк зид-
дият ва фарқ бор. Ҳаётнинг шундай зиддиятларини куй-
ламаганни Хайём? Унинг ҳар бир рубоиёси олам зид-
диятининг муҳрини ташийди. Шу ёрда қанча-қанчалаб-
саҳифаларни қоралаш мумкин эди ёзувчи Раънонинг эз-
гин ҳолати ва ички кайфиятларини тасвиirlаб. Лекин адаб
бундай қилмайди. У: «Раънонинг ҳозирги аҳволини
биз ёзиб ўтирмаймиз», деб изоҳ беради. Лекин Хай-
ём рубоийлари устига ҳушсиз бош қўйишнинг ўзи том-
том тасвиirlар ўрнини боссолмайдими? У закий одам
учун қанчадац-қанча ўй ва маълумот беради. Лекин...
лекин худди шу шум хабар келган чоғда Раъно Хай-
ёмнинг қай рубоийсини мутолаа қилаётган эди экан?
Бу бизга жумбоқлигича қолади.

Лойни муштлаб турган анави кулол
Килсайди ақл или чақурроқ хаёл,
Ҳеч қачон бунчалик тепкиламасди
Ота тупроғидан ясаркан сопол...

Балки шоиранинг боши шу дардли рӯбойӣ устига ҳолсиз толгандир. Балки бошқа...

Лекин Хайём бўлмаса, қанчалар жозибасини йўқотарди бу қаҳрамон!

Ўзбек қизи Раъононинг қалби Хайёмни шундай сирли, хаёл илғамас ранглардагина «ҳазм қиласди».

Ўзбек қизини сирли дейдилар.

Янаям сирли бўлмасинми?

Қодирий унинг сири ичига киришга шошилмайди. «Ўз холича» деган сўзининг маъносини яна бир карра бошқачароқ англагандирсиз энди?

РАЪНОНИНГ ҚАФШИ

Ҳозирги бўғинларнинг масрур хаёлларида Абдулла Қодирий эртакка ўхшайди. Абдулла Қодирийгина эмас, у яратган асарлар ва қаҳрамонларни ва айниқса, Отабек, Кумушбиби, Раъно ва Анварни ҳам худди эртакларнинг қаҳрамонлари каби қабул қиласдилар. Отабек ва Кумушга ва қолаверса, уларни дунёга берганинг шаънига ёзилган шеърларнинг ҳисоби йўқ. Мен терац реалистик роман ва унинг асосий қаҳрамонларини эртакка ўхшатиб, уларнинг қадр-қимматини туширмаётганмикинман? Эртак бошқа. Роман бошқа. Лекин Отабек билан Кумуш, Раъно билан Анвар, уларни ташқи оламга боғлаган муносабатлар, муомалалар, муноқотларда... беғуборлик бор, бу беғуборликни фақат эртакларда учратиш мумкин. Поклик, саддалик ва ҳалоллик бор — фақат эртакларда учратиш мумкин. Жўмардлик, тантлилк, самимийлик бор — фақат эртакларда учратиш мумкин. Ўз сўзи ва ўз эътиқодидан тоймаслик бор — бор фақат эртакларда бўлиши мумкин. Ўз даври, ўз муҳитининг ахлоқ ҳамда одоб рукиларига тобелик, бўйсениш бор — эртакларда бўлиши мумкин... Қочишилар, қувишилар, таъқилбар, кек, ҳасад, қирғинлар, адолат учун тикка туриб талашишлар бор — буларни агар эртакда бўлмаса, шарқ романларида ва айниқса, Тогар ва Козимийда кўп учратиш мумкин. Ҳолбуки, бизнинг масрур хаёлимизга эртакдай туюлгани билан буларнинг бари эртак эмас. Ачиқ, фожиали ҳақиқат. Фақат ҳаётнинг тасвири қанча теран ва рост бўлса, у шунчалар гўзал эртакларга ўхшашиб боради ва охири эртакка айланади. Тагор ва Вальтер Скотт романлари эртакка ўхшамайдими ҳозир? Ўхшайди.

Абдулла Қодирий романларида тарихий даврда бўлиб утган тўқнашувлар, курашлар,adolatsizliklar билан адолатнинг юзма-юз келишлари жуда кескин бир тарзда қўйилади. Бу жиҳатдан Қодирийни инглиз тарихин романнависи Валтер Скоттга жуда яқин кўраман. Валтер Скотт романларини юрагингизни ҳовучлаб ўқийсиз. Романга киргандан бошлаб, то тугатмагунча юрак юксак пардадаги тўлқинланишлардан ҳеч пастга тушмайди. Қодирий романларида ҳам худди шундай. Шушга кўра мени Қодирий ва унинг романларини дунё адабиётларида ва умумдунёвий нисбатларда Валтер Скотт ва унинг романлари ёнига қўйгим келади. Шарқона рангин ҳаёт, Шарқ одамлари, уларнинг турфа муносабатлари, муомала йўсинлари. қалб тепкилари, одоб-ахлоқ доиралари, маданий даражалари, ўта нозик ҳиссиятлари уммонлари ва шу уммоцларнинг тинимсиз суратда мавжланиб, жимирилаб ётишларига кўра мени Қодирий ва унинг асарларини Шарқнинг ҳассос ва беҳад дошишманд адаби, серхәёл Рабиндронат Тагорга, унинг гўзал асарларига қиёслагим ва уларнинг ёнига қўйгим келади. Уйлайманки, дунёнинг инсонлар ўртасида мавжуд даражавий нисбатлари бу билан бузилиб-нетиб қолмагай. Тагор ва Қодирий — булар қанчалар яқин одамлар! Қанчалар ўхшаш сиймолар!

Шарқ романчилигининг бир қарашда илғаш ва англаб олиш қийин сири бор. Мен буни инсон юрагининг азалий мавжларини ифодалашда кўраман. Мен буни одобнинг неча минг йиллар ичида ўта сайқалланниб кетган мавжларини бениҳоя нозик қилиб ифодалаш қудратида кўраман. «Мехробдан чаён»нинг охирги «Қўрқинч бир жасорат» бобини бир эслаб кўринг-а. Султонали ва Сафар дўстлари Анвар ва Раънони қочириб шаҳарнинг юксак қўрғони деворларидан арқон боғлаб қўрғон ташқарисига туширмоқдалар. Ҳақиқатан ҳам, жуда қўрқинч манзара. Қодирий уни қилқалам билан чизади. Бунда Тагорча тасвир қудратини кўргандай бўламан:

«Анвар «Туя тойди» ариғидан Раъно ёнига ўтиб, охирги маротаба хайрлашдилар.

— Хайр, Султонали, ака, хайр, Сафар ака!

— Хайр, амакилар!

— Оллоҳнинг паноҳига, Анвар!

— Сафаринглар беҳатар бўлсин!

Қўрғон устидагилардан кимдир бири пиқ-пиқ йиғ-

лади. Анвар Раъновни олдига солиб, узоқда кўринган дарахт кўлагасига қараб юрди. Ер жуда ботқоқ, ҳар бир қадамни аранг ердан узилар эди...»

Тасаввур қилинг: бемаҳал тун. Қаҳрамонлар жонларини ҳовучлаб аниқ ўлим чангалидан қочиб боряптилар. Бу ерда тиқ этган товуш ҳалокат билан баробар. Бунда фақат тўла сукунатгина уларга бирдан-бир иттифоқчи. Энди рус ёки Европа адабининг бу эпизодни қандай ёзишини бир тасаввурга келтиришга ҳаракат қилиб кўринг. Яна билмадим-у, уларнинг тасвирида ҳаёт ва ҳолат ҳаққонияти бу ўринда шуни тақозс қиласдики, Анвар, Раъно сўёзсиз, шарпасиз, қилт этган товуш чиқармай қоронғулек қўйнига кириб ғойиб бўлардилар. Шунда ўзларининг ҳам, халоскорларининг ҳам жонларини қаттиқ хавф остига қўймас эдилар. Чунки, деган бўлишарди ўша реалист адаблар, бу ерда қаҳрамонларнинг овоз бериб хайрлашувлари ортиқча. Вазият хайрлашишни кўтармайди. Ҳар қандай ортиқча ҳаракат қаҳрамонларни фош қилишга олиб келади. Ва улар бу каби ўз тахминларида албатта, ҳақ чиқардилар. Ҳўш, нега унда Қодирий бу хайрлашувга алоҳида урғу беряпти. Қил сиғмайдиган тешикка туяни сиғдиряпти? Нима, у Европа адаблари тушунгган тушунчаларни тушунмайдими? Эътиборга олмайдими? Назардан қочирадими?

Қодирий, афтидан, бу ерда вазият ҳақиқатига ва мантигига эмас, қаҳрамонларнинг ҳақиқати ва мантигига риоя қиласди. Анварларнинг одоби шундай, Тарбияси шундай. Улар одобга ҳар қандай мушкул вазиятда ҳам амал қиласдилар. Одоб уларнинг қонларига сингган ва уларча вазиятга кўра ўзгариб турадиган нарса эмас. Улар, таъбир жоиз бўлса, одобни ўлимдан ҳам афзал биладилар. Анвар ҳалокатдан қутулгач, ўзини Худоёрга тутиб бериб, Султоналини ўлим чангалидан холос этмаслигини тасаввур қилиш мумкинми? Анварга ўз жонидан кўра лафз, мардлик, ҳалоллик афзал. Шунинг учун у Султоналини қутқариш йўлида жонидан кечади. Бу қаҳрамонлар учун инсоний муносабатлар даражаси ҳар нарсадан юқори туради. Шунинг учун ҳам, вазият қанчалар хатарли бўлмасин, Анвар ва Раъно ўз дўстлари ва халоскорлари бўлган Сафар ҳамда Султонали билан хайрлашмасдан кетолмайдилар. Улар, жонларини хавф остига тиркаб бўлса-да, таомилни ўрнига қўядилар. Шунинг учун Қодирий ўз карим ва карима қаҳрамон-

лари нуқтаи назарини ҳисобга олади. Ва улар ўлимдан қочиб бораётгандаридан ҳам ўз инсоний гўзал қиёфаларини асло йўқотмайдилар. Бизга бу эртак бўлиб туюлади.

Лекин Раъононинг кафши-чи? Кафш? Раъононинг кафши нима бўлди? Эсингиздами? Шу қўрқинч вазиятдаги хайрлашувдан сўнг Анвар ва Раъно узоқда кўрииган дараҳт қўлагасини қоралаб ботқоқ бўлиб кетган ердан юриб борадилар:

«Ер жуда ботқоқ, ҳар бир қадамни ердан аранг узилар эди. Йигирма қадам боргач, Раъононинг кафши лойга тишлашиб, оёқ узолмай тўхтади. Икки қадам орқада келган Анвар, Раъони кўтариб олди.

— Менинг этигим бор, чимга чиққунча жим тур— деди Анвар.

— Қўйинг, уяламан...

Анвар жавоб бермади...

Рост, мен шу кафшга болаликдан бери қойил қоламан.

Раъононинг лой билан тишлашган бу кафши тушларимга кириб чиқади.

Гўзал вазият. Гўзал кашфиёт. Гўзал тафсилот! Шундай эмасми?

Кафш Раъно баланд қўрғон деворидан арқонга осилиб туша бошлаганде ёқ ерга тушиб йўқолиши мумкин эди. Шунча баландликдан кафшга тиралиб тушишинг ўзи бўладими? Балки у «Туя тойди»дан ўтаётгандан тушиб қолиши мумкин эди. Йўқ... Кафш ботқоқ даладан ўтаётгандан лойга ботди. Кафш лойга ботмаса, андаккина нозик тап-сўз ҳам бўлиб ўтмасди. Жойнинг қанчалар оғирлиги ҳам билинмасди. Шу кафш бизнинг эсимизда қолади. Кўз илғамас оддий, лекин улуғ қаламларгатина насиб бўладиган кашфиёт шу кафшда.

Нега эса у менинг тушлариміа кириб чиқади?

Аммо? — дейман. Анвар Раъони кўтариб олганда, кафш лойда қолиб кетдими ёки Раъно уни оёғидан қўймадими? Ёзувчи бу ҳақда индамайди.

Лекин мен ўзимча ҳали ҳамон Раъононинг кафши ўша қўрғон ташқарисидаги ботқоқда қолиб кетган деб юраман.

Ахир Раъно янги ҳаётга эски кафши билан кириб борармиди? ..

Қодирий халқимизнинг маъруф хотирасига ёд бў-

либ кетган. Уни эртак каби шариллатиб ўқийдилар Эсларида сақлаб юрадилар.

Қодирий миллий онгга гўзаллик ва маърифат гав-ҳарлари қандай ва қайси йўллар билан кириб боришини бехад теран англар ва биларди. У миллий маданий ҳаёт ва миллий маданий онгимизнинг жавҳари бўлиб етишган эди.

ЭМРАНИШ

Гул кетар бўлса,
гулистон эмранар.

«Алломииш»

Назаримда, ҳар бир йилнинг ўзиға хос тимсоллари бордек туюлади. Йиллар шу тимсоллар воситасида тарих хотирасида қолади. Фалон йили ўрикларни барвақт совуқ уриб кетган эди. Фалон йили Кора дengизда кемалар тўқнашиб кетган эди. Фалон йили Чернобил чиқди, дейди одамлар. Ёмонликлар абадул абад одамларнинг эсларида турганидай, яхшиликлар ҳам диалектика қонунияти бўйича ёмонликлар қаторида ўтган йилларнинг тамғалари каби ёдимиздан ўчмайди.

Шу фикрни узайтириб олтмишинчи йилларнинг яхшиликларини эслаб кўрайлик. Мен адабиётчи бўлганим учун эсимга дарҳол Абдулла Орипов ва Эркин Воҳидов тушади. Олтмишинчи йиллар Эркин Воҳидов ва Абдулла Ориповнинг йиллари эди. Олтмишинчи йилларнинг яхшилиги Абдулла Орипов ва Эркин Воҳидов бўлди... Шеърият шу йиллар ва айниқса, олтмишинчи йилларнинг илк пайтлари волюнтариэм ва расмиятбозлиқ тугал шаклланган бирёқламалик асоратларидан қутулиш палласига кириб кела бошлаган эди. Ҳа, бирёқламалик унча-мунча нарса эмас, у — асорат. Расмиятчилик ва буйруқбозлиқ унча-мунча нарса эмас, у — асорат. Поэзия мана шундай маънавий асоратлари исканжасида анча қисилган эди. Абдулла Ориповнинг қўлига соз олган пайти мана шундай асоратлардан халос бўлишга уриниш даврига тўғри келди. Бу шоир асоратдан халос бўлган овоз билан шеър айта бошлади. Унинг эркин-хур куйи ҳаммамизни ром килиб олди. Олтмишинчи йиллар Абдулланинг ҳар бир ёзган шеъри чин овоза бўлди. Ҳар бир шеъри бир воқеа каби қабул қилинди.

Шеърият — бу энг юксак маънодаги ҳурлик. У ҳар

қандай тутқунликда ҳам ҳурликни күйлайди ва ҳурликка ўргатади. Асоратга соладиган шеър яратилган миди инсоният тарихида? Асоратга соладиган, асоратни күйлайдиган шеър бўлса, уни ҳеч қачон шеър деб атаб, шеър деб тилга олиб бўладими, ахир?

Барча нуроний шоирлар қайси халқа, қайси ирқка мансуб бўлмасинлар, шеърни халоскорлик деб билганилар. Унга халоскорлик вазифасини юклаганлар.

Абдулла Орипов олтмишинчи йилларда мана шундай халоскор шеър соҳиби сифатида майдонга чиқди. Олтмишинчи йилларнинг биринчи ярмида ёзилган унинг «Юзма-юз» деган таранг шеърни эслайсизми? Шоирнинг жафокаш, меҳнаткаш, ўмри уватларда ўтаётган ҳалол ҳалқ билан узван, жисман, руҳан бир бўлиб кетиши илк марта ана шу катта шеърда кўринган эди. Шунда у биринчи маротаба: — Халқим! — деда мурожаат қилиш ҳақини қозонган эди. Биз ўшанда ҳар ким ҳам халқим, халқим! — деб айтольмаслигиги, ҳалқ жуда катта, жуда поёнсиз ҳодиса эканлигини, халқим, халқим, деб бонг уриш учун кишида улуғ бир маънавий ҳуқуқ бўлиши кераклигини англаган эдик. Халқим деб сўйлаш қадим турк шоирларидан қолган одат эди. Халқнинг бошига залварли дамлар тушганда, шоирлар ёв ва дов олдида уни бирлаштириш учун шундай деб мурожаат қиласидилар. Сўнг бу мурожаат узоқ замонлар унугтилди. Шоирлар узоқ замонлар ишк ва ғазал оғатига гирифтор бўлдилар. Шахсга сифинишнинг даҳшатли иллатларидан қутулиш имкони бошланган дамлар шоир ҳам туғилди ва бу кўхна мурожаат ҳам яна ўз-ўзидан ўз эрки билан тирилди. Лекин ўша пайт бу шеър дунё кўрмади. Биз уни қўл-ёзмаларда ўқидик. У бизнинг содда, беташвиш жонларимизга энг катта жасорат бўлиб кўринди. Абдулланинг ўз ҳалқини синглим, деб атashi жуда ғалати ва шу билан бирга жуда жозибали эди. Ҳозир ҳам бу ажойиб шеърни ўқисам, Абдулланинг бутунилигига тан бераман, унинг қўйма иқтидоридан кўнглим ўсади.

Үйимиз олдида бир жуфт оқ терак бор. Улар жуда шукуҳ қўйиб ўсан. Бу теракнинг устига бир миллиард раққос миниб олганга ўхшайди. Бир миллиард япроқ бу терак устида ўйинига тушади. Бирпас унга қараб турсангиз, дилингиз ҳар қанча мунг бўлса ҳам унугтиб, шу зумрад япроқларга қўшилиб рақсга туша бошлайди. Табиатнинг шоирлиги шу. Шамол соғ чалади. Япроқ ўйинга тушади. Абдулланинг ҳар бир

шеъри шундай файз дарахти. Улар бизга асоратсиз тўзалликдан тарбия берадилар. Абдулланинг севги ҳақидаги илк шеърларидан бири шундай тугалланар эди:

Наҳот биздан қолмас ҳатто мунг?
Наҳот бўлмас бирор хотирот!
Ишонмайман, муҳаббатдаи сўнг
Бегоналиқ бошланса наҳот?!

Бу сўзларни мен бир севги тарихининг якуни деб эмас, умуман инсон ҳар қадамда ўзига ўзи бериши керак бўлган савол каби англашни истардим. Одам ўз умрини ўйлади:

Наҳот биздан қолмас ҳатто мунг?

Мен ўз-ўзига берилган ушбу ғаройиб ҳол саводдаги мунг сўзининг ҳолатигагина эмас, умуман, Абдулла Ориповнинг шеърларида ҳаракат ва ҳаёт яратгувчи бир кучга — трагизм ҳиссиётига эътиборингизни қаратмоқчи эдим. Бу шоирнинг шодлиги доим мунг билан, мунги эса доим шодумонлик билан қўшилиб кетади. Шоир назарида ғусса ва ғуссавийлик ҳамда шодлик ва шодумонлик ҳар қачон бир-бирларини яратадилар, бир-бирларига доя бўладилар, бир-бирларини етаклаб юрадилар, бир-бирларини тарбиялайдилар. Шодлик ғуссаларнинг мураббийсидир ва ғуссалар баҳтиёрликларга мураббийидир. Қанчалар галати эшитилади бу сўзлар! Лекин қанчалар олам қонунияти бор уларда? Қанча-канчалаб одамлар қалбларининг тарихи бор уларда! Зотан, қоннинг ўзи ҳам қизил, ҳам қора, ҳам нурлидир.

Абдулла Ориповда мана шу ҳиссиёт жуда эрта камол топғандек туюлади. Унинг олтмишинчи йилларнинг ўртасида ёзилган «Ўйларим» деган шеъри ёдин гизда-ку. У «Юзма-юз»дан кейин, лекин у билан бир трагизм тўлқинида яралган. Мен бу шеърни ўқиганда ва неча замон унинг оҳанглари таъсирида юрганда, ёшим йингирма саккизда эди. Хозир бу шеърни қайта ўкиб ўтириб, олтмиш олтинчи йилга қайтиб боргандай бўлдим. Ўзим ҳам билмайман, нега, лекин шеър бирдан худди ёшлигимни, йингитлик шавқларимни қайтариб бергандай туюлди. Уша пайтларни эсладим. О, унда Абдулланинг вужудида шеър шовуллаб ётарди. Лекин доим шовуллаб турган рухини кандайдир теграб туришга мажбур бўлаётгандай, айтиши жуда за-

рур булган гаплари, фикр-ўйларини айттолмаётгандай — ўзини жуда кўп жиловлашга тўғри келаётгандай бир аҳволда эди. Шеър юракда гулдираб турсаю, ички цензор: йўқ, буни ёзиб бўлмайди, буни ёсанг, ёқтиримайдилар, чиқармайдилар, ташқид ўти билан куйдиралилар, турли тамғалар босадилар ва балки ҳатто қулагироқ келса, жавобгар қилишдан ҳам тоймайдилар, деган ҳадик билан тергаб турса, ижодкор учун бундан азоби йўқ. Бизга демократиянинг кераги йўқ, деб узоқ замонлар одамларни чорчўпга солган сталинизм кишиларпинг юракларида ғалати бир «шахс» — ички цензорни шакллантирган эди. У мъълум бир чициқлардан чиқмай ўйлаш ва фикрлашни талаб қиласди. У рухнинг барча кўчаларига светофор қўйиб ташлаган эди. Чамаси, Абдулла Орипов шуни ортиқ дарражада, бошқалардан кўра кўпроқ ҳис қиласди. Фикрний ихтиёрнинг чекланганлиги унда трагизм ҳиссиётини янада кучайтирас эди. У шеърларида нималарни дидир йўқотаётгандай, энг азиз нарсалардан айрилиб қолаётгандай бўлаверарди. Йўқотиш, руҳий йўқотишлар ҳиссиётлари унда кучли урғу олди. Ноаён эзилишларнинг замнирида шу ётарди. Муаллимлар унга бу дунёда алам, фироқ, ғам йўқ, сизнинг йўлларингиз доим равон, сиз дунёда энг бахтиёр ёшларсиз, деб таълим берган эдилар. Шу таълим таъсирида олам мургак нигоҳлар учун беҳад пок бўлиб кўринарди. Улар ўзларини дўст учун, Ватан учун фидо бўлишга чорланган деб билардилар. Лекин ёш қалб мустақил ҳаёт кўчасига кириши билан йўллар муаллимлар ва китоблар таълим берганидай равон эмаслиги дарҳол билинади. Сўзлар, таърифлар, таълимлар бошқаю ҳаёт бутунлай бошқача эканлиги мъълум бўлиб қолди. Қалб майнин шабадалар билан эмас, бўронлар билан тўқнашди. Хаёл билан реаллик ўртасидаги кескин қарама-қаршилик ёш шоир юрагини ларзага солди. Уни довдиратиб қўйди. Шунда унда йўқотиш ҳиссиёти пайдо бўлди. У шеърини йўқотиб қўйгандай сезди ўзини. «Юрагимга бир маҳаллар кирган туйгулар Энди сендан кетгаймиз деб сўрайди жавоб». Чунки, шоир назарида юрак олдида берган ваъдалари бажарилмагандай, улар саробга айлангандай бўлади. Унинг ўзи сигинган инсон ҳақидаги тасаввурлари ҳам ўзгаради. Кеча унинг назарида инсон тоғлар қадар юксалган ҳолда тавдalanарди. Бугун эса уларнинг ҳаммалари срга тушган, шоирнинг атрофида эдилар.

О, қанчалар севар әдим инсон
зотини,
Қандай буюк мұхаббат-ла севар
әдим мен...

Шоир ёшликда умуман инсонни севарди, умуман инсоннің учун күярди. Лекин мустақил ҳаётга қадам қўйганда, унинг бўронларини ўз бошидан кечирганда, суронларига ошина бўлганда энди инсонлар ҳар турли бўлишини кўрди. Инсон ҳақидаги рўёлар ўрнини реал тасаввурлар эга аллади.

Мен инсонни бир инсондай
севардим, лекин
Нечун кўпдир ҳалигача разил одамлар.

Ана шу ниҳоятда соддадиллик билан ўртага қўйи-
лаётган саволда шекспирона қудрат акс этмайдими?
Мен одамларни ахир севардим-ку, лекин нега разил-
лар кўп жаҳонда! Шу пайтгача бу юракда фақат севги
ҳоким эди. Шу пайтгача бу қалб нафрат нималигини
билмаган эди. Лекин мана у разил одамлар кўплигини
кўрди. Оламнинг мукаммал эмаслигини англади.
Унинг юрагида энди нафрат ҳам пайдо бўлди. Юрак-
да ёлғиз ҳукмрон бўлган мұхаббат энди сурилиб, наф-
ратга ўрин бўшатишга мажбур бўлди. Лекин ҳеч ис-
тамасди бу ёш қалб ўзида нафрат яшашини, ярмини
нафратга бўшатиб беришни. Лекин ҳаёт, очиқ кўз
билаш қараш эҳтиёжи шунга олиб келди. Абдулла
Орипов шеъриятида бу — трагизм ҳиссиётини кучай-
тирган холатларданadir.

Қайлардадир ҳамон кезар зулмат
тимсоли,
Қайлардадир ҳамон тинмай
оқмоқда-ку қон.
Кўзларимга гоҳ кўринар телба
мисоли
Мен бир вақтлар сажда қилган
ҳазрати инсон...

Ғўр ишончларнинг барҳам топиши ва ўрнида янги
ишончларнинг туғилиши мана шундай руҳий-маъна-
вий фожиалар ичida кечади.

Назаримда, Абдулла Орипов ишерларининг бутун
жозибаси, бутун поэзияси мана шу «қайлардадир»
деган сўзда жамлашгандай туюлади. Ёлғизгина сўз

бус-бутун за яхлит ифодага айланади. Мен номукам-
мал бир хаёлим билан ўйлайманки, агарда шу «қай-
лардадир» бўлмасайди, Абдулланинг шеъри ҳам бўл-
масди. «Қайлардадир» деган сўз поэтик ҳилқатга,
аллақандай образга дўнади. Кейин ҳам бир неча ўн
йиллар давомида Орипов шеърларида энг масъул
дамларда шу сўз шсър қаватига кириб келади. У—
худди чексиз океанлар забтида қолган сол ё чақин-
лар багрида қийқириб учаётган қалдирғоч. Англаб
бўлмайди. Умид борми бу солдан? Тирик қолармикин
бу қора қалдирғоч? Номаълум. Қайлардадир — бу
ажиб тусмол. Ва ажиб тимсол. Бу гўзал ва фожи тус-
молнинг бошқа ранги ҳам бор:

Ниманидир ахтараман — шеърдан
ҳам улуг,

Ниманидир ахтараман — нондан
азизроқ...

Бу «ниманидир» кейинги «қайлардадир»нинг дебо-
часи, опаси. Поззиянинг ҳурлиги, номаълумлиги, ожиз-
лиги, қудрати ва асоратларга қарши, улар қандай кўй-
лак киймасинлар, исёни шу «қайлардадир» ва «ниман-
дир»да тўлиқ намоёндир. Орадан ўн йиллар ўтиб, ар-
мон кучайган, трагизм ҳиссиёти ўзига янгидан янги улуш-
лар қозонган дамларда Абдилла яна бу савонни такрор-
лайди: «Қолди қайлардадир ёшлик бокира» («Хайрла-
шув»). Сирли хаёллар билан реалликнинг омонсиз тўқна-
шувлари янада фожиалироқ тус олди. Шоир «Ўйларим»
билан «Хайрлашув» орасида замонасозлик, ўткинчи
дамларнинг кайфиятларига ҳам берилгандай бўлди.
Урф тусини олган календарчиликдан, «голиб», «музаф-
фар» шеърлар ёзишдан қочиб қутулолмади. Бу икки
шеър орасида, таъбир жоиз бўлса, ундаги ички цензор
ҳам негадир ҳоким мавқега кўтарилиди. Твардовский
«талант — жазо» деган экан. Абдулла Орипов ўн
йиллар орасида бошидан кечиргапларини «Хайпла
шув» шеърида бир мисрада хulosалаб айтгандай бўл-
ди. «Ҳаяжон бу — ўлим, кулфатдир қўшиқ... Эҳти-
мол, бу холоса ҳам эмасдир. Эҳтимол, бу кимгайдир
фақат кутилмаган образ ёки афоризм бўлиб туюлар.
Лекин нега Твардовский талантни мукофот демади.
Талантни оз эмас, кўп эмас, нақ жазо деб топди. Не-
га? Ва нега Абдуллага шеър яратувчи ҳаяжон ўлим
ва жон баҳиш этувчи қўшиқ — кулфат каби туюлди.
Нега? Жавоб топиб бўлармикин бу савонга? Шоир

умри қуюнда қолган дараҳт, дейди яна Абдулла Орипов. Нима ётади бу сўзларнинг тагида? Ижодкор ва даврнинг азал-азалдан рўбарў келишими? Ва шунда ўртада туғиладиган зиддиятларми?

Менинг пазаримда, харсалгни тешиб чиққан қиёқ-майса шундай дейиши керак эди. Улкан асрий қояларни ёриб чиққан, денгизнинг абадий шовуллашлари га қулоқ тутолган ва шунда ўзи ҳам най бўлгиси келган қамиш шундай деса керак эди. Яна шоирнинг ўзига маълумроқ. Тилимизда, қадимдан бир сўз яшаб келади. У бундай ёзилади: эмраниш. Унинг маъно товланишлари кўп. Жумладан, ўртаниш, тўлғониш, куйиш, рашк қилиш, қизғаниш, армон. Эҳтимол армон сўзи эмраниш билан қариндошdir. «Алпомиш»дан олинган мисрада бу сўз «ўртаниш» маъносини англатади ва ўз гўзал поэтиқ ҳуқуқи ва ўринни қозонади. Мен Абдулла Орипов шеърларидаги ҳукмрон руҳий ҳолатни кўп сўзлар, сифатлар билан англатишга уришиб кўрганман. Аммо ҳеч биридан кўнглим тўлган эмас. Кеча Абдулла Орипов шеърларини қайта ўқиб ўтиракманман, бу сўз онгимнинг қоронғу пучмоқларида ўз-ўзидан пайдо бўлди. «Бу — эмраниш! Бу — эмраниш ахир!» — дерди юрагимда шивирлаётган аллаким. Кейин билдим: болаликда достонлар ўқиб юрганимда бу сўз миямнинг қаеригадир ўрнашиб қолган экан. Ўттиз-қирқ йил ўтиб мана яна юзага чиқди. Ҳозир унинг нима маъно англатишини равshan билмас, лекин юракдан ҳис қилиб турар эдим. Сўнг ўзбекий, туркий луғатларга қарадим. Бояги маъно! «Алпомиш»дан мисол: «Гул кетар бўлса, гулистон эмранар!» Суюниб кетдим. Ниҳоят Абдулла Орипов шеъриятида ҳоким руҳий ҳолатнинг отини топган эдим. Бу — Эмраниш эди. Абдулла Орипов ҳар бир шеърини эмраниб ёzádi. Қанча уринмай, бундан ортиқ қилиб айттолмайман.

МУШКУЛ ИУЛЛАРДАГИ МАЪСУМЛИК

Абдулла Ориповнинг шеърларини айтиб, ёд ўқиб, уларга ошиқ бўлиб бутун бир авлод ўтиб боряпти. Олтмишинчи йил бошлигандан сўнг ўттиз беш йил мобайнида унинг шеърлари, ғоялари, фикрлари маънавий-руҳоний ҳаётимида энг чуқур илдизлар қол-

дириб келади. Бир авлод унинг ошиқона шеърларини дилига туғиб катта бўлди. Яна бир авлод унинг маъюс ва ўқтам, изтироб оташи билан яллигланган шеърларига эргашиб, улардан озиқ олиб ва илҳомланиб ўзбек адабиёти дунёсига кириб келди.

Мен ҳам олтмиш биринчи йилдан бери Абдулла Орипов шеърларини ўқийман. Улар доим кўнглимнинг бир чеккасида туради. Ўзимча баъзан ўйлайман: бу шеърлар бўлмаганда мен бошқача одам бўлардим. Ўзимни балки қашшоқроқ сезардим. Руҳан қийналган чоғларимда «Тулки фалсафаси» ёки «Бу ишқ сиррин китоб эттинг, китобинг ичра меп борман»ни ўқисам, Румий, Паҳлавон Маҳмуд, Хайём нафаси келиб турувчи рубоий ва тўртликларини эсласам, вайрон дилнинг хоналарига ёруғлик тушгандай кўнглим равшан тортади. Бир мен бўлмасам керак шундай ҳолатларни бошидан кечирадиган. Унинг олтмишинчи йилнинг ўртасида кўринган «Митти юлдуз» ва «Қўзларим йўлингда» китобларидан бошлаб ҳаммаси орадан кам бўлмай жавонларимда турди ва менга ҳамроҳлик қиласди. Унинг учинчи китобимикин, «Онажон»нинг кўк баравар шуҳрати ҳамон ёдимда. Бу китоб қўлмақўл бўлиб кетди ва халқа ёд бўлди. Абдулла Ориповнинг шундан сўнг чиққан «Руҳим», «Ҳайрат» китоблари миллий шеъриятимизда ва собиқ иттифоқ адабиётида улкан воқеага айланди. Ўша даврда шеър эркинлик учун хизмат қилди. Халқни ғафлатдан огоҳликка чақириди.

У даврда жуда кўп тушунчалар мунофиқона саф-саталарга хизмат қилиб, олижаноб маъноларини йўқотди. Кўп тушунчалар емирилди. Шундай емирилган, сийқаланганд тушунчалардан бири «халқ фарзанди» тушунчаси. У давларда халқни талаб еганлар, уни қулдай хизмат қилдирганлар ва тобелик, кўрликда асраганлар халқ фарзанди бўлдилар. Ҳолбуки халқ фарзандлари аслида жуда сийракдир. Қўлдаги бармоқлар билан санар даражада кам улар. Халқнинг асили орзуларига ўзлари ва ўз ҳаётларини тамом бағишлаганларгина халқ фарзанди деб аталишга сазовордир. Худди шунга кўра Эркин Воҳидов ва Абдулла Ориповни халқ фарзанди деб аталса, шу тушунчанинг асили маъноси юзага чиқади. Олтмишинчи, етмишинчи йилларниг илғор фикрлари шулардан чиқди. Халқнинг дилидаги дардларни шулар жасорат билан ёэдилар. Халқ буни тушунди ва том маънода қабул қилди.

Албатта, Абдулла Орипов ёки Эркин Воҳидовнинг шеърлари жамият ичидаги кулфатларнинг олдини ола олмади. Шеър кулфат олдида ожиз. Лекин у шеърлар халқнинг эзгу ҳислари ўлиб кетмаслиги учун бош кўтариб турди. Эркин фикрни тарбиялади. Абдулла Орипов шеърининг қиммати ва аҳамияти ҳам шунда — эркин фикрни тарбиялаганида, халқда ўз кучига ишончининг сўнишига йўл қўймаганида. Ҳолбуки, ишончининг сўниб битиши ҳеч гап эмасди.

Ахир халқнинг ўттиз фойиз сўзлашув тили аллақандай қоришиқ, бўтана тилга айланниб кетмаганими? Халқ тўхтовсиз дўлдай ёғилган тарғибот ва ташвиқотлар сели остида ўз гўзал тилини йўқотиб қўяётгани устида ҳам ўйломмай, қайгуроммай қолмаганими? Миллий гурур мутлақо қатагон қилишга киришилмаганими? Ана ўшанда Абдулла Ориповнинг нолалари янграб турди.

Ушанда «Ўзбегим» балки халқни андак сергак тортириди.

Уларнинг шеърлари яхши заминга тушиб яхши ниҳол берди.

Дунёнинг сирини англатадиган битта, биттагина фикр бўлса керак. Шу фикрни топсам, яшаш ва ўлимнинг нималигини билиб оламан. Ҳаётимни кейин ўштанҳо фикрга яраша қураман, деб ўйлар эдим эсимни таниган хәёлпараст йилларда. Сизга балки ёлғон, менга чин: ҳаётга ўргатадиган универсал бир калит қидирадим. Қайси китобга қўл урмай, унинг қайси саҳифасини ўғирмай шу сирларни очишга ёрдам берадиган, яшашга чинакам ўргатадиган калит-фикрни топиш хаёлимни доим банд қилиб турарди. Ўз аданбиётимиздан Қодирий, Қаҳҳор, Айнийларни ўқирдим. Пешанам мудом ўтмишнинг адоқсиз фожиаларига тегиб ёриларди. Фожиалар ичидан ўзимга керак фасонасоз калитни тополмасдим. Дардимга дард қўшиларди ва менда эзгинликни кучайтиради. Биласиз: эзгинлик ҳаётда ижобий ўзгаришлар қилишга қодир эмас. Эзгин булоқдан шеър чиқиши мумкин. Лекин халқнинг аҳволида эзгинликдан ўзгариш бўлмайди.

Узингизга маълум: биз эзгинликка ўрганиб қолганимиз. Ҳатто эзгинликни севамиз. Эзук ашуласарни неча ўн йиллардан бери сел бўлиб эшиштамиз. Лекин жасорат ва жўмардликка хизмат қиладиган куйлар ва қўшиқларни ёқтиромаймиз ва яратмаймиз. Бизнинг ўксуклик деңгизига гарқ бўлиб ётган руҳимиз хотир-

жамлик ва жон койитмасликни севиб қолган. Эскиликка маҳкам ёпишганимиз.

Андак чалғиб кетдик. Бояги фикримни давом эттирасам.

Чамаси, ҳаёт калити ҳам ўксук деңгизга гарқ бўлиб кетган эди. ТинмайFaфур Гуломни ўқирдим. Мен бора-бора унинг жуда машхур: «Азиз асримизнинг азиз онларни азиз одамлардац сўрайди қадрин» деган шоҳ сатрларини шундай калит эмасмикин деб юрдим. Лекин сал ўтмай бу гўзал сўзлар билан росмана ҳаёт ўртасида ўтиб бўлмас жар ҳосил бўлганини кўрдим. Ҳаётда бирёқлама мафкура ҳукмрон эди. У ҳамма нарсани ўзига тобе этган ёки тобе этишга туи-кун уринарди. Давр у ёқда турсин, ҳеч ким ҳеч кимнинг қадр-қимматии сўрамас эди. Томир-томирларга, ҳужайра-ҳужайраларга сталинича мафкура сингиб кетган эди. Сўзлардаги риторикабозлиқ ҳаётдаги риторикабозликка айланган, яъни ҳамма нарсалар сийقا тус олган эди. Дабдабали шеърлар бу сийқаликни янада бўрттириб кўрсатарди.

Кейин Саъдийнинг «Гулистон»нин ўқидим. Мир Алишер Навоийни ҳижжалаб мутолаа қилиншга тушдим. Уларда фикр дунёси жилвагар Сомон йўлидек беҳисоб чатирлаб очилиб ётганини кўрдим. Саъдийнинг ҳар бир ҳикояти ва Навоийнинг ҳар бир сатри ҳаёт калити бўлиб кўринди менга. Лекин менга битта — танҳо калит, ҳаётнинг ҳамма ҳолларига ярайдиган калит керак эди. Охири Мир Алишер Навоийнинг: «Одами эрсанг, демагил одами оники, йўқ ҳалқ ғамидан ғами» сўзларига тўхтатдим. Анча пайт бу гўзал сўзлар одамлар ҳаётининг универсал калити бўлса керак деб эътиқод қилиб юрдим. Лекин узоқ замон тепамда ва атрофимда ҳалқни ўйламаган, ҳалқ учун қайғурмаганларни кўрдим. Улар аллақандай ёлғон, беҳосил шиорларни қурол қилиб олган, ҳалқ ғамини еган кишиларни эса, «миллатчи», «ҳалқ душмани», «экстремист» деб қирар, Солженицинга ўхшаганларни ахлат челакларга ўтқазар эдилар. Бирон маротаба тилидан «ўзбек ҳалқи» деган сўз чиқмаган «ҳалқ оталари»нинг тарақа-туруқ асарларини ўқидим. Навоийнинг улуғ сўзидан йироқлашиб кетганлигимизни, амалда унга тамомила бегона бўлиб қолганлигимизни сездим. Лекин китоблардан ҳаётнинг универсал калитини ахтаришдан чарчамадим.

Ҳамон қидираман. Шундай бир шароитда Абдулла

Ориповнинг айниқса олтмишинчи йиллардаги шеърлари юракка малҳам бўлган эди. Ундан жуда кўп фикр ҳазиналарини ва оҳанглариниг шалолаларини топдим. Сиз «Олтин Қозиқ»ни биласиз. Эҳтимол уни кузатгансиз. Мен калит-фикр қидирганда «Олтин Қозиқ»ни назарда тутган эдим. Албатта бу қидиришлар афсона бўлиб туюлади. Ҳа, лекин «Олтин Қозиқ» бор-ку дейман. Биз кўриб турган, хаёлимиз етган коинот шу «Олтин Қозиқ» атрофида айланади. Биз шундай улуг ва шонронга ном топган боболаримиздан доим миннатдор бўлишимиз керак. Боболаримиз жуда кўп юлдузларга номлар қўйганлар. Уларнинг барни ҳикматли номлардир. Донишманд Рабгузийнинг улуг-фармон китобида улардан айримларининг номлари билан танишиб ҳамон ҳайратим пасайгани йўқ. Юлдузларга уларнинг ўзларига мос номлар беролган халқ нега бугун жаҳонда кўп нарсаларда оқсанб ӯтиради? Ўз ҳаётини ўз удумича қуролмайди.

Чалғиб кетдим. Ҳа, «Олтин Қозиқ»қа қайтайлик. Бутун юлдузлар олами ҳаракатда. Фақат «Олтин Қозиқ» ўз мақомида кечакундуз неча миллион йиллардан бери собит туради. Ботмайди. Чўкмайди. Йўқоммайди. Катта бўлмайди. Кичик бўлмайди. Оғмайди. Ҳаволамайди. Менга «Олтин Қозиқ» коинотнинг калити бўлиб туюлади. Калит каби фақат ўз жойида, ўз мақомида айланади. Ва оламлар эшикларини очади. Оламга мунтазамлик ва тартибот баҳш этади.

Одамларнинг оламларига ҳам шундай калит бўлиши керак. Коинотда бор эса, нега одам ҳаётида бўлмасин? Мени бу фикр кўп чалғитди? Уни қидириб бошқа нарсалар ёдимдаи кўтарилди.

1964 йил бўлса керак, балки олтмиши учдир. Бадний адабиёт давлат нашриётида Эркин Воҳидов қўлимга бир даста шеър берди. «Иброҳим, шұларни ўқинг. Фикрлашайлик. Сиз учун катта янгилик бўлади». У шеърлар Абдулла Ориповнинг илк китобига тайёрланган шеърлар эди. Бунгача Абдулла Ориповнинг айрим шеърларини матбуот саҳифаларида ўқиган эдим. Улар шеърхон ўшлар орасидагина эмас, жамоатчилик ўртасида ҳам овоза бўлиб келаётган эди. Қўлимдаги бир даста шеърни ўқиб унинг муаллифи ҳақида тасаввур хосил килдим. Шеърларида у гоят тиниқ фикрларди. Усмон Носирий маҳв этилгандан сўнг шеъриятга тамомила бегона бўлиб кетган туйғунлик жон ришталаридан қизил либос кийиб яна тирилгандай эди.

Унинг фикри нақадар ёмби эди. Шу билан бирга лўнда эди. Фикрларидаги оҳангдорлик эса худди қум барханилар орасидан чиққан ўқ овозидек янгроқ ва акс садоси узоқларга тараларди.

Шоир фикрнинг олижаноблигига ва айни замонда фикр оҳангининг олижаноблигига эришган эди.

Бу олижанобликни кейин у ҳеч қачон йўқотмади. Ҳатто замон ўзгариб олов ёшлар шеърда бошқача ҳаво ва бошқача наволарни ёқтирадиган бўлганларида ҳам, ҳодисалардан кўнгилларга дарз кетганда ҳам, бу олижаноблик агар шеърда эмас, шеърларнинг сатрларида сақланиб қолди.

Абдулла Ориповнинг ҳар бир шеърида бу шеърни сиз ёқтирасизми, ёқтирмайсизми, қатъий назар, мағиз бор. Асиш шеър мағзи бор.

Абдулла Орипов ўша чоғларда (олтмишинчи йилларнинг бошларини назарда тутяпман) ақлли ва хаёлчан эди. Ўзига сифмаган, ўзини тўла англамаган, лекин мағзи билан одамларни ром қила бошлаган ақл, не ажабки, дарвешликка ундар эди. Ақл билан борлиқ дунё доим зид. Ақл қанчалик ўткир бўлса, бу зиддиятнинг шиддати ҳам шунчалик кучлик. Бизнинг ҳисобпараст дунёмиз дарвешликни ёқтирамайди. Шоир буни тушунади. Дунё дарвешликка тоқат қилолмаса, жилла қурса, дарвешвшашлик билан чиқишар дейди. Шоир табиатнинг дарвешваш майлларидан мафкура қизғинликлари учун воз кечолмайди. Лекин баъзан замонасозлик қилиб коммунизм ва унинг сифат ҳужжатларини улуғлаб қўяди. Лекин дарвешваш хаёлдан ҳеч қачон, ҳеч бир шароит, вазиятда воз кечмайди.

Минглаб, миллионлаб одамлар турли баҳсларда ва тўқнашувларда ўзларининг ҳақ эканликларини исботламоқчи бўладилар. Ўзлари амал қиласидиган мафкурани қурол сифатида ишлатадилар. Ишонтирмасалар, зўравонликка ҳам ўтадилар. Лекин зўрлик асосига қурилган иморат тез вайрон бўлади. Дарвешлар ҳам баҳс, тортишувлардан қочмайдилар. Лекин улар баҳсларда ҳақиқатни қидирадилар. Баҳс, тортишувдан ўзларига наф, манфаат изламайдилар. Шунинг учун зўравонлик ҳам ишлатмайдилар. Бўғилиб, қичқирмайдилар. Ҳақман деб, томоқ йиртмайдилар. Уларнинг далиллари ҳам, исботлари ҳам нолага ўхшайди.

Рост эмасми, дарвешлар нола қиласидилар.

Мен олдинги мақоламда Абдулла Ориповнинг шеър ёзишини эмранишга қиёс қилган эдим. Ҳозир нолага

қиёслаяпман. Тафовут йўқмикин бу ерда? Қелинг, бу сўзларни бир-бирига қўшайлик ва Абдулла Орипов ўз шеърларида эмраниб нола қиласди дейлик. Шунда бу шоирнинг овози ҳосил бўлади. Шоир ўз шеърларини маъюс табассум билан ўқиганини кузатганимисиз? Ҳатто энг нозик қочиримлар ҳам шу хазин табассумга фарқ бўлиб кетади. Сабаби ўша эмраниш. Уша нолакорлик.

Машраб бир оташин газалида Худога нола қилиб, газабингдан титирайно, дейди. Эътиборингизни «титирайно» сўзининг ёзилиши ва оҳангига тортмоқчи-ман. Бу «титирайно» асло қўрқишдан эмас. Мұҳаббатдан. Бу мұҳаббатнинг «титирайно»лари. Машрабнинг барча газалларида бу титироқни том маънода вужудингизда ҳис қиласиз. Ана шу «титирайно» Абдулла Орипов шеърлари оҳанглари учун ҳам ҳоким. «Титирайно» эмраниш ва ноланинг даражаси Шу «титирайно»сиз Абдулла Орипов шеъри шеър эмас. Буни шоирнинг ўзи жуда теран тушунади.

Абдулла Ориповнинг ўша ўқиганим илк китобининг шеърларида Байрон, Усмон Носирий, Лермонтовдан тушган учқунлар чарсиллаб турар эди. Айниқса, «Юлдузлар», «Ҳали олдинда...», «Севгисиз одам» шеърларида учқунлар дарвешона кайфиятларин аланса олдираётгани ва улардан полалар бунёдга келаётгани сезиларди. Уша шеърлар мұҳоммадасида шоирнинг ўзи йўқ эди. Уч-тўрт тенгдошларгина йиғилган эдик. Менга шоирнинг: «Ўлимни жонимдан севаман, бироқ, Мен уни севаман ўлимдан ортиқ» деган фавқулодда сатрлари қаттиқ таъсири қилди. Унинг илк шеърларида бундай ҳайратомуз байронча сатрлар тошиб ётарди. Шу билан бирга мен ўша пайтда «Куз хаёллари», «Сен баҳорни соғинмадингми?» каби ўйноқи ва аллақандай маъюс шеърларини шаклларининг бу қадар гўзалигига қарамасдан фикри юзароқ деб ўйлаган эдим. Эркин Воҳидов бу фикримга асло қўшилмади. «Шундай шеърлар бўладики,— деди у,— уларда фикр эмас, ғалаёнли туйғу ҳукмрон даражага кўтарилади. Абдулланинг «Куз хаёллари» ва «Сен баҳорни соғинмадингми?» шеърларида туйғу мислсиз жозиба билан ифодаланган...» Ушанда Эркин Воҳидов яна «Мен нечун севаман Ўзбекистонни» ва «Муножот»ни тинглаб»ни ўзбек шеъриятининг энг ёрқин намуналаридан бўлиб қолади, деган эди. У сўзлар айтилганига ҳам мана чорак асрдан ошиб кетибди.

Абдулла Орипов бу вакт ичидә түйғулар кишиваридан туриб, дунёга довруқ солди. Ҳалқнинг севимли шоюри бўлиб, унинг тили бўлиб сўзлади, ёэди. Унинг маъсум шеъри мушкул замонларда мухаббатли маъсум юраклардан жой олди. Мушкул, оғир йўлларда ўз содда ўзбеконалиги ва маъсумлигини сақлаб қолди.

ШАМ ВЛ БУРОН

Мантиқ илмига шак келтирмоқчи эмасман. Ақлли одамлар ҳар нарсадан мантиқ қидирадилар. Дунё, одам ҳаётининг қурилиши ва равишларини мантиқ асосига қурмоқчи ёки оз деганда мантиқ қондалари билан тушунтирмоқчи бўладилар. Бир жиҳатдан тўгри қиласидилар.

Лекин ҳаёт бошқача...

Мантиқ бошқача...

Ҳар қандай темир мантиқ ва ёки ҳиссиятга чулгаброқ айтадиган бўлсан, ҳар қандай улуг мантиқ охироқибат мантиқсизликка бориб тақалади. Мантиқсизлик билан тугайди. Ёки мантиқсизлик вайронасига олиб боради. Айтайлик, дўстликдай улув нарса кам. Лекин дўстлик эркензга эрк берадими?

Байнамиллаллик ажойиб тоя! Лекин байнамиллаллик эрксизларга эрк беринга қодирми? Байнамиллаллик нандай тарзда бўлмасни ўзини қон тўкишлардан тўхтатиб туроладими? Ҳар қандай қон тўкишларни инқоблайдиган доғули бир равиш бўлмайдими унда?

Одам беҳад ноёб ҳилқат. Рўйи замини унга чекенз бир вақтга боғ тариқасида тортиқ этилган. Бу боғ шунчалар гўзалки... шунчалар сермеваки... лекин одам болалари бу боғга сиғмайдилар. Богда тўхтовсиз қон тўқадилар. Ўзларига неъмат қилиб берилган сара меваларни қон билан сугорадилар. Ўзларини ёқадилар. Нега? Нега одам ўзини ўзи ёқади? Умуман, исга келган одам дунёга? Ким жавоб беролади бу саволларга ва бу мантиқсизликларга? Неча минг йиллардан бери жавоб излайди инсоният. Ҳали яна исча минг йиллар излайди.

Абдулла Ориповнинг файласуфона ҳикматли рубонийларидан бирида шундай дейилади:

Бўрон, сен шам узра гувлайверма, бас,
Арслондек ўкириб чекаверма сас...

Шеърият жуда қадим замонлардан бери шам ва шамол ҳақида сўзлайди. Лекин Абдулланинг замонига келиб ҳамон шам узра шамол эсишдан тўхтамайди. Лекин Абдулланинг замонига келиб шамол бўронга айланган. Абдулланинг замонига келиб шам узра бўрон эсади. Одамзод бир чўпни ёқиб кечасини ёритган вақтлардан бери ўз умрини шамга қиёс қилади. Одамнинг ўзи ҳам шамга ўхшайди. Мен кечалари кўп кузатганиман. Кечаси одамнинг юзи шамнинг алангасидай оқариб кўринади. Одамнинг боини теграсида оқ аланганинг тожи ва сарвати бўлади. Бу шамнинг пилигини ким ёқади? Азалий сир. Ҳеч ким ечолмайди. Нега ҳаммага бир хилда баробар берилган ўлчовли шам ҳаммада ҳар турли ёнади? «Шамни ўчирмоқлик жуда ҳам осои, — дейди Абдулла Орипов, — Унга етар битта «пуф» деган нафас». Унда бўрон қайдан пайдо бўлди? У кимнинг иши? Бўрон ажалининг чалғисими барча шамларни қўймай ўчирадиган? Ёки унӣ одамзотнинг ўзи яратганни янгиланиб туриш учун? Шамол ва шам азалий зиддиятда. Уларнинг зиддиятини мантиқ билан тушуптириш ва англатиш мумкин эмас. Бу худди чексизликнинг мантиқсизлигидай мантиқсизлик. Лекин илсон ҳаёти шу мантиқсизликка айланган мантиқ асосига қурилган.

Лекин шамнинг қудрати бўрон қудратидан кам эмас. Шунинг учун Абдулланинг шеърида шам узра бўрон эмас, бўрон ичра шам гувиллаётгандай туюлади менга.

Шам ва шамол зиддияти бир чеккаси шоир билан замони зиддияти. Мен ҳеч бир шоир кўрмадим ўз замони билан келишган ва муроса қилган. Шам жуда нозик, жуда ожиз. Лекин шам бўлмаса бўронни тушуптириб бўлмайди. Одамнинг ўзини ёқишидай улуғ фожна ва улуғ мантиқсизлик йўқ дедик. Лекин шоир ўзини ёқиб яшайди...

... Лекин шоир ўзини ёқиб яшайди. У мантиқсизлик қоронгуликларидан шам ёқиб маъно қидиради. У бўроннинг кайфиятини билмоқчи бўлиб уринади. Ўз умрининг алангасини бўронга тутиб кўради. Шамнинг оқ алангаси унинг азалий идеаллари. У бўрон бу идеалларни совуриб, емириб, тўзғитиб, гирдобга солиб айлантираётганини ўз кўзлари билан кўриб турди. Бўрон шамнинг алангасини ўчирганда, шоир ўзини ёқади. У бус-бутун ва битта алантага айланади.

Абдулла Ориповнинг шундай шеърлари борки,

уларда у ўзини ёққан. Яна шундай бир шеърлари ҳам борки, уларнинг сатрларида ва ёки биттагина сатрда ўзини ёққан. Шоир билади: ўзини ёқмагунча ўзини тушунтиrolмайди. Шоир ўзини ёққан шеър ёки сатр билан шоир бўлади. Шоир ўзини ёққан шеър ҳам сатр ҳеч қачон ўчмайди. Унинг хароратидан умидсизларга умид етади, чорасизларга чора топилади.

Шоир ҳамма шеърларида тафаккурининг чирогини ёқиб инсон ҳәтидан мантиқ қидиради.

Тафаккур башарга гарчи яловдир,
Нечук одам қавми одамга ёвдир... —

дейди у кейинги йилларда ёзган гўзал фалсафий шеърларидан бирида. Одам боласи нега одамга ёв? — деган савол каби жавобсиз. «Жавоб берар бунга на ер, на осмон, На Будда, на Зардўшт, на Инжил, Қуръон...» — дейди шоир. Лекин жавобсиз саволлар шеъриятни қийнайди. Жавобсиз саволлар доим шеъриятнинг кун тартибида. Шоир бу каби қийин саволларга жавоб бериш олий жозибанинг ихтиёрида ва иродасида деб билади. Инсониятнинг жавобсиз қолиб келаётган саволларини шоир ана шу Сирли Мұҳаббат ечишга қодир деб санайди. Кўп сирли саволларнинг сирли жавобларини Мұҳаббатдан қидириш Абдулла Ориповга хосдир. Абдулла Орипов мұҳаббат қутқаради, деб ишонади. Бу шунчаки қуруқ шоирона гап эмас. Абдулла бу фикрга ўсмир ҷоғида келган. Мұҳаббат қутқаради, деган фикр унинг эътиқоди. Ҳаёт унинг бу эътиқодини кўп синади. Ҳамон шу эътиқодида собит Абдулла Мұҳаббатга қанча ва қандай маъно юклайди. Назаримда биз ҳали шоир назарда тутган ёки туйган маънони англаб етмагандаймиз. Эҳтимол шоирнинг ўзи ҳам Сирли Мұҳаббат нималигини тўла ифодалаб беролмаса керак. Лекин унинг дилида бу Сирли Мұҳаббатнинг туйғуси ҳоким. У шу туйғунинг етагида юради. Шу охиригача англаб етилмаган, лекин ҳис қилинган туйғу билан дунёга қарайди ва унга баҳо беради.

Мұҳаббатга мантиқ керак эмас. Абдулла Мұҳаббатни олий Адолат деб тушунармикин? Олий Адолатга ҳам мантиқ керакмас-ку! Мұҳаббат олий Ҳакаммикин? Олий Ҳакамга мантиқ керакмасми? Олий Ҳакам она бўлса агар, албатта, унга мантиқнинг ҳожати йўқ. Лекин ҳакамда адолат қолмаган ерларда Мұҳаб-

бат қақшаб туради. У муҳаббат аргимчогини эмас, ажал аргамчисини қидиради.

Қанчалик ирода, қанча күч керак,
Нораво Ватани севмоқлик учун.
Қанчалик ирода, қанча күч керак,
Норасо элга сўз демоқлик учун.
Буларнинг баридан бўлмоқ-чун холос,
Икки газ аргамчи етгайдир холос.

Сирли Муҳаббатга умид боғлаб бўлмай қолганда шундай фожиали сатрлар ёзилармикин?

Фуқаро ва шоир шундай хуласага келган мамлакат ўзининг тақдирини бошдан оёқ ўйлаб кўриши зарур.

Абдулланинг шеъри ана шундай мамлакатлarda куч олиб турган бўронга қаратади: Тўхта, ҳой, одамнинг шамини учирашиб қўйма! — деб тўхтовсиз нидо қилмоқда.

ҲУЖЛАРДАГИ СУВРАТЛАР

Оҳқим бўйнумда занжири жунун маҳкам ҳануз.

Навоий.

Яшамоқ осон иш эмас. Мушкулликларимиз кўп. Ўйларимиз — оғир ўйлар. Қарамликни бир неча авлод ўз елкасидан кейин келаётганлар елкасига чўнг юқ қилиб ўтказиб келди. Ернинг ҳукми, осмоннинг ҳукми деган гап бор. Бу эҳтимол ғайбий ҳолдир ва уни балким тушуниб, тушунтириб бўлмас. Лекин элнинг бошига тушган қийин — жуда қийин — қийиндан қийин савдодан қутулишга шу ҳалқнинг ўз табиий кучлари етмаса, унинг ер ва кўк ҳукмини кутишдан ўзга чораси қолмайди. Қазода битилган ҳамма ишлар бўлади. Ернинг ва кўкнинг ана шундай ҳукми билан биз қарамлик юкини кўтаргани охирги авлод бўлдик. Бу адоқсиз кулфат бизда тўхтасин. Барҳам топсин. Эндиги наслларга ўтмасин. Конотнинг ўзида янги эра бошланяпти.

Ҳа, ҳаёт осон иш эмас. Одам қўлга қалам олиб таскин ва юпанч сўзлар ёзгиси келади. Ўз-ўзини овтишини истайди. Оғирчиликлар юкидан эзилиб, караҳт бўлиб ётган миямиэни эринчоқ, ва узун сўлишли қўшиқлар билан аллалашни нечоғли яхши кўрамиз!

Жуда узоқ давом этган тушкунлик замонлари ҳатто қўшиқларимизни ҳам, яна қайтараман, эринчоқ,

сўлғин, сўлим қилиб қўйди. Юрагимиз эзгин қўшиқларни ёқтиради. Ҳар дам-ҳар дамда эзворадиганидан бўлсин деб турамиз. Ёлғонми ё? Ҳолбуки қўшиқ қонга гайрат ва шижоат багишлаши, уни жўмардлик тўлқинлари забтнга олиши керак!

Гайрат отига миндирадиган қўшиқларимизни унуганмиз.

Эркни Водид қарамлникнинг моҳияти устида бораётган сұхбатда:

— Илон чаққан одам қўрқади. Ҳеч қачон илон ваҳмидан ва унинг заҳри зараридан тўла қутулолмайди. Қўрқинч унинг жонида яшайди. Ҳумайраларида сақланади. Ҳаётда, унинг турли ҳолатларида бу ўзини дам-бадам билдириб туради. Мана шундай, ҳужайраларимиз қарамлик асоратларига тўлиб кетган... Шу асоратларни ҳужайраларимиздан бирма-бир чидам ва қатъият билан сурисиб чиқармасак, миллатимизни бунгунги ва эртанги халқаро майдонда намоён қилишимиз қийин кечади...

Шоир сўйларкан, ҳужайралардаги асоратлар ҳақидаги аламли ўйлар менинг тасаввуримда сувратларга айланарди. Қарамлик сувратлари. Қарамлникнинг ҳужайралардаги сувратлари...

Ҳужайрамиздаги бир суврат: эзгинлик, бизнинг эзилишга мойиллигимиз. Бу нарса миллатнинг генида йўқ эди. У кейинги уч юз йил ичида пайдо бўлди. Урчиди. Ўтган юз йилликда ва кейинги юз йилликда кетма-кет икки маротаба мустақилликни йўқотиш оқибатида эзгинлик одатий ҳол тусиға кирди. Ҳар икки қарамлик чоғида ҳам эзгинлик ғоятда маъқулланар ва ҳар томонлама рағбатлантаришлар эди. Ҳамма не кўрмасин, рози эди. Ҳамма не ўтмасин, шукур қилар эди: қорнимиз тўқ, устимиз бут... яна нима керак битта беданага... Лекин эзгинлик халқининг ўқ томонидан шижоатни тамомила кесди. Ҳар томонлама шукурчилик, инш ушогига сажда қилиш — эзгинликнинг тўла ғалабаси эди. Бу нарсанинг номини халқнинг асил фарзандлари билар, лекин билғанлар дамбадам маҳв этиларди. Сўнг билғанлар ҳам алоҳа жим бўлдилар ва бутунлай билмагандай бўлдилар. Фақат тўқсон биринчи йилга келиб шоир биэга бу ҳодисанинг табнати ва моҳиятини топиб, тушунтириб берди:

Билмам қандоқ, не сабаб, қачон
Ҳаётингга ошно бўлган ул —

Боши эгик, бесүз, бейсён Юрагингда макон тутган қул...

Бу сўзлар жуда кескин, аёвсиз, яланғоч! Лекин улар шу ҳолатда ҳам барибир Эркин Воҳидча андиша ва Эркин Воҳидча назокат билан айтилмоқда. «Қулмиз», «қул эдик», «гадо эдик» каби формуалалар тушкунлик замонларимизда кўп айтилди. Биз бунга ўргандик. «Қул» эзгин табиатимизнинг аъзоси бўлиб қолди. «Йўқ, қул эмасмиз!» — деб ҳайқириб чиққан пайтларимизда ҳам, барибир бунинг тагида «э, асли ўзи қулмиз-да...» деган тан бериш яшириниб ётарди. Ёлғонми ё? Шу жиҳатдан шоирнинг фикрида янгилик йўқдай туюлади. Лекин... эътибор беринг: шоир қулсан! — деб ўқувчисини бурдалаётгани, эзаётани йўқ. Бундай қилиш учун шеър ёзиган ўтиришнинг кераги йўқ эди. Шоир ўз халқининг фарзандларига қарата қулсан! — деб айтишни буюк ҳақорат деб билади. У ҳатто хаёлида ҳам бунга йўл қўймайди. Одам азалдан озод. У ер ва коинот ҳукмида. Шоир шу озодликка эътиқод қилади. Одам ва эл тақдир тақазоси билан қарам ҳолга тушиши мумкин. Қарамлик — ҳақорат. Қарамлик — иснод. Шоир буни инсон учун муваққат, вақтинчалик бир нарса деб билади. Қарамлик табиатга айланиши мумкин эмас. Алҳазар! Бинобарин, шоир қулга эмас, озод инсонга мурожаат қилади. Айни пайтда ҳам озод, ҳам қул бўлиши мумкини инсон?! У азалда озод! Лекин шароит унда қуллик иллатларини ростлаган бўлиши мумкин. Узоқ вақт мобайнида қуллик шаронтида яшаган одамларда иккинчи бир табнат пайдо бўлади. Иккинчи бир ўзлаштирилган қиёфа.

Бу қиёфани фақат қўрқинч ва унинг ажralmas йўлдоши эзгинлик шакллантиради. Тўғрироги, қўрқинч ва эзгинликнинг ўзи тугал товланувчан қиёфага айланади. Қўрқинч ва эзгинлик эса юракда макон тутади. Юрак ҳиссиётлар учоғи. Қўрқинч ва эзгинлик эса ҳам муҳофаза қилувчи ва ҳам барбод этгувчи ҳиссиётлардир.

Шоир ана шу юракда макон тутган қулга мурожаат қилади. Бу қул гоятда хавфли. Чунки у ўз имкониятидан фойдаланиб барча томирлар ва барча ҳужайраларни ишғол қилади. Шоир, қаранг, унинг эзгинлигини қандай ифодалаяпти: «боши эгик, бесүз, бейсён...» Юракда макон тутган қулнинг қўрқинчларидан ҳужайраларда тинимсиз сувратлар нақшланади.

Қуллик ҳиссиётнинг фарзанди экан-да аслида!

Оғир ижтимоий бу шармандалик ва ҳақоратнинг келиб чиқиши қудратлининг заиф устидан ғалабаси натижаси эмас, ҳиссиётнинг сустлиги экан-да! Ё ёлғонми? Босқинчилик фақат бир ташқи тасодиф, баҳона, холос. Босқинчи бизнинг ҳиссиётларимиз заиф бўлию қолганлигини зидан ўрганимаганда ва ўзининг осон зафар қозонишига ишонмаганда эди, бунчалар қароқчиликка бормаган бўларди. Шоирнинг гапи юз бора ҳақ ва бениҳоя топиб айтилган гап:

Қуллар ичра энг бечораси
Юрагингда макон тутган қул...

Бу сатр ҳужайрамиздаги битта суврат. Замон-замонлар оша бу сувратдан бошқа ина ўнлаб сувратлар туғилган. Ахир қўрқинч одамнинг юрагида нималарни бунёд этмайди дейсиз?

Юракни эгаллаган бу энг қаттол мустабиддан шоир наздида фақат унинг устидан кулибгина қутулиш мумкин. Кулиб уни юракдан қувиш мумкин.

Юрагида қул макон қурган фуқаролар истиқомат қиласиган мамлакат ва жамият оғир бемордир. Чунки юракдаги қул ҳеч қачон ҳақиқатдан манфаатдор эмас. У турлича вазиятларда турлича турланишга одат қилган. Империя манфаатлари тўхтовсиз турланишга мажбур этади. Шоир «Диагноз» деган шеърида бу манфур турланишнинг қанчалар шафқатсиз ва ғайри инсоний бўлганлигини кечаги кунларимизда рўй берган ҳодисалар замирида кузатади. Утмиш зўравон тузум шароитларида далада қулдай ишлаётган кишилар ҳатто касал бўлишга ҳақли эмас эдилар. Қатли ом даражасида ўта заҳарли дорилар табиат ва одамлар бошидан тўхтовсиз сочиларди-ю, лекин касал бўлишга дехқоннинг ҳақи йўқ эди. Дехқонлар ўртасида авж олган сариқ каби касалликлар яширилар, улар ҳақида ёзган одам балога қоларди. Диагнозни Ўзбекистон бўйлаб врачлар эмас, «райком бовалар» қўядилар. Тўғри диагноз қўйган врач райкомнинг ғазабига дучор бўларди. Эркин Воҳидов шеърида шундай «райком бова»лардан бирининг қичқириғини эшитамиш:

«Сиёсий онг қани,— дейди у,—
Дехқон соғлом!
Дехқон — чавандоз!
Далада йўқ заҳарлик дору,
Диагнози шамоллаш деб ёэ!»

Бу гапларни дунёда ҳеч бир кимга айтсангиз, ҳеч бир ким ишонмайди. Бу нима дегани? Ростдан ҳам, шундай бўлиши мумкинми? Ростдан ҳам диагнозни врачлар эмас, аллақандай «райком бова» — лар қўйиши ва бунга одамлар тоқат қилиб ўтириши мумкинми? — дейди. У билмайдики, бундай нарсалар бўлиши мумкин ва ҳатто оммавий тус олиши мумкин ва одамлар ҳам буни ўзи шундай бўлиши керак деб қабул қилишлари ажабланарли эмас. Акс ҳолда чорак аср давомида халқ ўз бошидан заҳарли дориларни сочиб юришларига лом-мим демай қелармиди? Нега шундай эди? Бу ажаб тилсизлик-нинг сир-саноати қаерда? Бунинг сир-саноати жуда узоқларга боради. Бу ишларнинг отаси дунё қурилишининг тўғри фалсафасини ўзича нотўғри ҳисоблаб, унинг оёғини осмондан қилиб қўйган эди. Тарихдан бизга яхши маълум тоифа бу оёғи осмондан келтирилган фалсафани ўзига қурол қилиб олди. Шундан эътиборан улар ўзлари қўл урган ишларнинг барини оёғини осмондан келтиришга киришдилар. Оlamda террорчилик, босқинчилик, ёлғончилик сингари манфур қиёфаларни олижаноб сўзлар ва ғоялар билан ниқоблаш, одамларни оёғи билан эмас, боши билан юрадиган қилишга уриниш авж олди. Улар ўзларига тўғри келмаган ҳамма нарсалар ва барча одамларни зўр бериб қоралашга, таҳқирлашга, инсонлик шаънини ерга уришга, ўз ҳокимиятига андак бўлсин хавф солган шахсларни дарҳол қуритишга киришдилар. Мана энди, тарих саҳнасига янги кучлар чиқиб, улар дунёни ўз табиий тараққиёт йўлига қайтаришга не-не куч-гайрат сарфламоқдалар. Лекин шунча фожиали ва аччиқ тажрибалардан кейин ҳам ўша маълум тоифа ҳамон дунёни ўз ёлғон-яшиқларига буркашга уринади, ҳамон ҳалқлар устидан ўз даҳшатли ҳокимиятини ўрнатиш учун минг турли найранглар ичида товланади. Яна жаҳонни туганмас ғалвалар ва қон тўкишлар чоҳига ташлаш тадорикини кўради.

«Райком бова»нинг бизга шунчалар таниш дўқ-пўписаларида ўша оёғи осмонда юрган тоифанинг феъл-атвори мужассам. У инсонпарварлик тимсоли. Лекин аслида унда инсонпарварликдан зарра йўқ. «Сариқ касал кўпми? Қамайтири, — деб давом этади «райком бова» врачга қарати, — чорани мен эмас, ўзинг топ, Мен эмас, сен докторсан, ахир, ўқиш керак газет ва китоб»... Бу ерда тоифанинг макр ва найранглари аниқ илғаб олинган. Кўринг, у «сариқ ка-

сал кўп бўлса, камайтириб ёз» деб амр қила туриб, яна бунинг аччиқ масъулиятини бечора врачнинг устига ағдаряпти. «Сен докторсан» деб заҳарханда билан писандада қилияпти. Унинг ўзи эса ҳеч қачон ҳеч нарса учун жавоб бермайди. Ахир улар инсоният бошига не-не фожиаларни солмадилар. Лекин биронталари жавоб бермадилар-ку! «Райком бова»лар доим авомни газет-китоб ўқишга ундар эдилар. Лекин газет-китобларда уларнинг тўнтирилган ҳақиқатларидан ўзга ҳақиқатлар ёзилмас эди. «Райком бова» буни яхши билади. Газет-китоб рўпарасидаги одамни унинг қўлига янада маҳкамроқ бօглаб беради. Бу томондан «райком бова» бехавотир. У дадил «китоб ўқи» деб айтаверади. «Бова»нинг кўрсаткич бармоғи ҳавони қилинчек кесади. Унинг тили эмас, даҳшатли кўрсаткич бармоғи сўйлаётганга ўхшайди: «Не ёзилган анув шиорда? «Пахтазор — бу жанггоҳ», бўлсин ёд! Дард саналмас ёмгиру қорда Пахта териб орттирилган бод»... Мана шу тоифа урчитган ижтимоий оғир дарднинг асоратлари ҳали ҳанузгача ҳужайраларимизда яшайди. Қўрқинч, ваҳима бўлиб яшайди. Шоир жамиятнинг бу дардларини айтишга журъат этади. Ҳаёт ҳужайрасидаги суратларни шеър ҳужайрасига кўчиради. Ҳаёт аламлари шеър аламларига айланади.

Ҳужайралардаги бу бузилишнинг охири борми?

Бу аянч суратлардан тезда қутулиб кетиб бўладими? Наҳот уларни фақат ўтқир қаҳқаҳа билан ҳужайралардан қувиб чиқариш мумкин? Қаҳқаҳа ўз ўрнида дуруст. Лекин асоратлардан фақат бугунги илфор жаҳон цивилизацияси сари шитоб билан қадам ташлаш билангина халос бўла оламиз. Бизни ҳужайраларимиздаги ўтмиш асоратлар ва дардли эзгин сувратлардан фақат ва фақат цивилизациягина қутқаради. Бизнинг бир катта ютуғимиз бор. У ҳам бўлса, кўп нарсаларни ўзимиз учун қайта кашф қилишга вақт сарфлашимиз шарт эмас. Тайёр жаҳон тажрибаларини тез ва пишиқ ўзлаштиришнинг ўзи кифоя. Ўйлайманки, халқимизнинг идроки бунга етади.

Демак, «юрагимиизда макон тутган қул»нинг ҳужайраларидаги бир гурӯҳ гурфа сувратлар империя шароитида авж олган мунофиқликдан пайдо бўлган. Бу мунофиқлик унча-мунча эмас. У бутун бир тузум ва ҳодисага айланган. Унинг ўз фалсафаси бор. Бу фалсафани эндиликда ибрат учун ҳар томонлама ўрганиб чиқиш зарурати бор.

Шоир ўтмишдан мерос ҳужайраладаги сувратларни чизаркан, жамият дардлари ва фожиаларидан фақат «райком бова»ларни айблашдек осонгина йўлдан бормайди. Албатта, бу фожиаларга тоифа бошлади. Лекин уларни ҳалқ баравар бошдан кечирди. Шунинг учун шоир мунофиқлик фалсафасидан туғилган ҳужайра сувратларда ўз элининг шоири сифатида улуши борлигидан кўз юммайди. Айбнинг бир қисмини ўз бўйнига олади. Шоирнинг қайта қуриш йиллари ёзилган кучли эҳтиросга эга шеърларидан бири «Савағич» воқелигимизнинг жуда катта ва ўткир ҳақиқатларини қийма сатрлар воситасида ўртага ташлайди ва чунончи шоир шиддатли дард билан шундай ёзади:

Мени ур, пахтани
Куйлаган мемман.
Эртаю кеч уни
Ўйлаган мемман,
Оlamга мақтаниб
Суйлаган мемман,
Пахтада не гуноҳ?
Савала мени!

Ҳаммамиз гувоҳмиз: урушдан кейинги ўтган барча йилларда Ўзбекистонда пахта психози (васвасаси) ўта даражада авж олдирилган эди. Шу психоздан гаранг ҳалқ ўз ҳолини ўйлашга вақт топмас, фақат тезроқ териб топширсам, қутулсам, тезроқ эксам, қутулсам дерди. Шоир ишувасасанинг (онгли сувратда уюштирилган психоз) бир чеккасини тилга олиб ўтяпти. Унинг ўзи ҳам бу васвасадан четда турган эмас: «Уни мадҳ этмоқнинг моҳири ўзим, Мадҳимга ишондим Охири ўзим, Турғунлик даврининг шоири ўзим, Пахтада не гуноҳ? Савала мени!» Империянинг ҳужайраларимиэга сингдиргаш сувратларидан бири ҳам ўзи шу: мақтанчоқлик ва мақтовбозлик! Бу икки нарса бир қарашда зарарсиз, беозор бир нарсага ўхшайди. Лекин аслини олиб қарасангиз, у соғлом фикр юритиш, соғлом баҳо, бир сўз билан айтганда, реализмдан четлаштиради.

Шоир тўнкарилган фалсафа ва шунга яраша тўнкарилган мафкура боис ҳужайраларимида ясалган сувратларнинг бутун ранг-баранглигини ғоят маҳорат билан чизади. Тўнкарилган фалсафадан ҳатто унинг турғунлик йиллари дунёга келган машҳур қаҳрамони Матмуса ҳам бенасиб қолмаган. Матмуса — тўнкарил-

ган мафкуранинг халқона суврати. Унинг, айниқса, давримизга хос «кашfiётчиликка» берилиб модадан орқадан қолмаслик учун «Америка очиш»га бел боғлагани ҳақидаги ривоят бениҳоя жозибали. У Американи янги йўлдан очиш қасдига тушади. Донишқишлоқ ўртасидан ерни кавлай берсак, албатта, тўғри Америкадан чиқамиз деб ўзи ва ҳамқишлоқлари миясига сингдиради. Донишқишлоқ шаҳд билан ҳандақ қазишига киришади. Ва... кўп ўтмай гуллаган қишлоқ тўда-тўда тупроқ уюмию «қурбақазор ботқоққа» айланади. Донишқишлоқ номи ҳам Мингқудуқ деб ўзгаради. Лекин Матмуса ўз даврининг ҳоким тамойилларини яхши ўзлаштириб олган: у йўлидан қайтмайди. Бу йўлни ҳақ йўл деб билади: «Халқ уни ташлган бас, Демак, у халқ йўлидир»...

Коммунистик сувратлар Матмусанингки қонига ўтган экан, демак, касал жуда оғир.

Миллий ҳаётни коммунизмга қурбон қилишнинг қуюқ манзаралари ана шундай. Тўнкарилган фалсафанинг энг даҳшатли жиҳатларидан бири ҳам. ҳаётнинг, санъат ва бадий адабиётнинг мазмунидан миллийликни тутал суриб чиқаришга уринниша эди. «Соцреализм»нинг мудҳиш қоидаларидан бири «Шаклан миллий, мазмунан социалистик» формуласи тамомиля шуйга қаратилган эди. Аслида бу чинакам тўнкарилган қоидалардан бири. Аслида санъатда шакл эмас, мазмун миллий ва умуминсоний бўлиши зарур. Бу тескари қоида кўп замонлар бутун санъатни тор доирада чеклаб ташлади. Санъаткорлар бу доира ичida ўзларини тўла ва тутал намоёни қилолмадилар. Қонда эркни ижодий такомил йўлини тўсди.

Санъатда бирон бир усулни гегемон даражасига кўтариш ва қабул қилиш ўта ғайри табиий ҳол. У санъатда узлуксиз бузилишларга сабаб бўлади. Санъат реализмни севади. Санъатнинг ўта модерн турлари ва йўналишлари ҳам ҳатто реализмдан узоқлашиб кетолмайди. Модерн реализмнинг чегарасиз бойлигидан бир нишонадир. Ҳар бир санъаткорнинг ўз реализми бор. Реализмнинг ўзига хослиги бор. Реализмнинг бепоёнлиги шунда.

Хужайраларимизда ин қурган нобоп сувратлардан қутулармикинмиз? Бугунда бу савол бениҳоя актуал. Унга ҳар бир Ўзбекистон фуқароси ўзи жавоб берниши керак.

Чунки кечагина юракларимизни ўртаган истиқлол

биз учун етиб бўлмас, саробга чулғанган ғоя эди. Факат ғоя!

Бугун у гоядан реалликка айланди. Истиқлол ҳаётимиз па таржимаи ҳолимизга кириб келди.

Истиқлол энди менинг назаримда ғоя эмас, одам!
Ха, истиқлол-одам.

Чунки одам бўлмаса, истиқлол бўлмагай. Одамгина истиқлолни барқарор куч ва ҳодисага айлантиради.

Ўзбекистонда ҳар бир одам истиқлол-одамга айланишини орзу қиласман. Шундагина боболаримиз бош қўйган барча орзулар ушалади.

Эркин Воҳидовнинг қаҳрамонида мен шундай истиқлол-одамни кўрдим ва уни кутладим. Озодликнинг зафари ёр бўлсин сенга, эй ўзбекнинг ориф ўғли!

ИККИ ҲАЙРАТ

Чингиз Айтматов асарларида мени ҳайратга соладиган ҳодисалар кўп. Шулардан иккитаси ҳақида сўзлашни истар эдим.

Айтматов асарларидаги БЕГУБОРЛИКНИ дунёда қайси адаб билан қиёслаш мумкин. Назаримда Айтматовга яқин бегуборлик фақат Тагор ва Кавабатадагина бор. Мен буни космик миқёсга кўтарилган бегуборлик дегим келади.

Айтматов асарлари инсон трагедияларига тўла, улар трагедияга учраган БЕГУБОРЛИКЛАРДИР. Агар бу ҳодисалар бегуборлик бўлмасайди, улар фожналарга учрамасди.

Бу бегуборликнинг эгаси худди болаларга ўхшаган одамлар.

Боладай тоза туйгули одамлар.

Трагедияларнинг бош манбай эса сталинизм яратган тарашадай қаттиқ ва шафқатсиз партия бюрократизмидир. Сталинизм, унинг бюрократик аппарати бу сегизбоевлар, қашқатоевлар, қўчқорбоевларгина эмас, бу улар яратган даҳшатли қурол — одамқурол — обержандаловлар, бозорбойлар, абакирлар, ўрозқуллардир.

Бюрократизмнинг тагидан трагедиялар қайнаб чиқади. Бу трагедияларнинг қурбонлари ҳур фикрли бегубор кишилар. Улар ҳур фикрли, бегубор бўлганлари учун ҳам бюрократиэм аппаратининг турли найранг ва маккорликларига қурбон бўладилар. Жамила бегубор бўлмаса, ҳали унинг элатидан ҳеч ким

енгиб ўтмаган расм-руслық, одат түсиқларини ҳур фикр билан инкор этиб ўтармиди? Тұлғоной бунчалар бегубор-бұлмаса, келини Алиман бегона одамдан бүйлик бұлғанда, уни кечириб, кечирибгина эмас, унга бекінес бир меҳр билан қараб, тушуниб, бағрига босармиди, одамларнинг гап-сўзларини матонат билан күтарармиди? Қайси адабиётта таҳлил этилган эди бундай умуминсоний, космик миқёслар касб этадиган бегуборлик?

Келажак учун Кирик деган болани омон сақлад, ўзларини фидо қылғанларнинг бегуборлиги-чи? Янги худо яратиш йўлида болаларча чалкашиб кетган ва тузалмас одамларни тузатиш йўлида фидо бўлган Авдийнинг бегуборлиги-чи?

Едигей бегубор эмасми? Уркунчиев бегубор эмасми?

Гулари, Қоранор, Акбара, Тошчайнар бегубор эмасми?

Бюрократлардан ўзга ким бегубор эмас Айтматов асарларида?

Шу бегуборлик тортмадими бутун дунёning эътиборини унинг асарлари, унинг қаҳрамонлари ва кейинги асарларида унинг космик кенгликтаги фалсафасига?

Танабой бегубор эмасми?

Танабой деганда бошқа бир нарсани ҳам айтиши керак.

Нега Танабой каби пок, бегубор одамлар азоб ўти ичиде доим қовурилиб ётадилар?

Танабойларнинг тилсизлiği ҳайратта солади. Эснингиздами, Сегизбоев уни нималар қымлади? Душманга, жиниоятчига чиқаради. Туҳмат ёғдиради. Ва Танабой шу дағдага, шу даҳшатли туҳмат қошида бирдан ожиз бўлиб қолади. У ўзини ҳимоя қилолмайди. Барча туҳматларни тан олади. Қаршилик кўрсатишга озгиниа бўлсин уриниб кўрмайди. У Сегизбоевнинг кимлигини билиб туриб, ҳаммасига кўнади. Бўйнига олади.

Бу тилсизлик, бу забонсизлик, бу индамасликни ким қаердан келтириб чиқарди? Ким тарбиялади бу умумиқёс касб этган индамасликни?

Бу космик миқёслар ИНДАМАСЛИК Танабойгагина эмас. Бўстон Уркунчиевга ҳам хос. Лекин Танабойга нисбатан унда андак ўзгариш бор. У эътироз билдириш, ўз фикрини айтишига журъат этади. Лекин барибири охир-оқибат у Қўчқорбоев олдида ожиз ва

индамасдир. Құчқорбоев уни ютиб юборишга тайёр бўлиб турибди.

Бу индамаслик Мўминда йўқми? «Оқ кема»даги Мўминда?

Уроқул олдида ожиз ва индамас бўлиб қолмадими Мўмин?

«Асрға тенг кун»нинг бош трагедияларидан бири эмасми шу ИНДАМАСЛИК! Эҳ-ҳе, бу индамаслик!

Унинг илдизлари ғоятда чуқур ва ҳайратомуздир.

Яна бошқа бир нарса ҳам ҳайратга солади одамни. Чингиз Айтматов қаҳрамонларининг бу индамаслиги асло УИЛАМАСЛИК эмас! Танабой жуда фаол ўйлайди. Гарчи у зулмга қарши боролмаса ҳам, лекин ўз олдига, турмуш олдига кескин саволлар қўяди. Унинг психологияк дунёси жуда мураккаб. Бу мураккаблик илк марта Тўлгоной образида куртаклаган эди. Тарапойга келиб психологизм актив тус олди ва ҳар қачонгидан теранлашибди. «Нега энди ҳамма ишдан путур кетяпти? — деб ўйлайди юзлаб қўйлари кирилиб кетаётган Танабой. — Балки бошқа йўлдан кетишгандир? Эҳтимол янгилишишгандир? Йўқ, бундай бўлиши мумкин эмас! Таилаган йўл — тўгри йўл эди. Бўлмаса, нега бундоқ бўлди? Адашиб қолишимикин? Йўлдан озишдимикин? Қачон ва қандай юз берди бу аҳвол?»

Янги ҳаётнинг равнақи учун курашган, шиорий ақида учун ҳатто акасини сургун қилиб юборган Танабой мана энди Сегизбоевлар яратган бюрократик машина даҳшати олдида лол бўлиб туради. Сегизбоевларни ўзи яратганини англамайди. Улар ўзининг онгизлиги ва бегуборлигидан ўсиб-униб чиққаплигини тушунмайди.

Ҳа, Айтматов индамасларининг бегуборлиги ҳайратга солади. Тарапойгина эмас. Тарапойнинг дўсти парторг Жўра ҳам индамас. Жўранинг юраги яхшилик, эзгулик билан тўла. Лекин индамас. Унинг бюрократияга қарши кураш қуроли йўқ. Кураш иродаси ҳам йўқ. Қанчадан қанча жўралар халққа қилишлари мумкин бўлган яхшиликни қилолмай кетдилар. Мени Жўранинг шамдай сўнгани ва сўнаркан, партия билетимни Танабой райкомга олиб бориб берсин деб васият қилгани ҳайратга солади. Ахир кечагина ўзи ҳам истаб-истамай ҳисса қўшиб Танабойни беайб партиядан ўчиришган эди-ку! Қаранг энди ўлаётib, ўз билетини Танабойга васият қиласди! У романтикми! У аҳ-

волни билмайдими? Унинг билети билан ҳеч кимнинг иши йўқлигими англамайдими? Яна ўша феномен: БЕГУБОРЛИК! Шу бегуборлик туфайли биз яна бир шафқатсизлик ва бир лоқайдлик, инсон қадрсизланганлиги ҳодисасига дуч келамиз. Но-не хаёллар билан ўлган дўстининг билетини кўтариб райкомга келган Танабой билетни топшириб дарчанинг тақ этиб ёпилганини эшитади, холос. Сизга ёқадими бу қадрсизлик?

Сизга ёқадими бу бегуборлик?

Айтматов социал бузғунчилик оқибатларини ана шундай ҳоллар билан кўрсатади. Бегуборлик қадрсизлик саҳросида тилка-пора бўлиб ётади ва юрак-бағри қон ИНДАМАСЛИККА айланади...

ОРОМСИЗ ДУНЁДА

Ҳозир пайдо бўлаётган энг яхши асарлар бизни янгидан-янги ғоялар оламига олиб киряпти.

Инсоният қаерга кетяпти? Шу кетишда қаергача боради? Айтматов «Кунда» романида мана шу саволга жавоб топишга уринади. Қийин савол қўяди. Қийин жавоб ахтаради. Тўғрироғи, Айтматов шу қийин саволни қўядиңу жавобни одамларнинг ўзларига ҳавола қиласди. Ҳар ким бу саволга ўзи жавоб топсин.

Роман босилиб чиққач, матбуот саҳифаларида шиддатли ва кескин баҳслар бошланди. Уларда фоятда қарама-қарши фикрлар, мулоҳазалар ўртага ташланди. Айрим кўзга кўринган адабиёт деб атадилар. «Кунда» янги замон классикасини бошлаб беради дедилар. Бошқа бир тоифа адабиётчилар эса «Кунда»нинг фақат темаси янгилик. Турғунлик туфайли адабиёт ва санъат бундай темаларни ишламаган ва ҳатто уларнинг яқинига ҳам йўламаган эди. Ана, «Мастер ва Маргарита» неча ўн йиллаб босилмай ётди... Бошқа бир тоифа қаламкашлар эса «Кунда» тарқоқ асар, асарнинг учала қисми бир-биридан ажralиб қолган, асарга Аристотель айтган бутунлик ва узвийлик етишмайди, деб айтдилар. Сергей Аверинцев каби йирик филолог олим эса, Айтматов насронийлик, Инжил ва Исо темасига қўл уриб нима қиласди, бу темалар Шарқ ёзувчисидан йироқ дегандай писанда қилиб ўтди.

Холбуки, «Кунда»нинг жозибаси унинг кўтарган

темасида эмас. «Кунда» имон масаласини ҳозирги инсоният олдига жуда кескин ва ҳаддан ташқари фожизли қилиб қўйди. У имон йўлидаги ваҳший кучлар ва тўсиқларни аёвсиз реализм билан кўрсатди.

«Кунда»нинг жозибаси — имон ва имонсиизлик нима эканлигини ҳеч нарсани яширмай ошкора тасвиirlаб берганида.

Асар икки мингинчи йилнинг боши билан икки мингинчи йилнинг охирини туташтиргандай бўлди. Айтматов имон учун икки минг йиллик курашнинг мазмунини шу кичик асарга жойлаштириб беролди. Ҳамма халқларнинг ўз авдийлари, ўз бўстонлари, ўз исолари, ўз акбаралари, ўз қўчкорбоевлари, ўз бозорбойлари бор. Ҳамма халқларнинг маданий тарихлари марказида имон учун кураш туради.

Имон жаҳондаги барча халқларнинг тарихларини бир-бирларига яқинлаштиради.

Имон учун кураш — умуминсоний ғоядир. Үғирлик, порахўрлик айrim халқлар учун бутуилай тушунарсиз бўлиши мумкин. Лекин имон барча халқлар, барча одамлар учун тушунарлидир.

Имон одам боласини ҳалокатдан сақлади.

Имон бузилганда бунинг биринчи жабри табиатга тушади. Романда тасвиirlанган улуғ Мўйинқумдаги қирғин ва қувгин мана шу имонсиизлик туфайли рўй берди. Имонсииз муносабатлар туфайли она табиат оромсиз бўлиб қолди. Одамзодининг заминдан, шу сув, ҳаводан ўзга паноҳи йўқ. Бизнинг замонамизга келиб ана шу паноҳ ҳавф остида қолди. Замин, ҳаво, сув — одамнинг беписандлиги ва ақлсизлигидан титрай бошлиди. Қарант, Акбара ва Тошчайнар қандай паноҳсиз. Авдий паноҳсиз. Исо паноҳсиз. Бўстон паноҳсиз.

Ҳамма нарса гўё омонат. Ҳамма нарса гўё тубсиз зулмат чоҳ оғзиға келиб қолтан... Ҳамма нарса романда безовта титроқ ва харосонлик ичинда.

Авдий мұҳаббат ва халоскорликнинг юксак руҳий парвоzlарни ичидан яшайди. Гўзаллик, адолат, эзгулик мужассам оламларга биз Авдий тасаввурларига эргашиб кириб борамиз. Бўстон олами ҳам азалий устувор, иондай содда ва зарур маънавий олам, имон олами.

Авдийнинг бахти ва фожиаси унинг халоскорлигига. Ҳамма халоскорлар каби у кўр оломон билан тўқнашади. Шунда биз инсоният икки минг йил ичидан унчалик ҳам ўзгармаганлигига гувоҳ бўламиз.

Икки минг йил аввал халоскор Исони чормих қилганларидай икки минг йил кейин эзгуликка бошлаган Авдийни ҳам кимсасиз Мўйинқумда тириклай саксо-вулга осадилар...

Дунёнинг бир чеккасига кетган ўт, Акбара ва Тошчайиарни бехонумон қилган ўт — ниҳоят ер фарзанди Бўстоннинг мустаҳкам ва пок хонадонига ҳам етиб келади... ўзга ерларда бошланган ўт унинг этагига туташади.

Бу китоб фарёд чекаётган виждондир. Қанчалик оғир бўлмасин, инсоният унинг садосини тингламоғи керак.

ЕНГИЛГАН ГОЛИБЛАР

Айтматов асарлари ўттиз йилдан бери дунё ўқув-чисини тарбиялаб келяпти. У миллий орбитадан туриб умумжаҳон орбитасига кўтариолган ва ҳар бир асарини шу жаҳоний орбитада туриб ёзолган санъаткор. Арагондек мияси ва қалби бадиият фанининг дорил-фунуни бўлиб кетган кишилар «Жамила»ни ўқиб, мен дунё адабиётида бунчалар гўзал севги қиссасини ўқимаган эдим деб айтган экан, бу Айтматов асарлари жаҳонга мураббийлик қила олганидан бир белгидир. Бу ҳақда ўқиганман. Афинада бир грек шоири айтди: менга ва фақат менгагина эмас, барча ўқимишли грекларга Айтматов асарлари жуда яқиндир. Уларда ифодаланган тўйғулар, одамларнинг ўзаро миносабат, муомала йўсинлари бизга ғоятда тушупарлидир. Бу эшитганим.

Айтматов прозасининг кўкрагини эллигинчи йилларнинг иккинчи ярмида эсган тирик шабадалар кўтарди. Бу сталинизм бюрократиясининг жамики нарсаларни, ҳа, каттадан кичик барча нарсаларни, тегиши бўлган ва ҳеч қандай тегишилиси бўлмаган нарсаларни ҳам мафкуравийлаштиришга уринишига қарши исен эди.

Айтматовнинг илк қиссалари талабалик йилларинида бизни уйғотган эди. «Жамила», «Юзма-юз», «Бўтакўз», «Сарвқомат дилбарим», «Сомон йўли» «Алвидо, Гулсари!» — бизни қотиб қолган, тараққиёт йўлида даҳшатли тўсиқларга айланган дормаларни синдириш зарурлигига ўргатган эди.

Айтматовнинг барча соғдил қаҳрамонлари қотиб қолган фикрлар, қарашлар, эътиқодлар, одатлар,

расм-русларнинг азобиши тортадилар. Азобини том маънода тортиб туриб, шу догма қаравшлар, урф-одатлар, социал бузукликларга қарши курашадилар.

Жамила шундай қаравшларни мардона ёриб ўтмадими? Барча мумкин бўлган ва бўлмаган шармисорликларни ўзининг тоза муҳаббатига бағишламадими?

«Бўтакўз»да мурғаккина йигитча Камол ўз ишчилик қиёфасини йўқотиб, золимга айланган Абубакирнинг зуғум ва зўравонликларини ёриб ўтолмадими, ўзининг олижаноб қалби нималарга қодирлигини на-мойиш этолмадими? «Сомон йўли»даги Тўлғоной-чи? «Юзма-юз»даги Саида-чи?

Чингиз Айтматовнинг илк асарлари, илк қаҳрамонлари ҳақида гапиряпмиз.

Айтматовнинг бу қаҳрамонлари худди болаларга ўхшайдилар. Улар турмушнинг барча аччиқ-чучукларини кўрган ва тортаётган дунёнинг азобига ошна одамлар. Лекин уларнинг қалблари худди бола қалбидай тоза. Уларнинг хатти-харакатлари ҳам худди болаларнинг қилиқларига ўхшаб кетади. Ёвузлик, алдам-қалдам олдида ҳам улар мисоли болалардай буткул ҳимоясиздирлар.

Эҳтимол туркий халқларнинг юракларида, иш тутишларида шундай болаликка яқин хусусиятлар кўпдир. Айтматов бу болаликни хўп санъаткорона таҳлил қиласи. Чамаси, жаҳон ўқувчисини биринчи навбатда мафтун қилган белгилардан бири ҳам Айтматов қаҳрамонларининг ана шундай болаларча ёбеуборлиги, болаларча олижаноблигидир.

Айтматовга ўқувчилар «асарларингизнинг бари нега бунчалар инсон трагедиялари билан тўла» дейишиади. Айтматовнинг ўзи бунга «ахир ҳаётнинг ўзи трагедияларга тўлиб кетмаганми?» — деб жавоб беради.

Бу трагедияларда доим соғдиллик, болаларча бе-фуборлик, идеалларга ишонч билан партиявий бюрократизмнинг ваҳшийлиги тўқнашади. Аслида ҳам бу инсон фожиаларини бюрократизм келтириб чиқарган, тарих саҳифасига уларни бюрократия олиб чиқкан. Бюрократия инсонни ерга урмай яшолмайди. У инсонни дормаларнинг қули қилиш хисобига кун кўради. Бюрократга одам қанча қолоқ бўлса, онги паст бўлса, ўқимаса, ўсмаса, бир қолинда фикрласа, шунча яхши. Бюрократга инструкциялар ва фармойишлар, кўрсатмаларни оғишмай бажариб ўтирадиган қул керак. Унга асло ҳур фикр керак эмас, Ҳур фикрга у жон-

жәҳди билан қарши курашади. Ҳур фикрни тағ-томири билан суғуриб ташламагунча тинчимайди. Барча сталинчиларга әзтийор беріб қаранг: уларнинг ҳаммалари қандай лиbos кийган, қандай упа-әлик сепган, қандай бўйинбоғ таққан бўлмаснилар, бир тусда эркин фикрлаш ва мустақил фикрлашга қарши шафқатсизлик билан курашадилар.

Фақат жўрсатма билан яшайдиган ибтидоий фикрли одамлар учун Сталин идеал зот эди. У ҳур фикрни ёқтирмайдиган барча одамларнинг барча пастарин майл (инстинктларига) беҳад ёқадиган ва уларга беҳад қулай ишларни амалга оширади. Бундай майл (инстинкт) эгалари ҳар қанча бугуноҳ қонлар тўкилганда ҳам bemalol, бир мўйи ҳам қимир этмай мазза қилиб томоша қилиб тураверади. Айтматов асалларидан мана шундай трагедиялар акс этади. Бу трагедияларда шафқат ва меҳр енгилган, лекин енгилиб туриб ғолибдир.

Айтматов қаҳрамонлари енгилган ғолиб одамлардир. Лекин енгилган вужуд, ғолиб — руҳдир...

МУНДАРИКА

Бедор қалб	3
Озод нафас	
Гала	10
Она даргоҳида	25
Оқ бургутлар	34
Тош супа	36
Мұхаббатин одам қандай яшайды?	37
Мурид	38
Қатлгоҳда ўйнаган бола	39
Бобораҳимниң сариқ гуллари	44
Амир Алишерниң тавбаси	53
Дардлар ёрілгін замонда	
Билсак ва аягласак	64
Күнгилпинг нозиккілігі	66
Иккі дебоча аро	73
Диллисанә (Мактубларда Наконй сиймоси)	77
Коинот, күхнә равоқ ва Навопой	85
Навоийнинг хаёл кемаси	91
Одамнинг хоҳишилари	92
Қуёш боғианаси ва Бобур	95
Фақирларнинг шоҳи	98
Тиляни тилған Оллоёр	103
Нега шоирлар девона бўладилар?	106
Раъно ва Хайём	110
Раънонинг кафши	115
Эмраимш	119
Мүшкул йўллардаги матъумлик	125
Шам ва бўров	132
Хужайирадаги сувратлар	135
Иккі ҳайрат	143
Оромсиз дунёда	146
Енгилган ғолиблар	148

118c

Адабий-публицистик нашр

ИБРОҲИМ ҒАФУРОВ

ДИЛ ЭРКИНИЛИГИ

Ҳикоялар, мансуралар, бадиалар, адабий мақолалар

Toшкент «Маънавият» 1998

Муҳаррир М. Исокова

Мусаввир С. Соин

Техмуҳаррир Т. Золотилова

Мусаҳҳиҳ Ш. Илҳомбекова

Теришга берилди 21.08.98. Басишига руясат этилди 30.10.98. Бичими 84×108^{1/32}.
Литературная гармоника. Юқори босма усулида басилди. Шартли б. т.
7,98. Шартли ир. отт. 8,4—Нашр т. 8,21. 5000 нусха. Буюртма № 125. Нархи
шартнома асосида.

«Маънавият» нашриёти. Тошкент. Шодлик кӯчаси, 6. Шартнома 17—98.

Ўзбекистон Республикаси Давлат матбуот қўмитасининг Тошкент книгоб-
журнал фабрикасида чоп этилди. Тошкент. Юнусобод даҳаси. Муродов кӯ-
часи, 1-й. 1998.